



58, i

34218/A /1

Fulton 14

In this Book D^r Lower lays claim to the
Invention of transfusing the Blood, to which
Francis Potter, a native of Mire in
Wiltshire had certainly a prior Right.
(See his Article in Wood)

the transfusion of the Blood from one
human Body to another, from which the
Physicians of this time had great Expectat-
-ions may be ranked with Talismantry,
famous Chimera of supplying defective
parts by grafting others in their place.
to transfuse the fluids of the Body, can
do us little service except a Method
be found out for Renewing the
Solids

Was nisi concurrebat quoddam: infans
See D^r James Mackenzie's history of health ^{accidit.}
& the Art of preserving it, for an account
of the Rise & fall of the transfusion of
the Blood from one animal into
another.



58, I

RICHARDI LOWER, M. D.

Colleg. Med. Lond. Socii

TRACTATUS

DE

CORDE.

ITEM

De Motu, Colore, & Transfusione

SANGUINIS,

Et de CHYLI in eum transitu:

UT ET

De VENÆ SECTIONE.

His accedit Differtatio

De ORIGINE CATARRHI,

In qua ostenditur, illum non provenire à Cerebro.

Editio Sexta, prioribus Indice Auctior,
cum Figuris Æneis.



LUGDUNI BATAVORUM,

Apud JOHAN. & HERM. VERBEEK.

MDCCXXVIII.

1728



95400



P R Æ F A T I O.
MEDICIS.

De Anatomies ad fidem Medicam comperta habetur necessitas, ut, postquam inter Humanae partes Sapientiae censeri Medicina coepit, illi exercenda Optimorum quisque totum se dederit.

Inter Eos vero, quibus merita pepererunt hac in Arte gloriam, Princeps haberi meruit LOWERUS.

Sive enim in cada veribus incidentis peritiam, sive sinceram, qua inventa narrat, fidem spectes, Summum proclamabis; nec alio eges argumento, quam perfecto Willisii de Nervis opere.

Contemplatus autem circumspeditionem, qua ex scitis Anatomicis ea

P R Æ F A T I O.

*deducit, quæ aliter latent, parem
vix inveneris.*

*Duplex hæc Libelli huius dos effecit,
ut quinquies excusus venalis tamen
reperiri nequeat; quare ego Plurium
incitatus desiderio consilium cepi, ut
sexta jam vice perfectissimus iterum
prodeat.*

*Accipite omni laudis ornatus su-
periores! Et evolvite, quem decies
lectum semper plus placuisse testati
sunt Viri in Vestra Arte Principes.*

EPISTOLA DEDICATORIA.

Clarissimo Viro

D. THOMÆ MILLINGTON,
M. D.

Mirabuntur alii , forte & ipse miraris ,
Vir Ornatissime ,
de Corde & Sanguine , post tot Viros Celebres , qui materiam hanc non tantum tractasse , sed & exhaustisse , videantur , à me quicquam amplius proferri:
Et quidem *Harvejus* , quantum ad nobilissimum Circulationis Inventum pertinet , fabricam Cordis , Motum-

* 3

EPISTOLA

tumque Sanguinis ita descripsit, ut posteris nihil fere aut addendum, aut desiderandum reliquerit. Verum ut in Cœlorum *Hypothesi Ptolemaica*, præter immensas orbium revolutiones, minores quoque Epicycli planetis assignantur, ipsi etiam ad Phænomena explicanda necessarii; sic in Humani Corporis systemate, etiam in illo aliorum animalium, præter circulationem *Harvejanam*, sunt & alia porro considerata, quæ minutiora

DEDICATORIA.

ora licet, ad solidam tamen
variorum symptomatum æ-
tiologiam haud parum fa-
ciunt. Quid quod & *Har-*
vejus, si per otium licuisset,
plura polliceri videtur ipse
Lib. de Circul. Sang. cap. 9.
Sed quantum in unoquoque
propellatur singulis pulsatio-
nibus, & quando plus, &
quando minus & qua de cau-
sa, accuratius posthac ex mul-
tis observationibus à me forsan
palam fiet. Sed, quod maxi-
me dolendum est, & Ille vo-
to suo, & nos spe nostra ex-

E P I S T O L A

cidimus : Cum itaque nemo
hactenus, quo suppleantur
ista, vel Cordis ipsius fabri-
cam motumque plene enar-
randum, vel Transeuntis
Sanguinis velocitatem &
mensuram recte computan-
dam, vel venosi atque arte-
riofi, quoad Colorem, di-
scrimen clare illustrandum
susceperit; saltem in iis ex-
plicandis quicquam satis
perfecerit, ut votis Excellen-
tissimi Viri aliqua in re, ultra
quam adhuc præstitum fit,
occurrerem, in ipsa Cordis
pe-

DEDICATORIA.

penetralia descendere , ipsumque vitæ fontem rimari & recludere conatus sum : Non quod totam ejus historiam tradere , vel affectus ejus omnes & pathemata edocere aut spei nostræ sit , aut consilii : Verum ut , quam dixi fabricam , motumque ejus , variasque ejusdem anomalias , earumque causas & symptomata , quantum observando assequi potui , & ad Rem Medicam facere videatur , maturius expendere , & fusius explicarem.

EPISTOLA

Pudet interim pigetque
dum nonnulli in hoc nostro
sæculo saniori Philosophiæ
promovendæ tam utilem,
tamque Humano Generi
salutarem operam impen-
dunt, non deesse tamen al-
lios, quorum ea est sive ma-
litia in Universos, sive in
singulos invidia, ut huic
tam laudabili instituto po-
nant omne illud, quantum
possunt, impedimenti, illud
bene, quod per inscitiam
majus non possunt: Inter
quos summæ proterviæ &
stu-

DEDICATORIA.

stuporis *Meara* quidam *Hybernus* cæteris omnibus palmam præripere videtur : Cui , Imperito ipsi , alios scire quicquam dolet ; id quod scripta ab illo , utcunque sub larvato titulo *Conlo- nis Cassinii* nuper edita , conviti-orum non minus , quam errorum , plena palam faciunt. Verum ista omitto , quia ea in parte si cum illo certandum esset , non tam esset mihi in arenam , quam sterquilinum , descendendum , ubi contractas fordes

E P I S T O L A

victricia non compenſet. Atqui errores quod attinet, eos præfertim, qui de Cordis Uſu, Motuque Sanguinis, tum etiam de Chyli Natura, ejuſque in Sanguinem Tranſitu (de quibus tam imperite ſcripſit, ac ſi jam annos quadraginta altum dormiviſſet, necdum evigilaſſet ſatis) quia eos ſilentio non præteriri aliorum intereſt, quatuor ſpeciatiim ſeq. Tractat. Capita à me conſcripta ſunt; quæ omnia diſtincte tradidi, non
tam

DEDICATORIA.

tam ut ejus inſcitiam (ſatis utique jam diu perſpectam) magis detegerem, quam ut communi ſtudio & comodo proſpicerem.

Dum in hiſ ſum, de *Muſculorum Structura*, quam longe aliam, atque haëtenus credita eſt, deprehendi; de *Seri è Cerebro exitu*, jam primum detecto; de *Colore Sanguinis arterioſi*, & de variis ſymptomatibus non pauca à me primo obſervata hic illic interſperſi. De *Transfuſione* etiam caput integrum
ad-

E P I S T O L A

adjunxi, cum ob materiae
affinitatem, tum etiam ut
celeberrimi hujus experi-
menti inventio, cui jure de-
bita est, Authori asseratur.

Denique de Origine Ca-
tarrhi Dissertationem sub-
junxi: in qua abunde osten-
di illum non provenire à
Cerebro, ut Medicorum
vulgo hactenus falso credi-
tum fuit.

Quicquid horum Judi-
cii tui examini probatum
non erit, excusabit ingenii
tui candor, nec respues hoc
af-

DEDICATORIA:

affectus in Te mei pignus &
testimonium , nescio apud
alios quamdiu duraturum,
certe à me debitum

Tui Amantissimo

RICHARDO LOWER.

ELEN.

E L E N C H U S

C A P I T U M.

C A P U T I.

De Situ & Structura Cordis. Pag. i.

C A P U T II.

De Motu Cordis 66.

C A P U T. III.

De Motu & Colore sanguinis. 171.

C A P U T IV.

De Transfusione sanguinis. 194.

C A P U T V.

*De Chylo ejusque in sanguinem Transitu &
Transmutatione.* 217.

C A P U T VI.

De Catarrhis. 247.

RI-

RICHARDI LOWER C O R D I S ANATOMIE.

C A P U T I.

De Cordis Situ, & Structura.



Um ad Sanguinis naturam & affectus dignoscendos, non tantum circularem ejus motum investigasse, sed & motus illius numeros, principia, & diversas alterationes, earumque causas cognoscere, atque inter se conferre, nec non ejusdem liquoris copiam singulis pulsibus trajectam æstimare, plurimum intersit; operæ pretium existima-
vi rem totam (à plerisque adhuc omis-
sam, ab aliis, & ab ipso quoque
Harvejo optatam potius, quam expli-

catam,) quantum conjectura, & experimentis assequi possum, clare & breviter enarrare.

Verum, cum motus Sanguinis Cordis motui debeatur, absque quo, nec satis intelligi potest, nec persistere, de hujus Situ, & Structura quædam præfanda sunt, quibus rite perpenſis, atque inter se collatis, magis in promptu erit concipere, quam accurate, tum Fabrica, tum Situs ejus ad motum comparentur, & quam apte constituentur omnia ad sanguinem in partes universi corporis distribuendum.

Homini igitur, & carnivoris fere quibusque animalibus cordis sedes non in centro, sed in superiore corporis parte constituta est, ut debitam sanguinis portionem eo facilius sursum in Caput effunderet. Nam cum trajectio & distributio sanguinis à Cordis systole omnino dependeat, nec liquor ejus ex natura sua tam prompte in partes superiores, quam in vasa parallela, aut deorsum in subjecta propellatur; si Cor-
dis

dis Situs à Capite remotior esset, fieri non posset, quin aut ipsum robustius formatum oportuerit, ut fortiore ictu liquorem projiceret, aut ob defectum sanguinis sæpenumero Caput vacillaret. In animalibus autem, quæ longiore collo, & quasi ad victum porrecto, donantur, à Capite æque, ac à cæteris partibus, remotus est Cordis situs; neque incommodi quicquam exinde sentiunt, quia Capite plerumque pendulo victum quærunt, adeoque Sanguis, ut longiore, quam in cæteris, intervallo, ita ductu planiore, & sæpius declivi, in Caput transfunditur.

Pars Cordi maxime vicina (de qua pauca præmittenda sunt) est membranosa ejus capsula, *Pericardium* inde dicta, quod ipsum Cor (ut cortex nucleum) undique amplectatur: Membrana est firma & robusta, cum Pleura undique communis & continua, nisi ubi à vasis perforatur, ejusdem quoque figuræ, & pene magnitudinis cum ipso Corde, cui subsidium tam

necessarium præstat, ut in avibus minoribus, serpentibus, ranis, & in omnibus præterea vel minimis animalculis, quæ hæcenus mihi disseccare licuit, nunquam desideretur. De usu ejus optima fit conjectura ex liquore, quem continet; præterquam enim, quod Cordis parenchyma involucro isto munitum nec corrumpatur ab empyemate, nec pulmonibus adnascatur, & cæteris adjacentium partium injuriis minus exponatur, in vacuo inter Cor & membranam ambitu Serum quoddam, seu aqua tenuis, semper reperitur, qua externa Cordis superficies continuo humectatur, quæ alioqui ex perenni agitatione & calore inarescere, & corrugari, adeoque ad motum inepta reddi posset.

Unde autem humor iste proveniat, hæcenus non ita recte pronuntiatum est: Plerique enim humores serosos ab æstu Cordis in nubem elevatos, ac densitate hujus membranæ coercitos, in

in aquam istam condensari, & proinde pro ratione temperamentis plus in calidioribus, in frigidis autem minus, abundare statuunt. Verum si hanc originem hujus aquæ atque causam esse concedamus, utique non apparet, quare majore copia plerumque hic loci non congeratur; quippe cum humores à continuo Cordis æstu in nubem elevari, atque à membrana hac intus cohiberi, & in aquam converti debeant, quid impedit, quominus in copiam justo majorem, quantamque hæc capsula continere non posset, augeatur; præterea, cum continui incrementi sit, ni simul & exitum alicubi habeat, aut diutina stagnatione corrumpi, adeoque Cordi infesta reddi, aut saltem nimia ejus inundatione, Cor ipsum obrui necesse est.

Quare, ut aquæ hujus fontem alibi quæramus, advertere oportet, Naturam in variis corporis partibus, ubi operis aut functionum eadem, aut par ratio est, iisdem plerumque machinis

atque instrumentis uti; & quemadmodum glandulas lacrymales ad humorem suggerendum, quo oculi illinantur atque madesiant, (absque quo sicci, & motui inhabiles evaderent) ita pariter & juxta Cordis basin diversas glandulas constituit, è quibus humor intra capsulam exstillat, & in vacuo isto spatio huc illuc agitato Cordis superficiem undique alluit, quo promptior & facilius ejus motus reddatur.

Porro humorem istum non mere excrementitium, aut instar roris stillatitii aqueum, sed Seri potius nutritii è Sanguine promanantis partem esse, exinde constat, quod ignis calori vel paululum admotus, non aliter quam serum sanguini post venæ sectionem innatans, aut lymphà è glandulis secreta, in gelatinam albam incrassetur: Qualem consistentiam nec sudor, neque urina qualicunque coctione acquirit, sed vel omnino in auras exhalat, aut in fabulum induratur. Unicum tantum super hac re obiter notandum est,

est, nempe aquam in Pericardio contentam solummodo huic experimento idoneam esse, quæ in animali bene constituto & violenta morte perempto reperitur, cujus utpote sanguis sero nutricao diluitur: Nam in animalibus morbo defunctis, aut longa inappetentia & inedia confectis, quorum nempe sanguis succo chyloso prorsus destituitur, neque eadem ratio est, & impar successus: Cæterum in sanioribus tam manifesta res est, ut aperto jugulati bovis Pericardio magnam plerumque concretæ gelatinæ copiam invenias, quæ extincto tantum calore partis, aut sponte sua, aut à frigore in istam consistentiam condensatur, non aliter quam decoctum cornu Cervi, ubi frigido aëri exponitur, in gelatinam subito concrefcit.

Verum de Liquore. intra capsulam contento, dictum fatis: de Membrana ipsa adhuc inquirendum restat, quæ sit causa, tum finalis, tum efficiens, quod Pericardium in Homine Septo trans-

verso semper accrescat , cum idem in quadrupedum genere liberum , & aliquanto spatio ab ipso remotum sit. Itaque *finalem* quod attinet , diversitatis ratio non in eo posita videtur, quod diaphragma humanum , pariter ac cæterorum animalium , contrahi non debeat , cum par utrinque respirationis usus , & necessitas , id exigat ; sed cum erectus sit hominis incessus atque figura, eoque facilius abdominis viscera suo pondere descendant , minore propterea diaphragmatis nixu atque systole ad inspirationem opus est ; porro , cum in expiratione pariter necessarium sit idem diaphragma relaxari , & tensionem suam remittere , cum capsula Cordis omnino connectendum fuit in Homine , ne is forte , quamdiu erectus incedit, ab hepatis , aliorumque viscerum appensorum , pondere deorsum adeo deprimeretur , ut neque pulmo satis concidere , neque exspiratio debito modo peragi posset. Quocirca in quadrupedibus , ubi abdominis viscera

in

in ipsum diaphragma incumbunt, ipsumque in pectoris cavitationem suo pondere impellunt, ista partium accretio expirationi quidem inutilis, inspirationi autem, debitam diaphragmatis tensionem impediendo, prorsus incommoda fuisset.

Ideoque Pericardium in brutis liberum relinquitur, ne diaphragmatis systolæ officiat; in Homine autem Septo alligatur, ut ejusdem inter expirandum diastolem adjuvet.

Verum si quæratur, quid sit, quod hujusmodi connexionem in humano pectore efficiat, ego causam (si conjecturæ locus sit) certe aliam non video, quam quod infans, in utero materno conclusus, & jam exitum quæsiturus, capite deorsum ad matricem demisso (quo partui magis opportunus fiat) plerunque jaceat; unde fit, ut viscera infimi ventris toto pondere suo diaphragmati incumbentia, otioso adhuc, & ab omni motu ferianti, ipsum Cordi propius admoveant.

& contiguum eousque detineant, donec sensim agglutinetur, & tam arcte tandem accrescat, ut liberare se non possit, aut iterum recedere.

Ex eodem hoc viscerum inferiorum in foetus thoracem decubitu, non tantum fieri arbitror, quod Septo transverso Pericardium adhæreat, sed & quod conus Cordis in humano genere multo magis, quam in cæteris animalibus, deflectatur; neque enim apici tantum humani Cordis, sed & toti lateri applicatur diaphragma; id quod, nisi ob molem & gravamen innitentium viscerum, contingere vix poterat: quare autem Cordis humani conus in sinistrum latus vergat, hoc exinde fieri arbitror, quod truncus Venæ Cavæ diaphragma pervadens, & juxta dextrum Cordis latus ascendens, illud eò advolvi non sinit; cum vero in sinistro pectoris claustro liberum detur spatium, neque quicquam prohibeat, ab accumbentium viscerum mole Cordis

co-

conus semper in lævum defle&titur ,
 ipsique lateri sinistro tam prope ac-
 cumbit , ut ex hac parte vibrationes
 ejus (concidente præsertim pulmone
 inter expirandum ,) admota manu
 tam facile palpari videantur.

His ita præmissis , proxime osten-
 dendum venit , quibus fulcris Cor
 ipsum innitatur , & quam motui ejus
 inserviant , hæc omnia aut saltem ob-
 sequantur.

Et quidem plurima sunt , quæ su-
 stinendo Cordi auxiliares manus præ-
 stant ; præcipue autem à vasis san-
 guiferis (quibus velut tot radicibus
 accrescit) parenchyma ejus depen-
 det , atque subtenditur ; quin & ,
 cum basis Cordis in hiatus , & ori-
 ficia lata , recipiendo exprimendo-
 que sanguini , conformata sit , ita
 omnino fieri debuit , quo muneri
 isti magis opportunum , atque ido-
 neum redderetur. Quam stabile au-
 tem fundamentum ad Cordis mo-
 tum perficiendum præstent vasa
 fan-

sanguifera , postea fusius , cum de Cordis motu agemus , dicetur.

Quare quod proxime sequitur , de partibus Cordis agendum est ; inter quas , quoniam nervi vasaque sanguifera , externam ejus superficiem perreptantia , primo in conspectum veniunt , primum quoque tractanda sunt.

Disceptatum est olim , an vasa sanguifera à Corde originem sumerent , an potius in ipsum terminarentur ; verum ex quo *Cl. Harvejus* prima vitæ stamina atque rudimenta in cicatricula nidulari docuit , atque ex motu & pulsu minutulæ ejus bullæ arterias , veluti tot fistulas & canales , sanguini convehendo excudi , non est , quod diu in quæstione hæreamus : Quod autem ad venas spectat , cum sanguini tantum referendo à partibus corporis omnino natæ sint , utique existimandum est , ab extremo undique corpore oriri , & in Cor , ubi liquorem suum exonerant , denique terminari : Neque enim quis dixerit flumina à mari , in quod sese
exq.

exonerant, sed à fontibus & minoribus rivulis originem suam haurire. Verum alia sunt vasa, quæ tum originem à Corde capiunt, tum in ipsum quoque terminantur: cordis enim parenchyma ut toti corpori calorem & nutrimentum porrigit, ita & sibi eodem modo prospicit; neque enim æstuante intra ventriculos sanguine solum calet, aut succo nutricao intra ventriculos cocto saturatur, sed chylus, qui parietibus Cordis sine manifesto vitæ discrimine (ut postea patebit) agglutinari non potest, per vasa unà cum sanguine per totum ejus parenchyma distribuitur, ibique in nutrimentum ejus facessit, & pro continuo dispendio novo subinde pabulo reparatur.

Vasa autem, quæ sanguinem in Cordis parenchyma convehunt, duo omnino sunt in duos truncos utrinque mox ab origine divisa; quorum orificia circa principium Aortæ immediate extra valvulas semilunares aperiuntur, Coronariæ inde dictæ, quod truncis non statim
in

in parenchyma demissis, sed factoprius circuitu, quo commodius undique sese explicent, Cordis basin amplectantur, & cingant: & licet ab ipsa origine in oppositas Cordis regiones ab invicem recedant, circa extremas tamen partes rursus conveniunt, & passim apertis osculis inter se communicant adeo, ut si alterutri liquor aliquis injiciatur, per utramque simul & semel dispergatur; cum enim eadem ubique caloris vitalis, atque nutrimenti, necessitas urgeat, ne usquam deficient, anastomosi hac abunde providetur.

Verum, ut arteriæ duæ sanguinem, ad alimentum & calorem Cordi suppeditandum subministrant, ita & duæ venæ, ab ambitu suo Coronariæ quoque dictæ, reducendo sanguini inserviunt. Et ne quis in posterum dubitet, venas capillares apertis osculis in se invicem hiare, si intueatur conum Cordis vitulini, aut cujuscumque animalis recens nati, in quo vasa hæc planiora existunt, & cultelli apice sanguinem ab hac in illam venam urgeat pro-

propellatque, manifesto videbit, sanguinem facile à vena hujus lateris in illam alterius percurrere, & vice versa. Idem in vasis vesicæ, intestinorum, ventriculi, & cerebri evenire certus sum, ut nullus dubitem, vasa capillaria (eiusdem generis) per omnes corporis partes in sese mutuo aperiri.

De Nervis Cordi implantatis Authores, qui Cordis & Sanguinis motum nesciverunt, non immerito plerique olim filebant; atque his proxime accedunt, qui, circulationem licet agnoscant, eam tamen tam lento & testudineo passu fieri statuunt, ut sanguinem guttatim instillari, & ebullitione solum excitatum è Corde prolabi autument; atque proinde, an Cordis motus ad sanguinis circuitum aliquid conferat, parum solliciti, de muscosa Cordis structura, atque numerosis nervis parum, aut nihil, dignum opinentur; verum si quis tendinosam &

A 8 fibro-

fibrosam Cordis substantiam, eamque tot nervis ubique intertextam perpendat, existimare eum quoque oportet, non tantam vim illi frustra datam, sed ad idem officium cum reliquis musculis factam atque constitutam esse; plurimas enim nervorum fibras atque furculos à nervis octavi paris accipit, qui omnes inter arteriam pulmonalem & Aortam incedentes in auriculas utrinque varias propagines dimittunt, & deinde in Cordis substantiam varie explicantur, qui in Corde vituli, aut recens nati cujuspiam animalis, per totam extimam superficiem manifestius apparent, atque in Tabula A. delineantur, in qua

aaaa *Nervi octavi paris abscissi; qui licet ab una eademque origine proficiantur, in Homine tamen, ubi extra cranium emergunt, in duos truncos dividuntur: quorum*
ra-

ramus exterior bb Intercostralis dicitur , quia deorfum pergens verfus partes inferioris ventris, propagines ubique in tranfitu ex fpinali medulla inter coftas prodeuntes , veluti totidem subsidia admittit. Ramus autem interior cc par Vagum dicitur, & poftquam varios nervorum furculos ac propagines in tranfitu Cordi diftribuit, in viscera ventris inferioris diffeminatur.

dd Plexus Rami intercostralis Cervicalis dictus , quia in media hominis Cervice utrinque fitus eft.

ee Plexus nervorum paris Vagi.

f Plexus Cardiacus , in quem terminantur furculi nervofi ggg è plexu Cervicali nervi intercostralis utrinque orti.

hh Surculi nervi insignis è plexu paris Vagi ab utroque latere in plexum Cardiacum terminati.

- ii *Plurimæ propagines nervosæ è plexu parisi Vagi in Pericardium, Cordis vasa appensa, & auriculas distributæ.*
- k *Insignes nervorum surculi à plexu Cardiaco inter arteriam Pneumonicam m, & Aortam n incedentes in Cordis parenchyma distribuuntur.*
- ll *Duo insignes nervi à pari Vago demissi in Cordis parenchyma pariter impenduntur; qui varie inter se & cum ramis nervosis, à plexu Cardiaco demissis, inosculantur, quo sibi mutuo auxiliantur. Per hos nervos spiritus constanter influunt pro motu Cordis perenni continuando.*
- oooo *Cordis musculus sive parenchyma, cui omnes nervi implantantur.*
- pp *Nervi parisi Vagi quo loco versus ventriculum descendunt, & superiori*



*riori parti ejusdem ventriculi
impenduntur.*

q q *Rami eorum interni ad ventri-
culi partem inferiorem, seu fun-
dum tendentes.*

rrr *Nervi paris Vagi abscissi.*

ff *Nervi intercostales abscissi.*

Quale vero ministerium Cordi præ-
stent, postea dicetur. Interea adver-
tere non alienum erit, quomodo spiri-
tus pro diversis animalium figuris per
nervos varie in Cor influant; cum enim
nulla vis aut facultas se movendi Cere-
bro insit, qua spiritus animales (uti
Cor suum sanguinem) propellat, cum-
que liquor nervosus, & spiritus eo invo-
luti ex natura sua solum deorsum, vel-
ut aqua ex Alembico, suo pondere
destillent, ideo fit, ut caput, aut spi-
nalis medulla supra reliquum corpus in
omni animalium genere constituatur,
aut saltem pro libitu erigi atque attolli

possit: Et licet fatendum sit, à sanguinis in Cerebrum appulsu spiritus permeatus & poros Cerebri, ut in reliquo corpore, propelli, atque à subsequenti-
bus continua quadam serie & successione in nervos & Spinalem Medullam urgeri, cum tamen difficilius liquor iste nervosus sursum, quam deorsum, usque impelli atque protrudi possit, inde fit, ut Cerebrum, aut saltem Spinalis Medulla, supra reliquum corpus collocetur; quo liquor animalis facilius in omnes partes subjectas influat, & descendat. Et quidem hujus conjecturæ diversus nervorum è Spinali Medulla in Homine atque in quadrupedibus exortus primam mihi ansam dedit; quippe in Homine, qui Capite & Spina erecta factus est, nervi omnes oblique exorti, oblique etiam deorsum feruntur; in Brutis autem, quorum Medulla Spinalis supra corpus collocatur, nervi omnes recte deorsum ex-
orti,

orti, recte etiam è Spinali Medulla extra vertebrae descendunt: Quin etiam, licet propaggines nervosæ à solis octavi paris nervis in Cor humanum inferantur, & desuper veluti pro faciliore spiritus animalis in Cor influxu descendant; in Brutis plerisque longe aliter se res habet; quippe præter propaggines, quæ à nervis octavi paris è loco paulo superiore in Cor distribuuntur, plurimi præterea nervorum furculi ab iisdem nervis, ubi supra Cor ipsum trans-eunt, atque è spinali medulla inter singulas costas furculos nervosos, quasi totidem subsidiarias copias, admittunt, in Cordis parenchyma recta dimittuntur, quo proclivius ad ejus motum adjuvandum influant, ut cuilibet in vitulis, equis & majoribus animalibus primo statim intuitu occurret; manifesto indicio, hoc ideo à Natura quasi subsidium brutis comparatum esse, ne capita, quæ terram prona spectant, non

B 3

fatis

fatis facile aut copiose spiritus animales impertirent.

Quod etiam in causa esse arbitror, cur nervi octavi paris in Homine, secus ac in Brutis, utrinque in duos truncos dividantur; quorum trunco exteriori, qui intercostalis dicitur, juxta plexum cervicalem (unde furculi nervosi in plexum cardiacum dimittuntur) rami etiam à nervis vertebralibus derivati inosculantur; nempe ut spirituum vario hoc ac multiplici com meatu, & declivi transitu, eo copiosius certiusque, atque etiam facilius perpetuo ac indefatigabili Cordis motui provisum sit.

Explicatis ad hunc modum Vasis Cordis, tandem ad Parenchyma, seu potius *Muscularem* ejus *Substantiam* pervenimus, de qua observare est, ipsam supra omnes Corporis Musculos accurate conformari; cum enim cæteros omnes operis necessitate & con-

constantia multum excellat, utique par fuit, ut structuræ quoque elegantia eodem longe superaret. Quanquam autem & nobiliori usui destinari, & peculiari quadam textura sua multum præstare videatur, hoc tamen habet cum reliquis Musculis commune, quod iisdem plane fibris, & instrumentis, tum fabrica ejus, tum motus instituantur. Quod ut clarius innotescat, Musculi recti cum obliquis conferendi sunt: Musculum autem quemlibet in toto corpore, cujus fibræ, atque motus recti sunt, non unico & simplici ventre, (uti ab Anatomicis hæctenus scriptum est, qui duos solummodo Musculos in collo biventres agnoscunt) neque capite & cauda donari, neque fibras ab altero extremo tendine in alium recta ferri, certum est; (prout in *Tab. 3. Fig. 1.* delineari solet.) sed omnes biventres sunt, & fibræ eorum carneæ prout à diversa origine, ita in diversos & oppositos fines feruntur. Prout *Tab. 3. Fig. 2.* exhibet; in qua

B 4

aa

aa *Tendines utrimque.*

bb *Duo ventres, sive duplex Musculus, cum fibris in oppositos fines respicientibus.*

cc *Tendinis utriusque pars exterior, in quem fibræ omnes inseruntur.*

Atque hæc quidem est fabrica Musculorum omnium in universo corpore, sive in femore, tibia, brachio, & collo Humano; porro Musculi Abdominis, Maxillares, Temporales, Diaphragma, Intercostales externi & interni, ut vocant, (quorum quidem singuli sunt unius Musculi bini ventres) eodem ordine & modo conformantur. Atque ne unum tantum specimen simplicis cujusvis Musculi biventris exhibeam, libet unum & alterum Musculi magis compositi Schematismum proponere; qualem in *Tab. 3. Fig. 3. 4. & 5.* Musculi Lumbaris in cane varia facies manifesto ostendit; tertia enim Figura Musculi illius partem abdomini proximam, cum fibris omnino rectis deor-

deorsum in longum tendinem desinentibus, exhibet; in qua

a *Pars ejus carnosa prope renes.*

b *Pars ejus inferior, ubi tendo ossi cruris affigitur.*

cc *Fibræ recte utrimque in tendinem desinentes.*

Quarta autem Figura ejusdem Musculi Lumbaris latus exhibet, qua Spinæ vertebris accumbit, quod quidem diversis quasi Musculis constat, quorum cujusque tendo in diversam vertebram affigitur; in qua

a *Musculi pars interior deorsum in tendinem abiens.*

bbbbbb *Musculi parvi adversi lateris, quorum tendines*

cccccc *In singulas vertebrae juxta sitas implantantur, & sursum tendunt.*

Cujus quidem utriusque lateris ductus atque ordines in Figura quinta simul repræsentantur; ut uno intuitu constet, eundem Musculum esse, sed fibris in diversa tendere.

In sexta autem Figura ejusdem Tabulæ exhibetur Musculus quidam, ob formam *Plumaris* mihi dictus, qui in extremitate Cruris ovini occurrit, & ab osse Femoris exoritur, & in longum tendinem desinit, qui ossi Tibiæ ovinæ annectitur: Et cum alii Musculi plures fibris suis plumam cum penna accurate referant, hic quidem è duplici pluma constat, atque uti ad Musculi biventris normam, ita & ad similem quoque motum componi videtur. Verum præ his omnibus maxime compositus est, quem Musculum Deltoeidem vocant; cujus quidem plures ventres sunt, atque vario in opposita respectu plane ostendunt, Naturam, quanquam in diversis corporis partibus circa formandos Musculos varia arte, & sæpius, ludat, at semper ad Musculi biventris ordinem atque rationem collimare; prout in *Tab. 4 Fig. I.* luculenter apparet; in qua

aaa *Pars Musculi Deltoeidis tendinosa superior, quæ ossi scapulæ & claviculæ annectitur.*

bbbb

bbbb *Pars tendinosa inferior, qua
medio brachio annectitur.*

ccc *Ventres ejus superius tenden-
tes.*

dddddd *Ventres ejus deorsum ten-
dentes.*

Quare autem Musculi biventres in collo sic appellati junctis tendinibus in medio conveniunt, contra quam in aliis omnibus totius corporis Musculis observari potest, in causa conjicio esse, quod cum venam jugularem ex utroque colli latere transcendant, nisi ibidem attenuari, & per tendines committi provisum esset, venam compri- mendo, sanguinis è cerebro descen- sum multum impedirent; prout in *Tab. 4. Fig. 2.* plane patet, in qua

aa *Vena jugularis.*

bb *Musculus biventer.*

cc *Duo tendines.*

d *Ubi tendines utriusque conjun-
guntur.*

Poteram hic plures alios Musculos rectos non injucundo spectaculo de-
linea-

lineare, sed cum omnibus eadem texturæ ratio sit, proxime restat, ut ostendam, quid Musculus, cujus fibræ atque motus oblique circulares sunt, cum recto commune habeat.

Ut enim, ad Geometriæ leges, linea recta obliquæ norma est, ita ex structura Musculi recti, tanquam communi norma, circularis hæc Cordis Machina optime ediscenda est; quemadmodum itaque musculi cujusque recti fibræ carneæ, non recta, sed oblique ab altero extremo tendine in alterum pertingunt, quæ ubi contrahuntur, tendines suos propius sibi mutuo adducunt; ita & consimili plane modo in Cordis machina constituenda, ejusque peragendo motu, fit: quippe fibris obliquo ductu ab hoc Cordis tendine in oppositum delatis potissimum conformatur; quo nil quicquam luculentius apparet, sive fibrarum Cordis terminationem, sive ductum & seriem earum perpendamus.

Et quidem in Corde bene cocto,
&

& ab auriculis suis & vasis majoribus separato, tendo satis validus apparet, qui marginem ejus circa ostia undique cingit & amplectitur, cujus pars quædam in summitate septi in quibusdam animalibus in osseam substantiam induratur: in quem tendinem fibræ carneæ, quæ externum Cordis ambitum constituunt, atque fibræ carneæ interiores, quæ ventriculis proximæ sunt, ductu plane obliquo & opposito inferuntur, uti videre est in *Tab. 2.*

Fig. 1. Ubi

a *Ostium, quo Dexter ventriculus sanguinem à vena cava excipit.*

b *Ostium, quo eum in pulmonem expellit.*

c *Ostium, quo sinister ventriculus sanguinem à pulmone redeuntem excipit.*

d *Ostium, quo immissum in Aortam expellit.*

eeee *Tendo undique circa ostia Cordis situs.*

ffff

ffff *Fibræ ab exteriori Cordis ambitu undiquaque redeunt, & in tendinem Cordis delatæ.*

gggg *Fibræ interiores, ductu plane exterioribus opposito, in eundem tendinem desinentes.*

Cum itaque constat, fibras Cordis obliquo modo terminari, proxime ostendendum est, easdem ductu quoque simili per totum utriusque ventriculi circuitum complicari; exceptis duntaxat paucis, & tenuioribus fibris, quæ per extimam dextri ventriculi superficiem recte sursum elatæ in basin terminantur, quemadmodum in *Tab. 2. Fig. 2.* delineatur, in qua signanter per

aa *Basis Cordis.*

b *Conus.*

ccc *Fibræ rectæ, sursum versus basin tendentes.*

Reliquæ omnes, in utroque ventriculo, duplicem tantum seriem atque ordinem, sed penitus contrarium, affectant: Fibræ etenim, rectis hisce exterioribus proxime
sub.

subjectæ, oblique a sinistro latere versus dextrum ascendentes in basin Cordis terminantur, & spirali suo ambitu *Helicem*, sive cochleam, satis apte referunt; ut *Tab. 2. in Fig. 3.* videre est, in qua repræsentantur per

a *Basis Cordis.*

b *Conus.*

c *Fibræ, quæ sinistrum ventriculum complicant.*

d *Quæ Dextrum.*

e *Sinus in interstitio utriusque ventriculi pro vasis Cordis excipiendis excavatus.*

Externis hisce subjectæ fibræ, modo prioribus prorsus contrario; ut incedunt enim exteriores à sinistro Cordis latere versus dextrum porrectæ ad basin ejus terminantur, ita hæ ductu plane opposito feruntur; emergunt enim circumquaque à dextro Cordis latere, unde oblique versus sinistrum latæ; & utrumque Cordis ventriculum circumplexæ, ad basin sinistri lateris assurgunt, aliamque *Helicem* inversi ordinis constituunt; ut in
Tab.

Tab. 2. Fig. 4. manifestum est, in qua referuntur per

- a *Basis Cordis.*
- b *Conus.*
- c *Dextrum latus.*
- d *Sinistrum.*
- e *Fibræ dextri ventriculi.*
- f *Fibræ sinistri.*

Quarum omnium seriem, complicatio-
nem, atque ordinem facile percipiet, qui
Cor bubulum, aut ovillum bene coctum
excarnare tentaverit. Quæ prioris ordi-
nis sunt, cuticula Cordis vix dum separa-
ta, prima velut facie facile conspici pos-
sunt; aliæ autem, quæ magis in profundo
latent, non nisi prioribus ademptis in
conspectum veniunt. In iis autem perse-
quendis magna non opus est cautela,
ipsi enim tractus earum, & convolutio-
nes adeo planæ sunt & obviæ, ut filo
quasi ducente ultro se prodant: at vero
licet fila crassiora in glomeres convoluta
primo aspectu valde referant, ad eorum
tamen morem, atque eodem prorsus or-
dine non contexuntur; neque enim
con-

continuo quasi filo, aut repetito sæpius circuitu ventriculos Cordis circumambiunt, ideoque velut glomeres filorum perpetua serie revolvi non possunt; licet enim externa Cordis membrana separata, quantum ex oculis conjicere est, putaret aliquis, fibras omnes oblique à basi ad Cordis apicem uno & continuo ductu pertingere, qui tamen ipsarum ductus ab alterutro extremo emetiri tentaverit, facile comperiet, paucissimas earum vel dimidiatum spatii istius ambitum conficere, sed ubi paululum ab ipso tendine emerferint, sub præcedentibus fibris mox intorqueri, & visum prorsus aufugere; de fibris enim obliquis exterioribus neutiquam sileri debet, non omnes à basi in conum pertingere, sed quasdam earum breviores esse, & ubi medium Cordis ambitum extra attigerunt, instar arcus inflexi statim incurvari, & in tendinem alterius lateris & ventriculi obliquo ductu inferi: quæ quali ordine inflectantur, & fibris carneis hinc inde communicatis, quasi arreptis mutuo manibus, sibi suc-

. currant, ex *Tab. 2. Fig. 5.* plane constat, ubi depinguntur per

a *Tendo circa ostium ventriculi dextri.*

b *Tendo circa ostium ventriculi sinistri.*

ccc *Fibræ ab hoc tendine in alium porrectæ, cum fibris intermediis hinc inde in mutuum subsidium porrectis.*

d *Ubi, postquam dextrum ventriculum complexæ sunt, incurvantur, & oblique in sinistri ventriculi tendinem desinunt.*

Perspecto fibrarum, utrique ventriculo communium, ductu, restat, ut abscisso dextro ventriculo, quo ordine sinistri fibræ ferantur, pariter expendamus; & uti eidem officio ambo ventriculi inserviunt, ita similis ubique machinæ ratio atque forma occurrit, duplici enim & inverso fibrarum ordine, iisque in oppositos omnino tendines desinentibus, instruitur; Fibræ enim exteriores, per totum sinistri ventriculi

am-

ambitum a sinistro latere versus dextrum complicatæ, spirali flexu assurgunt, ibidemque in basin Cordis terminantur, uti Figura 6. exhibet, in qua sinister ventriculus in latus recumbit, ut quo ritu fibræ circa conum Cordis conveniant, palam fiat, ubi indicatur per

a *Basis ventriculi.*

b *Conus.*

ccc *Fibræ oblique adscendentes versus basin.*

d *Latus dextro ventriculo proximum.*

e *Latus sinistrum.*

Interiores autem ejusdem ventriculi fibræ (quæ cum exterioribus ubique & circa conum continuæ sunt) contrario prorsus incedendi ordine, sursum oblique omnes in basin adscendunt, ejusque tendini inferuntur, atque interiorem ventriculi parietem constituunt.

At neque fibræ exteriores omnes in hoc ventriculo ab ipsa basi in conum pertinent, & non nisi pluribus abruptis eousque separari possunt; plurimæ enim in

medio Cordis ambitu à communi via & tractu deflectunt, & sub fibris proximè præcedentibus demersæ in tendinem oppositi lateris oblique ascendunt, adeoque breviorẽ ductu suo circulum describunt, ut in Fig 5. supra constitit.

Quæ contrarii ordinis fibræ, quotquot longiores sunt, ad conum Cordis concurrunt, & circa ipsum in sese mutuo contorquentur, adeo tamen, ut relictum in medio centrum tenuissima Cordis pars sit: cujus contorsionis modum, atque fibrarum in exteriorẽ sinistri ventriculi pariete cum illis in interiorẽ circa apicem Cordis concursum apte satis exhibet Fig. 7. in qua ostenduntur, per

a *Tendo dextri lateris.*

b *Tendo sinistri.*

c *Fibræ aliquot exterioris parietis.*

d *Fibræ interioris parietis.*

e *Fibrarum utriusque ordinis circa conum Cordis contorsio.*

Ex quo perspicuum satis videtur, fibras externi & interni parietis prorsus eas-

easdem omnino & continuas esse; & licet videantur contrario modo ferri, motus tamen eosdem perficere, verum ita ut dum Cordis oppositos tendines in sese constringunt, utrosque ejus parietes in arctius & angustius spatium contrahere necesse sit, ut infra magis patebit.

Unicum hoc addendum restat, non omnes fibras in tendinem, circa ostia Cordis situm, immediate desinere, verum aliquas in carneas, quas vocant, columnas ex utroque ventriculi sinistri latere protuberantes terminari; quæ tamen columnæ varios tendines in membranas mitrales dictas, & cum ipso tendine in basi Cordis conjunctas, emittunt; adeo ut ad motum Cordis perinde sit, utrum hoc, an illo modo basin Cordis assequantur.

Vidimus hucusque, quam vario & obliquo ordine fibræ carneæ Cordis latera & parietes cingant; superest ut quam affabre omnes circa conum Cordis complicantur, exponamus; quod quoniam elegantius delineare, quam

describere, in promptu est, hoc solum advertere sufficiet, ut motus Cordis & Sanguinis circularis est, ita & fibras omnes, motrices utriusque machinas, hic velut propius in circulum, & quasi centrum, adduci; ut conus Cordis bubuli excocti & abscissi ostendit in *Fig. 8. Tab.*

2. in qua pinguntur ad

aaaaa Fibræ exteriores spirali ductu in conum, velut in centrum, coeunt.

Et sicut internæ ventriculi fibræ contrario ad externas ductu feruntur, ita si coni pars interior, & ventriculi cavitati proxima, perpendatur, constabit quoque, fibras ejus, inverso prioribus ordine, velut in circulum pariter componi;

Quandoquidem denique majore nixu & vibratione opus est, ad sanguinem in remotissimas corporis partes, quam in vicinos tantum & laxos pulmones, propellendum, ideo observandum est, ventriculum sinistrum majori fibrarum robore, iisque crassioribus, quam

quam dextrum , firmari.

Structura Cordis exteriori haecenus perlustrata, de Auriculis merito hic aliquid dicendum est, neque enim minore artificio formantur, quam Cor ipsum, licet minore mole consent; quin & par utriusque usus & fabricæ ratio est. Musculus enim utraque est, & eodem fibrarum ordine constituitur; quinimo uti motus earum Cordis motum antecedit, ita & nervos ab octavi paris furculis, prius quam ipsum attingunt, sortiuntur, & quidem fibræ carneæ intermediae, in oppositos tendines feruntur, quippe tendo in Cordis basi auriculis etiam communis est, cui veluti fulcro innituntur; ex altera autem parte auriculæ dextræ, qua Venam Cavam respicit, durior & tendinoso plane circulo firmatur; inter quos fibræ in hunc, & illum delatæ terminantur, uti ex Cordis humani auricula dextra inversa & explicata constat in *Tab. 5.*

Fig. 2. in qua.

aaa Basis auriculæ, ubi tendini

C 4

Cor.

Cordis unitur.

bbb *Tendinosus circulus , quo
a Vena Cava distinguitur.*

ccc *Fibræ carneæ in diversos ten-
dines delatæ ,*

d *Vena magna Coronaria.*

ee *Venæ aliæ minores , sanguini à
Corde referendo constitutæ.*

f *Pars auriculæ superior.*

De usu earum infra dicetur : interea
observandum est , inter auriculam dex-
tram & sinistram non eam proportio-
nem dari , qualis inter Cordis Ventri-
culos mutuo intercedit : Ventriculi
enim cum simul & æquis semper passi-
bus moveantur , cumque ad regularem
& commodum per pulmones circui-
tum plus sanguinis è dextro Ventri-
culo suffundi non debuerit , quam per
sinistrum expediri potuit , necesse ideo
fuit , ut pari fere capacitate constarent ;
perexigua enim sanguinis parte (quæ
vasis lymphaticis in pulmone ablega-
tur , & pulmonis nutrimento atque irri-
gationi inservit) excepta , utrique
Cor-

Cordis sinus æqualem continent & distribuunt mensuram.

Cum igitur tam regularis & ubique in omnibus constans ventriculorum respectus & habitudo sit, quid in causa sit, quod auriculæ etiam pari inter se proportionem nullatenus respondent, aliud in promptu concipere non est, quam quod cum auriculæ ad conjiciendum in ventriculos sanguinem natæ, atque constitutæ sint, sanguinis autem è Vena Cava in dextrum Cordis Ventriculum influxus plerumque lenis sit, ideo majore illic & ampliore auricula opus est, quæ sanguinem tanta copia intra ambitum suum excipiat, & ventriculo injiciat, quanta fere ad finem illius explendum sufficiat: è vena pulmonali autem cum propter pulmonis in expiratione collapsum, & subsidentiam sanguis expressus confestim & copiosius urgeatur, hoc solum requiri videtur, ut præterlabenti in sinistram ventriculum sanguini motus fortior imprimatur, ejusque cursus promovea-

tur aliquantulum, adeoque tantæ auriculæ subsidium non desiderat.

Postquam ad hunc modum externam Cordis superficiem atque texturam explicuimus, proxime sequitur, ut, quo intus apparatus instruantur omnia, conspiciamus. Sicut autem externa Cordis facies lævis & æqualis est propter commodiorem motum, ita ob eandem causam interni ejus parietes inæquales maxime sunt, & dispari ritu contextuntur; quippe per totam intus cavitatem in diversa interstitia & sulcos Cor excavatur, & fibris carneis hinc inde porrectis intertextitur; verum nec in omnium animalium Cordibus æque hoc accidit, neque quibus adsunt, simili ordine atque mole fabricantur; quippe, uti *Insignissimus Harvejus* observavit, pro diverso animalium genere, atque ejusdem speciei magnitudine & robore plurimum discrepant; in majoribus enim Animalibus, quorum sanguis longius trajici, & fortiore motu urgeri postulat, ven-

tri-

triculi Cordis carneis fibris, & parvis quasi musculis, multifariam hinc inde protensis, intus firmantur, atque in scrobiculos varie finduntur, quòque grandiora Animalia sunt, eò majores atque pauciores istæ fibræ carneæ reperiuntur, sed scrobiculi altius imprimuntur. In humano autem Corde fibræ minores sunt, sed perplexa & multiplici serie disponuntur, & supra quam in aliis omnium Cordibus, quæ hæcenus mihi videre licuit, numerosiores existunt: quarum seriem atque ordinem exhibet *Tab. 5. Fig. 1.* in qua sinistri ventriculi interior sinus explicatur, in qua

a a a *Vena pulmonalis recte ante ingressum Cordis explicatur.*

b *Auricula sinistra Cordis.*

c *Foramen ovale, per quod sanguis à Vena Cava recte ante sinistri ventriculi ostium influit.*

dd *Duæ membranæ mitrales.*

ee *Carneæ columnæ ex utroque ventriculi latere protuberantes.*

f Ba-

f *Basis Cordis, ubi sanguis è vena pulmonali in ventriculum influit.*

g *Locus sub membranis mitralibus, ubi emittitur in Aortam.*

h *Conus Cordis.*

iiii *Fibræ carneæ hinc inde per totum interioris ventriculi ambitum attextæ.*

Porro, ut in majoribus brutis ventriculi Cordis majoribus intus fibris quam in Homine donantur, ita auriculæ quoque, nempe in equo & bove, largioribus fibris, veluti digitis huc illuc protensis, in diversa spatia distinguuntur, quibus contractis, latera illarum ad exprimendum sanguinem mutuo contrahuntur: Quin& de cæteris ventriculorum fibris nulli dubium esse debet, quin motui Cordis & lateribus ejusdem constringendis inferviant.

Uti vero fibræ istæ carneæ ad Cordis parietes constringendos plurimum conferunt, ita quo arctius hoc fiat, & internæ ventriculorum partes sibi magis

gis appropinquent, fissuræ istæ five sulci in animalium grandiorum Cordibus apprime conducunt; neque enim lævis & æqualis intus superficies idem pateretur: quocirca hujusmodi interstitia five fissuræ in ventriculo potissimum sinistro occurrunt, utpote quæ huic solum necessariæ, atque ex ulu esse videntur; quippe cum parenchyma ventriculi sinistri ex fibris oblique circularibus præcipue confletur, atque undique in sese velut in circumulum constringatur, non potuit tam prope, & in ambitum tam arcte contrahi, nisi excavati intus sulci & rugæ hujusmodi motui locum accommodarent, Ventriculi autem dextri paries cum multo tenuior, & sinistri quasi appendix, ejusdem lateri attextus sit, motuque tantum semicirculari coarctetur, in eo tam profundæ foveæ non admodum requiri videbantur: verum, cum propter lateris tenuitatem ab irruente sanguinis torrente, aut suppressum Cordis motum à nimia ejus copia, ultra

ultra debitum tonum distendi eousque possit, ut fibræ ejus sese constringere iterum & restituere non valeant, (quod in sinistro ventriculo propter parietis robur & crassitiem neutiquam timendum est) in dextro hujusmodi incommoda quo melius præcaveantur, carneus quidam Musculus rotundus & satis validus circa mediam ipsius regionem a septo Cordis in latus oppositum porrigitur, ut in Corde ovillo, bovino, aliisque videre est; in Humano autem Corde duæ vel tres carneæ hujusmodi fibræ plerunque reperiuntur, quarum usus, si non adducendo ejus parieti, at saltem ne nimis distrahatur, plurimum conducit.

Cordis interna facie hunc ad modum explicata, jam nobis dicendum est, de papillis & columnis carneis, valvulisque ad diversa Cordis ostia sitis, tum qua id sanguinem à venis excipit, tum qua eundem in arterias expellit.

Quæ in dextro ventriculo occurrunt papillæ, sunt carunculæ quædam teretes

retes & oblongæ, è lateribus ejusdem
 excrescentes & sursum porrectæ, è
 quarum summo apice fibræ quædam
 tendinosæ procedunt, & membranis,
 quæ à figurâ Tricuspidēs dictæ sunt,
 annectuntur. Membranae autem istæ,
 circa marginem hujus ventriculi exor-
 tæ, undique ostii ejus limen cingunt,
 adeo ut cum mucro Cordis in omni
 Systole versus basin adducitur, papil-
 læ quoque sursum motæ fibras suas,
 quasi lora multum relaxata, remittant;
 quo fit, ut membranae quoque, quibus
 alligantur, laxè pendentes à sanguine
 in omni Cordis Systole expresso, quasi
 vela vento impleta, sursum propel-
 lantur, proindeque ostium illud Cor-
 dis tam accuratè occludant, ut liquoris
 ne una guttula in auriculam refluere
 possit, sed in pulmones, quâ data por-
 ta, totus expellatur: verùm, ut in omni
 Systole Cordis, cono ad basin propius
 adducto, papillæ fibras suas mul-
 tum relaxant, ita in diastole conus ite-
 rum recedens, papillas earumque fibras
 se.

secum simul deducit; unde fit, ut membranae quoque detractae ostium Cordis protinùs recludant, & sanguini ab auriculâ impulso fores quasi aperiant.

Atque hæc ita fieri, & in omni Cordis systole ac diastole hanc esse actionem & munus valvularum, satis constat; verùm agendi rationem & perficiendi modum non nisi ex situ & structurâ papillarum, quibus alligantur, ita facile est concipere; nam licet certissimum sit, membranas tricuspidēs à sanguine sursum in Systole regurgitante eousque, veli instar, inflari, donec ventriculi orificium prorsus obturent; quo tamen modo, & ex qua partium conformatione hoc contingat, observatu dignissimum est. In his vero tribus rei totius ratio, & machinae artificium consistit.

1 Quod papillæ extra lateris interni superficiem longius eminent & protuberant.

2 Quod non in eadem omnes, sed in diversâ lateris parte, sitæ sunt.

3 Quod

- 3 Quod papillæ in latere membranæ, quibus alligantur, opposito constitutæ sunt.

Nimirum hoc situ & fabrica papillarum efficitur, ut membranæ aliquanto semper spatio à lateribus ventriculi distantes, primo quasi ictu sanguinis, in omni Systole sursum percussæ, facile attollantur; cum enim, remissis papillarum fibræ, tam laxæ & transversim fere in medio ventriculo pendeant, fieri non potest, quin à regurgitante sanguine, & intra ambitum ipsarum excepto, non aliter quam vela vento, impellantur, & quouique lora remittunt, explicentur; illis autem eoque * 15cedere à Natura datum est, donec membranæ undique extensæ orificium ventriculi omnino occludant.

Verum eadem fibræ, si immediate ex ipsis lateribus ventriculi orirentur, utique membranæ interno parieti Cordis propius accubantes sanguinem retro excipere, atque ab eodem sursum attolli non possent, sed eadem, qua

influxerat, via iterum expelli paterentur.

Papillarum vero usum atque rationem melius intelliget quispiam, si carneas columnas è lateribus finistri ventriculi extuberantes, atque eidem prorsus officio destinatas, attente perpendat; non enim ad motum factæ sunt, aut membranas sibi annexas contrahunt, (quod ostiolum Cordis apertum potius retineret) sed ideo solum constitutæ sunt, & extra reliquam interni ventriculi superficiem in tantum eminent, ut membranas à lateribus ventriculi satis distantes teneant, quo facilius à sanguine ab infra suffuso repulsæ orificium illud Cordis, cui attextæ sunt, prorsus claudant. Quam membranarum sublevationem, & orificii istius inde occlusionem, immisso per ostium, vel conum Cordis siphone, & injecta aqua facile quis imitari poterit, & aperte conspicere, si modo auricula & vena pulmonalis ad basin Cordis prius abscindantur; idemque

que pariter fiet, si Cor aqua fere repletum circa conum comprimatur.

In dextro ventriculo membranæ omnes fibras suas à papillis haud directè quidem accipiunt; illarum tamen ope hoc præstant, ut sanguinis recursum pariter impedian; quippe cum undique contiguæ sint, quam primum membranæ illæ, quæ rectè fibras à papillis insertas habent, à sanguine sublevantur, reliquas quoque, quibus conjunctæ sunt, simul attolli, & à sanguine superius vergente impleri, & distendi necesse est: quod ut commodius fiat, existimare par est, sanguinem in omni diastole in Cordis thalamos injectum inter membranas istas & parietes retro se insinuare, easdemque, quo plenior ventriculi cavitas evasit, eo magis attolli, & quasi sufflari, ut ex aqua ad plenitudinem ei instillata, vel è siphone per apertum ejus orificium injecta, apparet: cui multum etiam conducit, quod fibræ à carneis columnis & papillis porrectæ sanguini pone mem-

branas istas influenti, apertum per spatia sua transitum præbent; præterquam enim quod sanguini, quasi per cribrum succutiendo & miscendo, forte infervire possint, huic insuper usui inprimis destinari videntur, tum ut membranas intra debitos extensionis limites contineant, tum ut sanguini aditum faciliorem patefaciant, quo se undique in penitissimos ventriculorum anfractus & recessus commodius insinuet, coque ad dilatationem Cordis, & valvularum elevationem accelerandam magis conferant; Sanguis enim Cordi immissus & intra fibras receptus, mox ad plenitudinem assurgit, simulque intumescencia sublevando, sibi ipsi hac via exitum præcludit, adeo ut, cum Cor se constringit, sanguinem per patulum orificium in Aortam propellere necesse habeat.

Uti autem sinister ventriculus, quia majori operi destinatur, & fortiore nixu utitur, tum robore, tum parietis crassitie dextrum longe antecellere debuit,

buit, ita carneæ columnæ, ipsiusque fibræ & membranæ ob eundem finem dextri ventriculi consimilem apparatus magnitudine atque firmitate longe superant; quippe, uti Systole sinistri ventriculi multo fortius vibratur, ita robustioribus hujusmodi machinis opus fuit ad sustinendum sanguinis impetum, eumque per Aortam dirigendum. Sanguis autem, postquam per arterias eruit, ne quacunque de causa denuo eadem via in Cordis sinus regurgitare possit, membranæ tres, à figura *semilunares* dictæ, ad utrumque Cordis ostium, tum qua sanguinem in Pulmonem, tum qua in Aortam expellit, constitutæ sunt, quæ à sanguine represso, si quando id fieri contingat, explicatæ, adeo arcte sibi mutuo adaptantur, ut arteriæ canalem prorsus obturent; ut ex abscisso fere ad radicem arteriæ trunco, & aqua vel spiritu immisso, luculenter patet: quas prorsus laxatas, & sanguini emisso cedentes *Tab. 4. Fig. 3.* exhibet, in qua.

aa *Pars sinistri ventriculi aperta.*

bbb *Tres valvulae semilunares laxè concidentes, ut sanguini erumpenti exitum præbeant.*

c *Aortæ truncus apertus.*

dd *Duæ arteriæ Coronariæ immediate extra valvulas semilunares exortæ, singulari trunco discedentes.*

ee *Radix Aortæ, ubi cum tendine Cordis unitur.*

ff *Membranae mitrales divisæ, & utrinque reflexæ, ut valvulae semilunares in conspectum veniant.*

Ex quo valvularum situ satis constat, quam facilem ejecto sanguini exitum præbeant; quantum vero eidem, si regurgitare contigerit, reprimendo inserviant, ex *Tab. 4. Fig. 4.* etiam constabit, in qua ob oculos ponuntur ad.

aaa *Aortæ truncus ad radicem abscissus.*

bbb *Tres valvulae semilunares arte mutuo sibi accedentes, & pleno quasi ore sanguinis recursum obstruentes.*

cc

cc *Duæ arteriæ Coronariæ.*

Cordis domicilio ita per omnes partes & recessus lustrato, ut in more positum est, ita è re quoque erit invisere, quali apparatu sanguini ad illud confluere, & mox discessuro, ductus & via sternatur.

Igitur limen auriculæ dextræ, nempe ubi Vena Cava ascendens cum descendente congressa alveum suum in auriculam Cordis exonerare parata est, tuberculum quoddam à subjecta pinguedine elatum, & notatu valde dignum occurrit, cujus obtentu sanguis per Venam descendentem delapsus in auriculam divertitur, qui alioquin in Venam ascendentem illapsus sanguinem, per istam Cor versus assurgentem, reprimeret valde, & retardaret; & quoniam in erecto corporis situ atque figura majus inde periculum immineret, ideo Vena Cava in humano genere hoc majus, & longe eminentius obtinuit, adeo ut, si digitum alterutri trunco immiseris, in alteram vix per-

tingas; ut ex *Tab. I. Fig. I.* ostenditur, in qua exprimuntur ad

a *Venæ Cavæ truncus recto situ descendens.*

b *Truncus Venæ Cavæ recta ascendens.*

c *Tuberculum recte inter utramque intercedens.*

d *Auriculæ ostium.*

e *Foramen Ovale.*

f *Cor in lævum proprio situ recumbens.*

g *Vena Coronaria.*

In quadrupedibus autem, nonnullis (Ove nimirum, Cane, Equo, Bove,) ubi cursus sanguinis ab alterutro corporis extremo æquabilior, & quasi in plano est, & propter Cordis dependentis molem, atque pondus, uterque Venæ Cavæ truncus aliquantulum versus Cor declives sunt, licet tanto diverticulo opus non sit, omni tamen non prorsus destituitur; ut ex *Tab. I. Fig. 2.* apparet, in qua depinguntur ad

a *Venæ Cavæ ascendentis truncus.*

cus.

- b *Venæ descendentis truncus.*
- c *Tuberculum utramque Venam distinguens.*
- d *Auricula dextra.*
- e *Foramen Ovale.*
- f *Cordis ostium.*
- g *Vena Coronaria.*
- h *Cor ipsum vasis suis dependens, sed à pulmonibus in hoc situ sustentum.*

Porro ne sanguis hic in confluvio æstum aut gurgitem faciat, dum auricula contracta liberum ei ingressum non concedit, ideo Vena Cava hic loci in majoribus Animalibus, tam Homine, quam Brutis, tota circumcirca musculosa est, tum ut Venæ truncum intra justos extensionis limites coërceat, tum etiam ut sanguinem, quem sinu suo complectitur, in auriculæ amplexum continuo, & validius urgeat. Quem ut auricula arctius comprehendat, & in Cordis ventriculum ulterius propel-
lat, fibræ ipsius internæ à radice auri-
culæ,

culæ, ubi basi Cordis conjungitur, recta extrorsum versus Venam Cavam porriguntur, sanguinemque ab illa suggestum in se rapientes, quasi digitis complectuntur, & mox Cordi tradunt: & profecto fibræ istæ in auriculis majoris Animalis, Equi nimirum, & Bovis, simiarum digitos mole sua æquant, atque officium procul dubio idem exsequuntur.

Et uti ante dextri ventriculi limen protuberantia ista, in Venæ Cavæ ascendentis cum descendente congressu memorata, impedit quominus sanguis ab illa defluens alium ab illa ascendentem decubitu suo deprimat; ita extra sinistri ventriculi ostium non minore artificio cautum est, ne sanguis, qui cum impetu projicitur, in has aut illas partes inique distribuatur; cum enim ostium illud Cordis sursum recta aperiatur, si canalis, qui primum sanguinis impulsu excipit, recta pariter ad capitis regionem duceret, fieri non posset, quin rapide nimis sanguinem in Cerebrum suffun-

suffunderet, & per vibrationis impetum ampliari sensim, adeoque partes inferioris corporis vitali suo genio & pabulo fraudare necesse haberet: quod incommodum ut divinus Artifex prorsus evitaret, in Animalibus, quorum Corda fortius moventur, Aortæ truncum (qui Cordi proximus est) adeo affabre contexit, ut sanguis in arterias axillares & cervicales non recta, sed ambitu velut factò, incurrat; nam in medio inter ventriculum & arterias istas spatio, Aorta (vario tamen in diversis discrimine) plurimum inflectitur; quo fit, ut incurvatus iste angulus sanguinis ejecti impetum, & primum ictum sustineat, & maximum ejus torrentem versus Aortæ truncum descendantem dirigat, qui aliter superioribus arteriæ Aortæ ramis nimius impenderetur, easque plus fatis distenderet, & impetu suo Caput cito pessundaret; quæ omnia plene exhibet *Tab. I. Fig. 4.*, in qua ostenduntur ad *a Aortæ Humanæ radix.*

- b *Truncus ejus descendens.*
- c *Angulus, ubi incurvatur.*
- d *Arteria Axillaris dextra.*
- e *Arteria Cervicalis dextra.*
- f *Cervicalis sinistra.*
- g *Axillaris sinistra.*
- h *Duæ Arteriæ Coronariæ.*

In qua Figura Aorta, in [c] incurvata, sanguinis à Corde projecti impetum, & torrentem in truncum descendentem plurimum reflectit; ne vero totus illac propellatur, arteriæ Axillares, & Cervicales intermediæ eo modo constructæ sunt, ut præterfluentis sanguinis partem debitam necessario excipiant; quippe latus arteriæ cujuslibet dextrum sinistro multo elatius est, unde liquoris in majore trunco transfusi pars aliqua intercipi oportet; ut è *Tab. 1. Fig. 5.* facilius concipietur, in qua delineantur ad

- aaa *Pars arteriæ cujusvis dextra
& elatior, quæ excipit.*
- b *Angulus Aortæ incurvatus.*
- ccc *Latera arteriarum demissa,
quæ*

*quæ sanguinem præterfluentem
intercipiunt, & ad quæ sanguis
alliditur.*

d Canalis Aortæ descendens.

Si vero arteriæ istæ ex utroque latere æque recta discederent, sanguis fere totus illibatus earum ora præterlaberetur, uti *Tab. I. Fig. 6.* ostendit, quam apponere visum est, quo prioris ratio melius percipiatur.

Antequam vero Cordis Musculum de manu dimittamus, superest, ut advertamus, ~~quod~~ in Foetu adhuc in utero concluso, (ubi respiratio libere fieri non potest, & proinde totus sanguis per pulmones pertransire necesse non habet) provide cautum esse, ut maxima pars ejus alia via transferatur; quippe in Foetu nondum excluso immediate infra tuberculum illud, nuper memoratum, foramen (Ovale dictum) in venam pulmonalem proxime adjunctam, recta ante sinistri ventriculi fores, aperitur, per quod maxima pars sanguinis, à Vena Cava reducti, im-

me-

mediate ante dextri ventriculi limen in venam pneumonicam infusa, cum reliquo sanguine, à nutritione pulmonis redeunte, simul in sinistrum ventriculum demittitur: ne autem eadem via redeat, membrana quædam undique foraminis ejus limbo, nisi in parte infima, attexitur, & tanquam velum infra ostii ejus infimum ambitum in venæ pulmonalis trunco laxè dependet, adeo ut sanguini è Vena Cava affluenti facile cedat, & fores quasi ultro pandat; ex adverbo autem latere si sanguis è vena Pulmonali in Venam Cavam remeare forte urgeatur, membrana ista primo sanguinis appulsu venæ pulmonalis lateri arctè applicatur, adeoque incursum ejus omnino repellit, non absimili prorsus modo, ac ductus Ureteris inter duplicem Veficæ tunicam perforatus, liberum & apertum urinæ influxum dat, refluxum vero omnino prohibet. Et quoniam sanguinis reliqui, in ventriculum Cordis dextrum influentis, & ab illo in
ar-

arteriam pulmonalem ejecti, copiam omnem per pulmones adhuc pertransire nulla cogit necessitas, ideo ad partem ejus à pulmone divertendam canalis insuper arteriosus ex arteria pulmonali in Aortam ipsam aperitur, unde sanguis, è dextro ventriculo expulsus, magna ex parte per istum canalem in Aortam trajicitur, atque una cum reliquo sanguine in totum corpus dispergitur; quum autem Foetus excluditur, & respirare incipit, foramen & canalis iste, utpote quibus nihil ultra opus est, sensim & in dies coalescunt, donec hoc tandem penitus occludatur, ille in ligamentum impervium paulatim degeneret; cujus foraminis & membranæ figura ex *Tab. 1. Fig. 3.* apparet. in qua

a a a Limbus foraminis Ovalis, ad quem membrana ista attexitur.

bb Eadem membrana, infra foraminis orbitam dependens.

c Sanguis è Vena Cava affluens.

d Ubi idem in venam pulmonalem influit.

eee

eee *Locus, ubi membranam repellit, & per apertum quasi ostium incurrit.*

Cordis descriptione jam tradita, sequitur, ut varia ejus discrimina in diversi generis animalibus, avibus, piscibus, serpentibus, ranis, reliquisque minorum gentium animalculis, recenscam, eorumque rationes explicem: verum cum tantus sit eorum census, ut tædio majore, quam fructu, enumeranda sint, sufficiet potiora eorum phænomena, & quæ ad Cordis in perfectioribus animalibus historiam elucidandam maximopere inserviant, hîc loci commemorare. In Avibus ergo, ut columba, gallina, pullo gallinaceo, anser, aliisque, Cordis fabrica similibus omnino fibris, iisque pro proportionæque magnis, ac in grandioribus animalibus, contextitur; licet enim exterius septi transversî latus, quod ventriculo dextro proximum est, lævem & æqualem faciem exhibeat, at interior reliqui & extimi lateris pars tota fibrosa est, quin

quin & valvulis semilunaribus, quàm in Pulmonem & Aortam utrique ventriculi patent, ambo donantur; in orificio autem, sive ingressu in ventriculum dextrum valvulæ tricuspides omnino desunt, sed illarum vice recte super ostium ventriculi, qua auriculam respicit, carnea quædam valvula dependet, figuræ prorsus semilunaris, quæ quidem versus Cordis conum patula semper sanguinem, in omni contractione suffusum, pleno & aperto semper ore mox excipit, & quo magis repletur, eo arctius ventriculi orificio incumbit, reliquique sanguinis ibidem effluxum prohibet: quanquam autem dexter ventriculus ex uno latere planus & lævis sit; sinister tamen in omni Volucrum genere, quantumcunque parvi fuerint, ex omni parte fibrosus est, carneisque columnis extra reliquas fibras eminentibus, quin & valvulis mitralibus, adeo affabre constructis donatur, ut nihil sanguinis in pulmones remitti sinant; jucundo

E enim

enim spectaculo constat, si cono Cordis ablicisso aqua è siphone in ventriculum injiciatur, membranas istas quasi sufflatas, mox extumescere, & arctissime sibi undique occurrentes, ostium illud Cordis penitus præcludere, adeò ut quacunque vi atque impetu aqua injecta fuerit, nihil præterfluere patiantur, sed illa per Aortam tota exiliat.

Et ut in minoribus hisce, ad sanguinem reliquo corpori distribuendum, partis hujus conformationem, æque ac in majoribus animalibus, perfectam esse constat; ita dubitandum non est, in minimis omnium Naturæ productis nunquam omnino desiderari, sed Corde licet biventre non gaudeant, simplicitatem non prorsus destitui; cujus tamen fabrica cum oculis non adeo obvia sit, de ea amplius non differam.

CAPUT II.

Cordis Motus.

IN priore Exercitatione satis fuse egimus de Situ, & Structura Cordis, unde

unde fabricam ejus perfectissimam, & supra omnem humani ingenii captum vario apparatu & arte conformatam esse constitit. Quis autem, qualisque machinæ hujus admirandæ Motus, Ululque sit, jam ostendendum est.

Nobilis igitur hæc Cordis compages, uti ex vario fibrarum ordine Musculi nomen apud *Hippocratem*, & antiquos Medicos obtinuit, ita motum ejus pariter Muscularem esse, *Insignissimus Harvejus* ex Vivorum dissectione recte observavit; nam cum *ex omni parte tendi, & secundum omnem fibrarum ductum constringi, erigi, minorari, & durescere in omni motu illi* videretur, quidni actionem ejus cum reliquis musculis communem esse pronuntiaret? id quod *Cap. 2. de Motu Cordis* his verbis videtur asserere: *Musculi enim, inquit, cum moventur, & in actu sunt, vigorantur, tenduntur, ex mollibus duri fiunt, attolluntur, & incrassantur, & similiter Cor.* Postquam igitur *Harvejus* Cordis motum

data opera tam accurate observavit, ipsumque cum maximo vigore atque impetu vibrari docuit, miretur forte aliquis, *Gl. Cartesium, Hogelandum*, aliosque Celebres Viros (sive quod robustam Cordis fabricam, magnosque ejus in omni Systole nixus, sive celerem sanguinis motum non satis attente perpendissent) dubitasse, utrum Cor seipsum moveat, an potius à sanguine moveatur: quippe cum diversos liquores chymice præparatos, atque commissos, magna partium lucta atque effervescencia ebullire, intumescere, & , nisi libero aëri exponantur, vasa, quibus continentur, diffringere observassent, mutato vix nomine de sanguine eandem fabulam narrarunt; & quo facilius hæc sententia fidem obtineret, fermentum quoddam nitro sulphureum in Cordis ventriculis, præsertim sinistro, hospitari docuerunt; Sanguinem autem particulis heterogeneis, & valde fermentativis saturatum, quamprimum hujusmodi fomitem attigerit, illico rarefieri, inflari,

ri, ac turgescere, ut jam amplius spatium
 requirens suo potius, quam Cordis,
 impetu in Aortam erumpere, atque
 exilire, necesse habeat.

Verum nec in sanguine talem ebul-
 litionem excitari, nec in Corde hujus-
 modi fermentum adesse facile erit
 ostendere; quamquam enim inter cor-
 pora, quæ ex salibus contraria prorsus
 indole præditis constant, ubi commi-
 scentur, magna effervescentia, atque
 lucta exoritur, multaque effluvia dis-
 cedunt; dissimilis tamen omnino, &
 magis benignæ naturæ sanguinis li-
 quor existit, quam aut in Corde, aut
 vasis suis tam æstuose & subito effer-
 vescat; quippe novimus, quam mitis
 ejus liquor, quam benigno plerumque
 succo perfusus, quam lenis & placidus
 ejus in venis versus Cor refluxus, atque
 ubi exitus ei aperitur, & in vascula ex-
 cipitur, quam cito, instar lactis con-
 crescat, & nullum ebullitionis, aut lu-
 ctæ indicium prodat.

In Corde autem hujusmodi fermentum

tum dari, qui contendunt, unde illud continuo suppeditetur, ostendere debuissent; si enim arterias Coronarias, ubique in Cor distributas, in ventriculos ejus succum quendam effundere dicant, advertere oportet, membranam ventriculi interiorum adeo imperviam esse, ut nihil in cavitatem ejus penetrare patiatur; ex tinctura quavis arteriis istis vi injecta, manifesto appareret. Si autem à particulis sanguinis, inter sulcos & fissuras ventriculorum delitescentibus, fermentum hoc provenire, atque instaurari asserant, certum est, scrobiculos & sulcos istos ad accuratorem ventriculi constrictionem factos esse, ut supra dictum; adeoque in omni Cordis Systole, connivere inter se, & arcte convenire, ut nulli prorsus appareant, nec quenquam reliquiis sanguinis recondendis locum aut spatium relinquant.

Quinimo tantum abest, ut ebullitio sanguinis in Corde, si qua daretur, ad motum ejus quicquam conferret, ut
illi

illi prorsus obesse, atque adversari videatur; quippe Diastole non ab intumescencia sanguinis ventriculorum parietes distendente, sed partim ex pondere & quantitate ejusdem ab auriculis injecti, nec non motu restitutionis ex parte provenit, ideoque Cordis Diastole suam, atque auricularum Systolem alternis vicibus excipit. Ad Systolem vero Cordis perficiendam, ebullitionem non convenire, exinde constat, quia cum motus ejus expansivus sit, ad diducendos potius, quam contrahendos, ejus parietes inserviret.

Præterea, quæ ebullitio tam regularis, aut æquis vicibus, aut quæ tali orgasmo agitetur, ut possit tanto impetu liquorem è Corde in remotissimas corporis partes (& ultra longe, si exitus daretur) ejaculari? quinimo si sanguini suus motus debeatur, quid opus Corde tam fibroso, & tot Nervis instructo? cum simplicioribus, & planis intus ventriculis formari potuisset, si sanguinem solum excipere, eundem autem

non expellere, natum esset.

Deinde si copiam sanguinis, qualibet diastole in ventriculos Cordis immissam, perpendamus, nullus in Corde locus hujusmodi ebullitioni aptus, aut satis amplius reperietur: neque enim sanguis ex auriculis guttatim depluit, uti *Cartesio* aliisque visum est, sed tanta ejus copia ab auriculis immittitur, ut tota Cordis capacitas penitus expleatur; quantumcunque autem in se qualibet Diastole excipiat ventriculus, proxima Systole expellit totum, ut infra clarius patebit. Porro, cur in sinistro potissimum ventriculo fermentum hospitari, & ebullitio longe spumosior excitari dicatur; quare non in dextro pariter ventriculo, cum utriusque eadem actio sit, atque fibrarum crassitie & robore solum ob causam supra traditam discriminentur; denique quare non in auriculis præcipue, quarum motus primarius est, quæque Cordi non tantum primos ad motum impetus, sed & fomittem continuo subministrant, sane
nec

nec video, nec rationem reddi posse existimo.

Præterea, brevem nimis in Corde moram trahit sanguis, quam ut ab illo tantam ebullitionem concipiat, quippe nictu oculi citius per ventriculos ejus transit, ut pulvis pyrius accensus non citius deflagret; cui etiam accedit, quod sanguis ex arteria emissus nullo modo rarefactus, aut spumofus, si vasculo prope admoto excipiat; sed venoso consistentia, & pondere, & per omnia, præter colorem, non absimilis cernatur.

Denique motum Cordis à sanguinis ebullitione nullo modo dependere, hoc ipsum arguit, quod Cor viventi animali detractum, & omni sanguine depletum, vel in frustula divisum, nondum tamen à motu cessat; quodque animalium juniorum Corda longo tempore, postquam è pectore excissa sunt, si leviter acicula irritentur, statim pulsus suos repetere, eosque diu continuare satis notum sit; quin & anguilla-

rum Corda, similiter acu stimolata, pluribus horis, postquam exempta sunt, iterum pulsare animadvertantur; utpote quarum spiritus in materia magis viscosa irretiti, atque implicati tam cito avolare non possunt.

Verum ut experimento mihi constaret, utrum sanguinis ebullitio ulla omnino aliquid ad sanguinis motum conferret, experiri subiit, an detracto sanguine, aliisque liquoribus, qui minus rarefieri, aut ebullire apti sunt, paricopia per venam suppeditatis, Cor interea motum suum nihilominus continuaret: itaque sanguinem è vena jugulari Canis, fere ad totius massæ dimidium detraxi, injecta per vices in venam cruralem pari cerevisiæ cum paucovino mixtæ quantitate, & hoc alternis vicibus toties repetii, donec loco sanguinis pallidior solum tinctura loturæ carniû, aut clareto plurima aqua diluto, similis è vena proflueret, Corde interim de pulsu pristino paululum tantum remittente, adeo ut Canis totum fere san-

sanguinem cum cerevisia, priusquam vitam cum morte, commutaret.

At quoniam facilius est experimentum, quam fidem facere, historiam hanc unicam, quam à Medico fide dignissimo accepi, addere libet: Adoleſcenti 16. annos nato, cum magna sanguinis copia (qua de causa non referebat) per biduum continuo erumperet, neque medicamentis, aut arte ulla cohiberi potuerit, jusculis eum reficere & recreare amici & astantes curarunt; cumque ea valde avide expeteret, atque assumeret, fluxus subinde concitator factus est, & tandem res eo devenit, ut, massa sanguinis fere tota effluxa, quicquid jam efflueret, dilutum & pallidum, sanguinis neque naturam neque speciem præ se ferret, ipsi jusculo, quod toties hauserat, quam sanguini similis; atque eadem forma per diem unum aut alterum duravit hic aqueus fluxus, constante interim Cordi motu suo, donec fluxu demum confopito, Juvenis paulatim integræ salutis

ti restitutus est, & exinde in virum robustum & quadratum excrevit.

At priusquam ultima huic argumento janua claudatur, advertere oportet, duo *Harveji* observata posse hic, & solere objici, Sanguinem ante formatum Cor, & post idem emortuum moveri, unde facile arguitur, motum ipsius non posse à Corde dependere; verum hisce in promptu est referre.

I. Quanquam agnoscendum sit, vitalem illam guttulam in cicatricula hospitantem, calore incubatus excitatam, se expandere; id tamen dicendum est, membranæ eam continentis beneficio deberi, quæ intumescentem illam guttulam reprimat simul ac coërceat; cum enim liquor ille feminalis, intra cicatriculam contentus, à calore externo diu fovetur, spiritus in eo latentes sese quaquaversum explicant, atque partim in membranam continentem impingunt, partim, pro explicando sibi spatio, membranam illam distendunt, quæ,
cum

cum locum satis amplum concedere non possit, quo se à tensione ista liberet, seipsam contrahit, & constringit: quo fit, ut liquor intro compulsus, exitum quærens, viam sibi faciat, atque canalem procudat; atque ad hunc modum ipsa vitæ nostræ primordia, & corporis stamina ortum ducere videntur: cumque omnis insuper motus muscularis in contractione positus sit, non tam ab ebullitione illa, sive partium spirituosarum in ista guttula expansione, quam à vesiculæ istius Systole, motus hujus principium provenire putandum est; quippe quæ vesicula ipso sanguine prior erat; & postea, ubi in sanguinem mutatur iste liquor, & actuat, simul ea motus suos exerit: vesicula enim pulsans ab ipso principio, liquoris in sanguinem mutati, non tantum conceptaculum, sed & machina motiva est, qui sanguis hujus nixu, & beneficio extra cicatriculæ ambitum se profert, & arterias, pro dilatando sibi spatio, venasque pro reportando

pa-

pabulo, procudit.

2. Quod ad undulationem istam sanguinis in Vena Cava post emortuam auriculam attinet; arbitror, illam nullo sanguinis intestino motu, sed vasorum, à spiritibus per nervos ubique distractis, corrugatione contingere; non aliter, quam spiritus in musculis ubique oberrantes, motum illum tremulum post mortem diu protrahunt: atque hætenus de fermento hoc, quod in Cordis ventriculo, potissimum sinistro, imaginantur nonnulli, quod sanguinem affluentem ebullire faciat. Sequitur aliorum, quæ ad hanc proxime accedit, sententia perpendenda, qui Ignem quasi Vestalem quendam in Corde constituunt, qui immissum sanguinem sic accendat, ut in arterias statim exilire debeat; parum abest enim, quin sanguinem, per vices influum, à Cordis igne non aliter accendi, & statim prorumpere opinentur, quam si ventriculi ejus candentes prorsus essent & igniti, & sanguis, velut pulvis pyrius à primo
ignis

ignis contactu in flammam accendi aptus; quod quantum à ratione absit, mox expendemus.

Præterquam enim quod arduum est concipere, Sanguinem eoque rarefieri, ut in Cordis ventriculos unaquaque diastole dilapsus, tam subito solutis omnibus particulis, veluti pulveris pyrius accensus, in vasa exiliat, (quod nulli liquori concessum est:) hoc accedit, quod Cordis pulsus multo celerior est statim à pastu, & pleniore potu, dum chylus adhuc crudus, & proinde rarefieri minus aptus, cum reliquo sanguine Cordis ventriculos pertransit.

Tantum etiam abest, ut credam, sanguinis motum à sua in Corde accensione ulla dependere, ut nec Cordi calorem suum jure aliquo debere videatur; quanquam enim Cor pro caloris fonte, (unde calor in totum corpus emanat,) recte satis agnoscendum sit, non ideo tamen in illo solo calorem istum excitari, aut sanguinem ab illo
tan-

tantum incalescere , verius forte dicetur , quam aquas thermarum à balneo , ubi erumpunt , & non ab intestino partium æstu , quas in visceribus terræ in transitu lambunt alluuntque , calorem suum concipere ; nihil enim in Corde est , quod tanto calori producendo sufficiat : constat utique , Cor ex se non calere ; sed quemadmodum sanguine per arterias in se deposito omnino alitur , ita quoque ab eodem foveri desiderat : *Tam enim intensum calorem , (uti Veltbusius dicit ,) in Corde reperi-ri , qui vi sua , & calore proprio , in affuso sanguine tam subitam & fortem ebullitionem excitet , non est verisimile ; neque ea Cordis firma & constans partium constitutio , ut tot annos ferendo sit tam acrem calorem : Non experimur etiam digitis in Cor animalis dissecti , & adhuc viventis immis- sis , tam intensum calorem ; nec etiam pinguedo , quæ circa Cor est , in tantam duritiem posset concreescere .*

Cordi itaque non magis tribuendum est ,

est, quam vasis & visceribus omnibus, iisque præcipue, quæ in pectoris, & abdominis claustro conclusa sunt, quod sanguis tantopere incalescat; quippe, uti sanguinem in extremis partibus, ubi externo aëri fere nudus, & expositus fertur, refrigerari accidit; ita pariter certum est, ubi in pectoris & abdominis cavitatem recipitur, in locis adeo conclusis protinus incalescere; atque hinc est, quod homines obesi, & pingui aqualiculo donati, quorum vasa sanguifera profunde magis, & quasi in carne sepulta, latent, præ macilentis frigoris patientes sint; quanquam Corda hujusmodi præpinguium hominum non adeo vegeta sint & robusta, ac illorum, qui magis sunt graciles, & strigosi.

Sanguini itaque in totum debemus, quod Cor ipsum caleat, quod corpora nostra calore suo actuet, & vivificet: concedimus tamen, licet major illi calor, quam cæteris Musculis, à Natura datus non sit, in quantum tamen

continuo motu, & in loco adeo concluso, indefinenter exercetur, præ cæteris corporis membris calore magis constante, & vegeto donari; unde forsitan fit, ut sanguinem in se receptum aliquantulum à contactu suo magis adhuc foveat, calefaciatque.

Quibus rite perpensis clarum fore arbitror, nec motum Cordis à sanguinis ebullitione, nec sanguinis calorem à Cordis foco ullo omnino dependere.

Cum ex præmissis satis constiterit, motum Cordis non dependere à sanguine, proxime dicendum venit, quibus is instrumentis, & machinis perficiatur.

Ea autem sunt vel *proxima*, quæ motum ejus immediate perficiunt, vel *remota*, quæ ipsum adjuvant.


Quæ motum ejus perficiunt; ab ipso Corde proxime petenda sunt; quippe in illo ipso partes motui ejus cingendæ peres, atque accommodas adesse omnes, exinde constat, quod nullus
mu-

CAP. II. CORDIS ANATOME. 83

musculus iis instructior sit ; Nervis enim copiose ei insertis, & per totam ejus superficiem dense explicatis, ipsum inspirari, fibris quoque omne genus, quaquaversum intertextis, & undique complicatis firmari, atque tendinoso margine basin ejus cingi, clarum & obvium est ; nec in animalis vel minimi Corde, cujus fabrica oculi aciem non eludit, istorum quicquam omnino deesse, aut desiderari videtur.

Qui machinæ apparatus certo demonstrat, Cor prorsus Musculum esse, motumque cum reliquis Musculis omnino similem sortiri : quo autem Cordis motum clarius explicemus, à simpliciore Musculi recti motu, tanquam reliquorum omnium norma, ordiemur.

Musculus igitur rectus, uti ex duplici tendine, cum fibris carneis intermediis, oblique utrinque in eo insertis, constituitur ; sic fieri non potest, quoties fibræ illæ in se contrahuntur, quin tendines oppositos propius sibi ad-

ducant, unde fit, ut ossa aut membra, quibus annectuntur, earum contractioni simul quoque obediant, proindeque arctius sibi mutuo accedere debeant, quod ipsum fibrarum corrugatio in cocto vel assato musculo (aut etiam crudo, si microscopium adhibeas) aperte demonstrat; quippe quæ à se invicem, & à tendine utrinque liberatæ in certos ordines, velut in hunc modum , contrahuntur, probabili indicio, similiter quoque in præstando motu contrahi: & cum fibræ in quolibet nixu suo ita corrugari videantur, dubitari obiter posset, an non earum contractioni cujusque musculi motus, quam simplici inflationi, meliore jure debeatur: quin & si musculi motus inflando fiat, quid impedit, quominus cujusvis musculi fibræ (quæ per tenuissimas solummodo membranarum fibrillas inter se cohærent) à se mutuo diffilentur, atque divellantur, eousque saltem, ut fibrarum distractione

tractio dolorem inferat? cui etiam accedit, quod Musculus ab hujusmodi inflatione extrorsum distentus, vel maxime apparere deberet; verum ex adverso constat, Musculum in omni motu admodum arcte, & in sese introrsum constringi, minorari, & durescere, adeoque modo inflationi prorsus contrario moveri.

Præterea si ab explosione diversæ indolis spirituum, sibi mutuo in Musculo concurrentium, sive ab aëris cum spiritu animali concursu fiat, cum utriusque continuo influant, quidni perpetuo motu partes omnes exerceantur? Et quid Animæ in nos imperium valeat, si solum instinctum motus præstet, & fomiti igniario tantum accendendo inserviat, turbinemque excitet, quem pro libitu suo cohibere rursus non potest? certe vix credibile est, res adeo diversas, saltem in corpore bene constituto, existere, aut invicem committi, quas anima suo nutu non possit coëcere.

Non enim tam sclopeta in nobis explodere existimanda est anima, quam enssem quasi vibrare, & huc illuc varie contorquere, adigere, retrahere, quem & pro placito suo recondere item potest: cum enim motus nostros regere possimus, & quocunque placet gradu moderari, aut prorsus diuque sistere, non video, quare à principio tam violento ejus modum atque causam petere debeamus: verum hæc obiter dicta sunt.

Quoniam vero Cordis Structuram reliquis in corpore Musculis ratione, ut ut non figura, analogam esse & conformem, primus ostensum est, restat, ut motum quoque ejus consimilem esse, & secundum omnium fibrarum ductum peragi, evincam.

Cum itaque motus cujusque Musculi ubique fiat à fibris carneis, oppositos tendines in sese ad medium contrahentibus, & cum ad aliorum normam, Cor ex simili quoque fibrarum ordine potissimum

mum constet, quarum quæ exteriores sunt, à læva dextram versus directæ, undique parenchyma ejus cingunt, complicantque, quæ vero profundius latent, ductu plane contrario feruntur; fieri non potest, ubi fibræ illæ simul contrahuntur, quatenus parietes Cordis undique adducunt, quin spatia ventriculorum intus coarctari multum, & constringi necesse sit, adeo ut non inepte linteo, utrinque ad exprimendam aquam contorto, aut crumenæ, à duplici filo in diversa trahente occlusæ, comparari possit; quippe fibræ in constringendo Corde idem omnino præstant, motumque primario efficiunt.

Quin etiam cum fibræ Cordis aliquot rectæ, aliæque omnes circa conum, & universum ejus ambitum contortæ, obliquo & opposito ductu, spiralibus velut lineis, in basin terminentur, non solum fit, ut, quoties fibræ hæ utrinque contrahuntur, ventriculorum sinus intus comprimant, & angustent, sed ut

conum basi propius adducant : Fibrae enim cum quolibet nixu suo basin Cordis deducere conentur, illa autem à fulcro tam stabili & firmo dependeat, ut attractioni earum nequam cedere possit, fieri nequit, quin mobile ad quiescens accedat, unde tum Cordis compages constrictior fit, tum conus ejus ad basin propius accedit; quod non aliter fit, quam cum in communi lusu, quis de fune pendens, adductis fortiter brachiis sese erigit, & in altum attollit.

Adhæc (ut obiter hoc moneam) cum omnis motus contractione perficiatur, & Cordis fibrae ad constrictionem solum factæ sint, apparet quoque, Cordis motum totum in Systole positum esse; cumque fibrae ultra tonum suum in omni constrictione ejus tendantur, idcirco, ubi nixus iste absolvitur, motu quasi restitutionis Cor iterum relaxatur, & sanguine à venis influente rursus distenditur; à
nullo

nullo enim Cordis motu, nisi tensionem suam remittente, & ab irruente sanguine diastole ejus libratis adeo viribus procedit.

Ex perspecto autem Cordis motu, Auricularum ille facilius agnosci potest; utpote fibræ, utrique auricularum communes, ab una in alteram porrectæ efficiunt, forsan, ut simul motus ineant; at cum fibræ carneæ aliæ in tendinem Cordis communem protensæ sint, aliæ vero in circulum nervosum, Venæ Cavæ proximum, inferantur, quatenus ab oppositis partibus sese invicem trahunt, spatium intus coarctant valde, adeoque sanguinem pariter contentum in Cordis sinus depellunt.

Motum autem Cordis à fibris suis perfici, non alio opus est indicio, aut argumento, quam quod ventriculi ejus, pro vario usu, atque motus exigentia, tanto inter se discrimine, fibras quod spectat, construantur: quippe uti non æquis viribus ad breve, atque ad

longum, iter conficiendum opus est, ita prout sanguis ad minorem distantiam, vel procul projici, & propelli debeat, ventriculi pariter crassioribus, vel tenuioribus, fibris donantur; ideoque sinister ventriculus, ut labore & penso; ita & fibrarum robore, dextrum multum antecellit. Sed licet dextri ventriculi fibræ multo magis graciles & tenues sint, nullo tamen earum ordine destituitur; neque inde putandum est, non omnino, quia non æque fortiter, pulsare, multo minus propter sinistri tantum vicinam moveri: quippe licet dexter sinistro accrescat, & totus ad illum in omni Systole contrahatur, adeoque dimidiatum tantum circulum motu suo describat, non tamen alterius adminiculo, sed propriis fibris hoc perficit; & tantum abest, ut sinister ventriculus ad dextri motum conferat, ut septi transversi latus, quod cavitati dextri ventriculi proximum est, fere semper (præsertim in minoribus animalibus) planum, & læve

læve sit; idem tamen septum, qua sinistri ventriculi cavitatem respicit, totum fibrosum, & altis scrobiculis excavatum est; indicio satis manifesto, ad sinistri tantum ventriculi constrictionem conferre, ut supra monstravi.

Atque ex hac etiam interioris septi fibrosa textura abunde constat, ad ventriculi sinistri motum multum conducere; neque vero aliter fieri potest, cum septum hoc sinistri ventriculi pars sit, fibræque toti ejus circulo undiquaque continuæ, & communes fuerint.

Et cum sulcos istos, & interstitia in septo excavata, ad arctiorem ventriculi constrictionem inservire ostensum sit, patet inde, quam inepte ad sanguinis ab uno ventriculo in alium transitum ista inservire dicantur; cum revera nullibi pervia sint, sed huic solum muneri destinata.

Vidimus jam, quam robusta Cordis fabrica, quam fibris undique firmata sit: sequitur, ut quali vi motus suos exerat, videamus; & revera nemo
ejus

ejus fabricam satis mirari, aut attente
 satis perpendere videtur, qui illud non
 cum maximo vigore, atque impetu vi-
 brari concedit; utpote non solum ex
 sanguine tanta vi projecto, sed & ipso-
 met Corde manu tractato, vel abscisso
 ejus cono, & digito immisso, manifesto
 apparet, maximo illud robore & nixu
 moveri, atque constringi; adeo ut ex
 Systole ejus non solum ventriculos an-
 gustari, sanguinemque ob spatii de-
 fectum exprimi, sed Cor cum impetu
 & vigore vibrari, atque sanguinem ve-
 geto, & valido parietum subsultu, &
 concussione excuti, atque expelli con-
 stet, quin (ut id saltem hoc in loco com-
 memorem) quod Cor à spasmo aliquan-
 do correptum tanto impetu concutia-
 tur, ut costas ipsas perfregisse, singu-
 las ejus Systoles à cubiculo in platea
 procul exauditas fuisse; item, ab assiduo
 thoracis motu, & diverberatione, non
 solum indumenta, veluti flabello, mo-
 titata, verum etiam ipsum sternum ab
 illo motu sede naturali extrusum atque
 ex-

extuberare coactum fuisse, à *Fernelio*, *Foresto*, & *C. Pisone* scriptum est; etiam hoc accedit, quod in equis à longo cursu redeuntibus, singulos Cordis pulsus è longinquo exaudiri solenne sit; quippe sanguis tanta vi & impetu tunc temporis per vasa trajicitur, ut singulos pulsus procul enumerare, atque æque certo edicere possis, ac si digitum salienti arteriæ juxta admoveas; quin & sæpe observavi, in viris non admodum robustis, dum in lecto decumberent, cortinas ad omnem Cordis motum succuti, & accuratum pulsus rhythmum servare.

Quæ cum ita se habeant, opportunum erit inquirere, quomodo Cordi instinctus sui motus adveniat, & unde vis illa, sive robur, accedat, ut per totum vitæ curriculum motum suum indefinenter præstare valeat.

Atque hic de ratione, qua Cordis motus perficiatur, dicendum esset; sed cum nimis arduum sit de ea quicquam rite concipere, atque Dei solius, qui
le-

secreta ejus rimatur, motum quoque cognoscere prærogativa sit, in eo ulterius perscrutando operam non perdam.

Sufficiet itaque hoc in loco advertere tantum, Cordi vim illam, & vigorem, quo sanguinem in sinus suos continua illabentem, pari & constanti passu expellit, à nullo intus contento excitari, sed superne, & velut coelitus, à capite in illud descendere; quoniam enim nobilissimi, atque summe necessarii usus est, ideo pro motu ejus præstando tam sedula & sollicita fuit Natura, ut, præter insignes nervorum propagines, ubique in illud dense distributas, pro continuo spirituum animalium influxu, Cerebellum insuper, quasi perenne eorum promptuarium, ei accommodaverit, à cujus benigna & constante influentia adeo dependet, ut, si spirituum influxus vel minimo temporis momento impediat, motus ejus illico deficiat; nervi enim octavi paris in cervice arcte
liga-

ligatis, aut penitus abscissis (quod animali perinde est,) mirum dictu quanta subito mutatio! Cor, quod moderate antea, & æqualiter motus suos reciprocabat, statim ab injecta ligatura palpitare, & contremiscere incipit, atque ita diem unum & alterum miserum animal Corde tremulo, & pectore admodum suspirioso, languidam vitam protrahit, & brevi tandem exspirat.

Quantas autem Cordis angustias ex præcisione aut ligatura ista mox patiatur animal, satis constat ex immediate consequenti corporis lucta & contentione, quæ tanta, & tam vehemens est, ut, nisi firmis vinculis cohibeatur animal, difficile sit ipsum in eodem loco, aut corporis situ continere.

Cur autem ab hujusmodi ligatura animal non statim exstinguatur, ratio forte hæc est; nempe, quia præter suppetias à nervo recurrente allatas, etiam infra ligaturam illam diversæ propaggines nervosæ, à plexu intercostali, sub ingressum pectoris in nervos octavi paris,

ris, priusquam furculos suos Cordi dimittunt, proximè implantentur, quarum ope pro sustentando debili motu, quousque sanguis fluxilis & tenuis est, spiritus, utut in minore copia, suppeditantur: verum cum propter Cordis languorem & fatiscentiam liquor sanguinis stagnare, & grumescere incipit, subsidiariæ istæ spirituum copiae ad pulsum continuandum diu pares non sunt, ut necesse sit vitam, ob defectum istius motus, tandem exstingui. Hæc ita esse tam certum est, ut nullus dubitem, si nervi isti paulo infra communicationem illam cum nervis intercostalibus ligarentur, quin animal statim syncope, & Cor asphuxia corriperetur; cuius experimentum commode fieri non potest, quia nervorum communicatio illa sub ipsa clavicula fit, & juxta vasa sanguinis majora, ut nec oculis discerni possit, nec digitis explorari.

Cum igitur motum Cordis ab influxu in nervos, ei copiose insertos, solum

lum derivari, ostensum sit, proxime dicendum foret, quot modis, & quibus causis motus Cordis alteretur; quoniam vero, pro magno partium consensu, & sympraxi, Cordis motus plurimum intenditur, & remittitur, ideo ad rem fore arbitror, si prius ostendero, quænam partes illæ sint, & quale præstent subsidium.

Et quandoquidem Cordi proxima est cum pectore & pulmonibus affinitas, eaque necessitudine naturæ mutua ipsorum opera conjuncta sunt, ut neutrum sine altero commode moveri possit, vel diu superesse; cumque pulmones interim nullo suo nisu, sed secundaria tantum opera hoc perficiant, diaphragmati potius, & musculis intercostalibus acceptum referri debet, quod illi liberum aëri commeatum in sanguinem concedant.

Quicquid igitur aut ductum pulmonum intus obstruit, aut ipsos extra nimis comprimit, vel diaphragma & musculos intercostales libere contrahi,

G

trahi,

trahi , & relaxari prohibet , aut valde impedit , Cordis quoque motum simili modo afficiet. Etenim partium istarum affectus , quales sunt angina , pulmonis vomica , tuberculum intus enatum , hydrops pectoris , empyema , paroxysmi spasmodici , risus immodicus & continuus , quatenus vel canalem asperæ arteriæ , vel vasa pulmonum sanguifera occludendo , vel onere & mole sua Cor & pulmones opprimendo , vel liberam pectoris ad excipiendum aërem expansionem cohibendo , impediunt , Cordis motum variis modis alterant.

Longum autem esset explicare , quomodo singularis hic affectus accidat , aut in Cor secundario redundet ; in quantum tamen ex motu pectoris depravato , atque diaphragmatis præcipue , sanguinis & Corde motus sæpe & graviter pervertitur , operæ pretium erit ostendere , quinam potissimum istius partis affectus sint , & quomodo labem suam Cordi communicent.

Re-

Respiratio igitur a duobus præcipue impeditur, à Rifu nempe, & Singultu.

I. In Rifu enim diaphragma à musculis infimi ventris, viscera sua in id impellentibus, in pectoris cavitatem sursum usque adigi, & tremulo gradu, (veluti ad aërem per partes excutendum,) pro formando intra laryngem risu, relaxari videtur; quo fit, ut, cum pericardio ipsi accrescat, Cor ipsum ejusque basin ad sua ipsius vasa, tam qua sanguinem excipere, quam qua ejicere solet, arcte adigat, impingatque; adeo ut, occlusis quasi Cordis foribus, circuitus sanguinis pro tempore intermittatur, quod ex tumore venarum omnium in collo, facie, & fronte plane patet: quamprimum autem risus desinit, & diaphragma ad debitum situm rediens Cor iterum deducit, ut systolen suam, & diastolen repetere valeat, sanguini circuitus suus redit, & venarum tumor iste, qui prius in risu apparuit, vasibus iterum depletis, omnino evanescit; rem

ita se habere constat, quoniam in longiore risu, præsertim in parvulis, (quem nutrices sæpe justo diutius provocant) non solum facies à nimia sanguinis copia, propter impeditum ejus recursum, livescit, sed & mors ipsa importunas istas blanditias aliquando excipit, ut historiæ passim testantur.

2. In Singultu, (qui quidem, licet noxam atque occasionem ventriculo plerunque debeat, diaphragmatis tamen propriè affectus est, & ideo prohibitu nostro spasmus ejus imitari, aut spiritus retentione pro tempore cohibere possumus) cum diaphragmatis circulo nervoso pericardium undique accrescat, fieri non potest, quin convulsione sua hoc in consensum trahat, adeoque motum Cordis interturbet; Et licet brevis hujusmodi affectio magnas Cordi molestias non faciat, in febribus tamen malignis, ubi diutius, & per plures forsan horas & dies perseverat, Cordis musculum adeo laceffit
&

& defatigat , ut post hujusmodi irritationis tædium nihil magis , quam de Cordis dolore & anxietate conquerantur , quin & pulsus plurimum intermittat : fieri enim aliter non potest , quin à partium istarum adhæsiōe , & alterutrius spasmus , mutua ipsorum opera impediatur : neque enim diaphragma toties , & tam violenta Systole corripitur potest , quin Cor simul secum trahat , adeoque antipraxi sua motum ejus durante paroxysmo multum pervertat.

Ut vero sanguinis & Cordis motus à Cerebro totus dependet , ut supra patuit ; ita ne tanta beneficia alterutri gratis data videantur , advertere obiter non alienum erit , quod , quamquam Cerebrum ipsum in partes omnes inferioris corporis , veluti Rex in suos subditos dominatur , & pro nutu & imperio suo omnia regit & gubernat , non tamen ita supra eas situm est , ut absque illarum ope & ministerio ipsum superesse possit , aut quicquam valeat : quippe spiritus animales , vitæque ipsa , à

continuo sanguinis in Cerebrum ap-
pullu adeo ex adverso dependent, ut
omnimodæ ejus suppressioni mox syn-
cope & lipothymia succedant; & si diu-
tius affectus isti perseverent, animalis
vita prorsus evanescat; cujus ratio alia
non est, quam quod, ut spiritus ani-
males, constante sanguinis influxu, pro
motu Cordis & pectoris continuando
è Cerebro per nervos destillant, ita
constante sanguinis penu, in Cerebrum
deposito, refarciri debeant; ideoque si
debito & perpetuo ejus vectigali de-
fraudetur Cerebrum, quasi eclipsin
patitur, & animal sensu motuque pri-
vatum suo pondere concidit; uti in
syncope affectis videre est.

A mutua vero Cordis cum Cerebro
opera tota sensus motusque ratio
dependet; dum scilicet à Cordis motu
sanguis continuo in Cerebrum & Ce-
rebellum, pro exstillandis spiritibus,
transmittitur, spiritus per nervos in
Cor influentes, motum ejus perennem
& constantem vicissim conservant: ad-
eo

eo ut Cordi debeatur, quod spiritus in Cerebro nunquam deficient; & Cerebrum hoc agit, ut Cordis motus nunquam cesset.

Uti autem hæc ambo mutuam sibi subsidium, & ministerium præstant, ut neutrum sine altero superesse queat; ita non minore officii necessitudine à Ventriculo utrumque dependet: quippe vitæ nostræ ratio in his potissimum consistit, ut cibus in Ventriculo in chylum præparetur, ut chylus in Corde, & vasis appensis assimiletur in sanguinem, & denique ut purior, & subtilissima pars sanguinis in Cerebrum exstilletur, cumque à sanguine nostro plurima semper effluvia secedant, atque constans massæ sanguinis & spirituum animalium dispendium fiat, necesse est, ut continuo, & recenti pabulo vitalis calor refocilletur, atque idcirco à Natura cautum est, ut pari proventu chylus in ventriculo conficiatur, qui liquorem sanguinis pereuntem æque certo resarciat. Verum neque hoc solum suf-

ficat, ut chylus usque in debita copia, & mensura sanguini suppeditetur; sed, ut is recte prius conficiatur, summe necessarium est; quippe si ex mala concoctione chylus, partibus spirituosus & activis nondum fermentatione dissolutis & liberatis, crudus & impurus sanguini misceatur, nunquam postea volatilis aut spirituosus fiet: (pari modo ac si cerevisiam novellam, vel vinum in fermentatum distillationi tradas; non nisi crudum & austum, minimeque spirituosum liquorem extrahes:) & proinde cum neque laudabili sanguini generando, nec spiritibus rite exstillandis aptus fuerit, œconomia animalis defectus hosce ventriculi secundario luit; verum ita, ut in ipsum Cor proxime redundant: adeoque ubi stomachus cibum rejicit, aut acceptum non recte concoquit, pullus statim à naturali tenore valde deficit; ut in cachecticis, & crapula frequente debilitatis, culibet observare est.

Atque hæc sunt instrumenta, & causæ

fæ remotæ , quibus motum Cordis sustentari, aut alterari contingit. Restant aliæ propiores , & velut intestinæ causæ , quæ motum ejus alterent , & labefactent ; idque quatuor præsertim modis accidit : 1. Cordis ipsius ; 2. Vasorum continentium ; 3. Sanguinis contenti , & 4. Spirituum influentium culpa.

I. Et primo de iis , quæ ab ipso Corde , ejusve Pericardio proveniunt, dicendum.

1. Cum enim non solum ad sanguinis motum expediendum requiratur , ut uterque Cordis ventriculus , tum sinus cavitatem , tum pulsuum numero alter alteri respondeant ; sed & ad continuandum sanguinis circuitum, eumque successive usque , & injusta copia , per vasa rite propellendum , ex rei natura necessarium sit , ut pari robore ad sustentandum hoc munus latera Cordis firmentur ; exinde sequitur , ubi quicquam horum desideratur , sanguinis quoque motum inde multum alte-

rari : quandoquidem vero iste error naturæ , quo ventriculorum Cordis exacta habitudo non sit , raro aut nunquam occurrit , non est quod de eo verba faciamus. Sed cum parenchyma Cordis variis morbis & injuriis obnoxium sit , motum ejus multum quoque alterari necesse est ; si enim Cordis parenchyma , aut nimia pinguedine oneretur , aut inflammatione , ulcere , abscessu , aut vulnere laboret , adeo ut sine magna molestia atque difficultate , aut absque gravi offensa sese vibrare & contrahere non possit , motum suum valde remittit , & sanguinem , quantum potest , licet non quanto opus est , reliquo corpori distribuit , unde sanguinis quoque motus debilis admodum & languidus mox evadit.

2. Ut autem Cor proprio affectu intus aliquando laborat , ita quandoque , sive suo , sive capsulæ vitio , ab extra opprimitur : quemadmodum enim aqua ista pericardio inclusa ad lubricandam Cordis superficiem , &
facili-

facilitandum motum valde infervit; ita nonnunquam evenit, ut nimia copia Cor opprimat & inundet, quum enim in Cordis hydrope involucrum istud impletum est, & latera ejus ab incumbente undique aqua eousque comprimuntur, ut pro excipiendo sanguine satis dilatari non possint, tum pulsus valde diminuitur, donec tandem inundante magis aqua prorsus supprimatur, unde syncope & mors ipsa succedit. Pari ritu hoc fieri videtur, ac in hydrope pectoris, ubi pulmo satis distendi non potest; quia cum cavitas thoracis aqua repletur, pro dilatatione pulmonum nullum relinquitur spatium, unde morbo isto affectus difficilis, & tandem nulla respiratio superest, licet summo conamine spiritum attrahere contendant; ut in hujusmodi ægrotis non raro observavi.

Atque, ut obiter hoc dicam, cum aquæ istius pericardio contentæ nimia copia Cordis motui adeo officiat, ut ipsum

ipsum tandem obruat, supprimatque, verisimile est, concitatiorem illum motum Cordis palpitationi succedere potius, quam ab illa excitari; quod eo magis verisimile est, quia affectus iste sanis & ex improvise sæpe, aliisque de causis exoritur, & nullo signo aut indicio adventum suum denuntiat; ut in affectu illo magis explicando infra dicetur.

3. Ad hæc, capsula Cordis ut non uno nomine illi officium præstare dicitur, tum quod illi irrigando, & ab externis injuriis muniendo inserviat; ita neque uno modo ipsi nocumento esse aliquando potest; sicuti enim, aquam nimis in se accumulando, Cordis nocumentum affert, ita, ubi illa prorsus deficit, arcte adeo Cordi accedit; ut ipsi tandem undique adhærescat; unde, cum diaphragmati accrescat quoque, Cordis motum cum illo confundere, & committere, necesse habet: quod quanto utriusque impedimento, atque incommodo fie-

ri debeat, supra ostendi, atque ex hac historia magis patebit.

Uxor cujusdam civis *Londinensis*, ætat. 30. Annorum, olim satis sana & alacris, per tres ultimos vitæ suæ annos moesta valde, & melancholica, & ad motum quemvis anhela, cum pulsu parvo, & intermittente, de dolore insuper cum insigni gravamine præcordia infestante, continuo fere querebatur; quin & crebris lipothymiis, & à levi quovis corporis motu spirituum deliquiis, & extremorum infrigidationi obnoxia demum evaserat, in quo statu à nullis medicamentis juvata tandem, viribus sensim attritis, interiit. Cadavere aperto circa viscera inferioris ventris nulla omnino vitia apparebant; dum vero alias partes perscrutamur, Cordis affectionem deprehendimus, in quam omnium majorum causas merito referamus: Thorace enim aperto pulmones satis sani fuerunt, Cordi tamen toti pericardium ubique adeo arcte accreverat, ut
digi-

digitis non nisi ægre ab illo separari potuerit; porro hæc membrana non, uti oportuit, tenuis & pellucida, sed crassa, opaca, & velut callosa evaserat; hinc cum nulla intercapedo pro libero Cordis motu, & nulla, qua humectaretur, aqua adfuisset, nihil mirum si de malis his omnibus continuo querebatur. Præterea cum pericardio humano diaphragma semper accrescat, ubi Cor ipsum quoque pericardio uniri accidit, fieri non potest, quin in omni inspiratione Cor etiam secum deducere, adeoque motum ejus tamdiu sistere, & suppressere necesse habeat; unde pulsus ista intermissio omni inspirationi tam constanter succedebat.

4. Quemadmodum vero (ut modo dictum) Cordis motus ab incremento hujus aquæ omnino suppressi, ita ab aliis capsulæ hujus incolis valde irritari, atque perverti nonnunquam solet: quippe sæpenumero vermes, intra capsulam hanc geniti, arrosione sua magnas Cordi aliquando molestias

CAP. II. CORDIS ANATOME. III

stias faciunt, atque Cordis tremore, anxietate, pulsu sæpe intermittente, dolore pungente, & syncope, se produnt: quam symptomatum catervam cataplasmate è *foliis cinaræ, tanacetî, & absinthii vulgaris, aceto vini albi acerrimo incoctis*, & cum paucis *mithridatio mixtis*, regioni Cordis bis applicato penitus dissipatam vidi. Atque hæcenus de iis alterationibus dictum est, quæ ab ipsius Cordis, cum pericardio suo, culpa proveniunt.

II. Cum vero ut, ad sanguinem in omnes partes debite distribuendum, utrumque Cordis ventriculum, tum sinus capacitate, tum pulsus rhythmo, inter se necessario convenire ostensum est, ita vasorum ad ventriculos Cordis accurata quoque analogia, & commensuratio mutua esse debet: sed cum Cor id ipsum sit, quod sanguinem à se propellendo, vasa ad eum conveyendum simul procudit, non est quod fieri posse credamus, ut pars aliqua sit, ubi vasa simul non adfuerint; quare,

re, cum vasa sanguinis duplicia sint, & diverso muneri destinata, tum Cordis & sanguinis motui reciproco interserviant, operæ pretium est advertere, quomodo utrique aut operam suam conferre nata sint, aut postea impedimento aliquando esse possint.

Notum itaque satis est, Arterias pro sanguine à Corde excipiendo, & in totum corpus deferendo, Venas autem ad eundem reportandum, & Cordi inferendum, constitutas esse; & pro sanguinis impulsu atque impetu sustinendo, illas crassiore tunica, has vero, in quibus sanguis cursu magis leni decurrit, tenuiore multum donari.

At sicuti vasa sanguifera ab ipso ortu à sanguine extra propulso, aut introrsum redeunte, conformata fuerunt, ita deinceps ab ipso varie immutari possunt; verum ita, ut Cordis & sanguinis motum valde alterent; & quoniam Arteriæ proximum Cordi ministerium præstant, primum quoque earum vicia explicare oportet.

Quan-

Quandoquidem igitur Arteriarum trunci crassiore & robustiore tunica donantur, idcirco, ubi sanguini in omnes partes æquus & apertus aditus patet, intra debitum ambitum ubique continentur; ubi vero eas à materia aliqua impacta oppleri intus atque obturari, vel a partium marcescentia obliterari & exarescere, vel ab externo aliquo corpore, aut accidente ductum cujuspian comprimì, aut constringi contingit; quoniam sanguinis copia toti corpori commensurata, & vis illi a Corde impressa eadem est; ubicunque sanguinis cursus in arteria aliqua impeditur, proximæ & sociæ ejus totum impulsì sanguinis impetum sustinere coguntur, & copiam isti destinatam in sese omnem excipere; unde nonnunquam accidit, ubi ductus aliqujus arteriæ diu obstructus, aut ligatus fuerit, ut sanguis in proxima sibi spatium amplius aperire, atque patefacere satagat, atque, dum hoc fit, motus sanguinis in arteriis omnibus

H

juxta

juxta positus multum corripitur, atque impetuosius trajici, necesse habet. Sanguis scilicet in hoc vase obstructus & præpeditus, in proxima impelli magis, atque arietare solet, donec pro explicando sibi spatio illa multum dilataverit.

Quod vero Arteriarum alicubi obstructio, idem earum marcescentia atque extenuatio reliquis vasis præstat; cum enim ventriculi Cordis, & sanguis, omnibus vasis commensurati sint, si pars aliqua aut membrum corporis marcescat, sanguis isti prius destinatus in alias partes corporis impenditur, proindeque tum vasa ejus dilatare magis, majusque incrementum adferre solet; atque ideo Doctif. *Glissonius* in Rachitide affectis, Hepatis & Capitis magnitudinem ab aliarum partium marcescentia rectissime deducit, ingeniumque simul cum Cerebro, ob majorum sanguinis copiam affusam, incrementum capere observat; quippe cum pars aliqua corporis

ris

ris marcescit & extenuatur, sanguis isti parti impendi solitus in alias corporis partes amandatur: & cum nulla pars corporis hepate & cerebro mollior, & impulsui sanguinis magis cedere apta sit, facile ab irruente sanguinis majore copia distenduntur ea, & in tantam molem atque incrementum assurgunt.

Pariter omnino ubi Arteriam aliquam constringi, aut comprimi contingit, cursus sanguinis in vicinis partibus majore impetu & vi acceleratur; ligata enim arteria cervicali altera, pulsus statim in altera cervicali, tum etiam in axillari utraque, propter majorem sanguinis copiam affusam, valde augetur. Quantum autem arteriarum, licet minorum, constrictio ad motum sanguinis in aliis accelerandum valet, ex arcta lumborum strictura, qua ad arcendum frigus utimur, clare apparet; cujus ratio non ea sola est, quod vestes corpori arctius complicat, sed quate-

nus motum sanguinis in minoribus & exterioribus vasis coarctat , cursum ejus in interioribus concitatum magis , & plenum intus reddit; ideoque qui renes à natura calidos obtinuerunt , nullo modo vestes lumborum regioni arcte alligari patiantur , ne simul cum represso sanguine ab exteriori corporis ambitu , majus incendium intus excitent. Uti autem arteriarum minorum contractio ad reliqui corporis commodum aut detrimentum sæpe fit ; ita , cum vasorum ad Cordis ventriculos exacta commensuratio fit , & sanguinis copia omni systole ejecta Aortæ ramis omnibus proportionetur , si decursus ejus per ipsum illius truncum paulo infra Cor impediatur , id non sine maxima Cordis molestia & periculo contingit , quatenus nempe sanguis toti corpori debitus , & justa mensura proportionatus , à dimidiata ejus parte totus excipi non potest ; adeo ut necessario in ipsum Cerebrum & Cor redundet , & cum ab illo propter spatii defectum expelli

expelli non potest, ipsius ventriculos
 opplere nimis, & suffocare necesse ha-
 bet: atque hoc in variis canibus sæpius
 expertus sum, quod cum aperta thora-
 cis læva parte, & immisso paulo infra
 Cordis regionem digito, Aortæ trun-
 cum descendantem penitus ad spinam
 compresserim, tanta corporis conten-
 tione, atque ejulatu obnitebantur, ut
 Cor ipsum pene è pectore excindi ma-
 gis tranquille tulissent. At vero cum,
 sanguine plurimo detracto prius,
 idem experimentum in aliis repete-
 rem, adeo ut partes supra compressio-
 nem sanguini reliquo excipiendo pa-
 res, & satis capaces essent, nullo fe-
 re molestiæ signo digiti adpulsum pa-
 tiebantur.

Uti vero sanguis alicubi præpedi-
 tus vasa proxima pro expediendo sibi
 transitu brevi dilatat, ita aliquando si-
 ve vasorum debilitate, siue quod san-
 guis in partem aliquam justo magis,
 quam pro ejus usu, derivatur atque
 allicitur, vasa, quibus defertur, co-

piæ suæ atque impetus incremento adeo diducit, atque distendit, ut in proximas partes minus copiose & debite influat: atque hinc est, quod gonorrhœa simplici, aut fluore uterino nimio laborantium spina adeo debilitetur, ut vix erecti incedere, aut sese quoquomodo flectere queant, non quod spinalis medulla, aut nervi inde orti, succum suum (si quis hujusmodi sit) nimis in testes, aut uterum impendendo, suo se fraudent genio; quippe non adeo liberales sunt, aut esse possunt, ut quidam vane commenti sunt, paucissimæ enim, & vix visibiles nervorum fibræ in testes disseminantur: ratio autem potius in hoc sita est, quod arteriæ spermaticæ, & uterinae, laxatae, succum sanguinis nutrimentum nimia, & plus solita copia in testes, & uterum deponant, & proinde arterias vertebrales, è regione oppositas, suo sanguine, & spinalem medullam ab iis irrigandam suo quoque alimento defraudent, quod ex mede-
la

CAP. II. CORDIS ANATOME. 119

la quoque magis patet; quicquid enim vasa spermatica constipat, & constringit, æqualem pariter sanguinis distributionem, simul & debitum partium tonum restituit.

Sicuti vero arteriæ cujuspiam obstructio, aut constrictio quævis sanguinis motum in partibus vicinis concitatiores reddit; ita, ubi canalis ejus aliquis aperitur, aut prorsus discinditur, adeo ut sanguinis torrenti exitus pateat, quoniam per apertum quasi ostium magis libere & expedite effluit, quam per poros corporis urgeri potest, ideo ubi facilius potest, copiosius affluit, & via, qua datur, liberiore erumpit adeo, ut pulsus simul cum influxu ejus in vicinis partibus multum diminuatur. Atque hinc optima reddi potest ratio, quare arteriotomia ad dolores, inflammationes, & plura hujusmodi symptomata mitiganda in tantum conferat, ut præsens juvamen asserre semper videatur: hoc enim exinde fit, quod cum sanguis,

per arterias è Corde impulsus , ægre magis , & difficulter per poros & habitum corporis circuletur , idcirco , ubi liberam & apertam viam nactus fuerit , totus torrens ejus simul erumpit & exundat , unde proximis vasis solito suo liquore depletis & destitutis , impetus & pulsus inibi multum diminuitur : pari quippe ritu hoc fieri videtur , ac cum fluvius , in duos amnes , aut rivulos , divisus , in plano solo placide , & æquis passibus decurrat , si alter dejecta ripa (qua prius continebatur) extra alveum præceps ruat , non solum fluentum ejus , quod ultra hoc apertum præcipitium pergit , sed proximus amnis quocumque per diversas fossas , & rivulos (quasi tot anastomoses) communicat , statim subsidit , & in cursu suo retardatur ; uterque scilicet amnis faciliorem exitum nactus , quo magis libere potest , decurrit ; similem plane in modum se habet res in vasis corporis ; expertus utique sum , si arteria cervicalis in altero

tero latere aperiatur, statim pulsum alterius cervicalis multum fatiscere; pariter etiam si arteria cruralis altera pertundatur, pulsum ilico arteriæ oppositi cruris plurimum deficere.

Vidimus huc usque quantum vasis cujuscumque arteriosi dilatatio, contractio, atque amputatio ad motum sanguinis alterandum præstet; superest, ut idem, à venis contingere posse, ostendamus.

Licet itaque non tam refert, quibus causis venæ dilatentur, quam, quid earum dilatatio ad sanguinis motum alterandum faciat, explicare, notandum est tamen, aut ob partis cujusdam compressionem, aut sanguinis copiam, vel (sive ea ipsius ponderi, seu relaxato venarum tono, sive Cordi, sanguinem non debita vi impellenti, debeatur) refluendi difficultatem, venas potissimum ampliari, & propterea in gravidis, propter Venam Cavam, & utramque Iliacam,

in infimo ventre à mole uteri compressam , tum propter sanguinis , & humorum incrementum , & difficilem ab inferioribus partibus ascensum ; & in tristibus , & melancholicis , propter Cordis motum languidum , venas tibiarum , & aliquando femorum , in magnas varices distendi sæpe contingit : sanguis scilicet copia auctus , & in reditu præpeditus , aut sufficienti vi à tergo non impulsus , in venis inferioribus diutius sistitur , & tandem pondere suo , ac mole eas ultraquam valvulæ decumbentem sanguinem excipere & reprimere possunt , distendit , ut sibi amplius spatium acquirat ; atque ideo ubi lecto rursus se tradunt , vel istæ foetum enixæ sunt , propter faciliorem sanguinis versus Cor recursum , venæ istæ protinus inaniuntur ; verum cum longa consuetudine ampliatae fuerint , non ita facile in pristinum tonum restitui possunt , aut coarctari , quin sanguinem à Corde & Vena Cava divertendo ,
circu-

circulationis filum feriemque valde interrumpant; unde pulsus deficientia, & virium languor, propter venas illas valde dilatatas succedunt: atque hoc non ita pridem in quodam rustico, quadraginta circiter annos nato, & longa tristitia pene confecto, accurate observavi; tanta enim varice, sive vena dilatata, in parte anteriore tibiæ sinistræ laboravit, ut magni farciminis instar, à malleolo ad genu usque turgeret, & ejus incessui valde molesta esset; quantum quoque ex tumoris magnitudine conjicere potui, fere duas libras sanguinis contineret: cum vero in humum reclinatus tibiam erigeret, aut manu sacculum istium sanguinis sursum leviter urgeret, tumor ex sanguine in venam Cruralem & Cavam transmissio paulatim evanuit; cum autem in pedes iterum erectus staret, intra breve spatium folliculus iste in pristinam molem assurgebat, quod à sanguinis novi influxu fieri certum est:

cum

cum vero præterponderis illius molestiam se insuper imbecillum, &, si paulo diutius iste tumor perseverasset, valde languidum esse conquereretur, (quod detento sanguini, & intercepto Cordis pabulo imputandum puto) ad utramque molestiam præcavendam consului, ut valde stricta tibiali, aut fascia tibiam semper accingeret, & emplastrum astringens imponeret, quo in posterum valde levatus fuit.

Uti vero venarum alicubi dilatatio, sanguinis supplementum & influxum debitum divertendo, Cordis motum valde diminuit; ita ubi venæ in angustum adeo ambitum compinguntur, ut sanguini commeatum satis liberum non concedant, idem omnino incommodum Cordi advenit; quippe in valde obesis animalibus, propter venas à nimia pinguedinis mole & incremento compressas, quia sanguis pro motu Cordis continuando debite suppeditari non potest, proinde in vasis suis & Corde stagnare, & concreescere aptus est,

est, adeoque morti repentinæ (præsertim quibus à natura Cor vegetum & robustum datum non est) obnoxios reddit. Ut autem venæ cujuscpiam, minoris licet, compressio, sanguinis motum inhibendo, aliquantulum alterat, ita quo plura, & majora earum vasa obstructa, aut constricta fuerint, eo præsentius Cordi periculum impendit; & sicuti Aortæ paulo supra diaphragma compressio, sanguinem toti corpori debitum; & omnibus simul vasis quantitate proportionatum, in partes solum superiores congerendo, Caput ipsum & Cor obruit & perfundat; ita si Vena Cava paulo supra diaphragma in dextro pectoris latere, ubi trunco ab omnibus partibus distincto, & discontinuo versus Cor incidit, adeo arcte ligetur, ut sanguinis per illam affluxus prorsus supprimatur, dici vix potest, quanto animalis detrimento hoc fiat; quippe licet ab injecta venæ ligatura nullum doloris, aut cruciatus sensum corporis contentione,

tione, aut ejulatu fateatur, mox ta-
 men adeo obanguere & fatiscere inci-
 pit, ut pedibus vix stare possit; quin
 & non tam procumbere, quam inter-
 ram ruere & concidere semel vidi fe-
 rociorem molossum, non aliter quàm
 si vita omnino destitutus esset. Ratio
 autem, quare tanto discrimine Venam
 Cavam, & tam tranquille ligari, Aor-
 tam vero adeo anxie comprimere sustule-
 rit, alia esse non videtur, quam quod,
 vena inibi ligata, sanguis toti corpori
 debitus, inferiori solum parti ejus plu-
 rimum impenditur; adeoque Caput
 vitali ejus influxu valde orbatum, spi-
 ritus pro Cordis motu sustentando
 impertire adeo potens non est, ut
 utrumque vacillare, & deficere mul-
 tum necesse sit, quod nullo utriusque
 dolore perficitur: compressa autem
 Aorta supra diaphragma, sanguis,
 qui maxima ex parte inferiori corpo-
 ri, & visceribus ventris debetur, to-
 tus superiori, & minori parti suffun-
 ditur, quem cum excipere omnino
 inca-

incapax sit, nimia ejus copia prorsus opprimi, & suffocari debet; atque ideo cum mox Cerebro, & Cordi ipsi, tantam molestiam afferat, ad primam compressionem animal rem tam inique patitur, & summo conatu amoliri nititur; quod quidem experimentum cum non uno nomine observatum dignum sit, non abs re fore arbitror, si administrandi methodum hic ostendero. Perforato igitur dextro thoracis latere infra septimam & octavam costas, paulo infra regionem Cordis, & immisso digito, Venæ Cavæ situs palpandus est, deinde pectoris latus illud ad venam quam prope compellendum est, quo filum ei facilius educatur, atque in isto pectoris situ arcte stringendum est vinculum: tum pectore relaxato vulnus consuendum est: peracto autem experimento, canis mox oblanguet valde, & intra paucas horas exspirabit; in dissecti autem abdomine magna feri quantitas innatare conspicietur, non aliter quam
si

si Ascite diu laborasset, quod ab impedito sanguinis ab arteriis in venas circuitu fecerni prius expertus fueram; haud pridem enim venas jugulares subducto iis filo in cane arcte ligaveram, & post aliquot horas, partes omnes supra ligaturam mire intumescebant, & intra duos dies canis, quasi angina suffocatus, interiit: toto hoc tempore non solum lacrymæ copiosius fluebant, sed & plurima saliva ex ore, non aliter quam si ab assumpto mercurio fluxus ille concitatus fuisset; post obitum cutem ejus à partibus tumefactis separavi, atque expectavi, ut partes tumefactæ sanguine extravasato turgent; sed aliter omnino evenit, quippe nullum vestigium, aut colorem fere sanguinis observare potui, sed muscoli omnes & glandulæ sero limbo maxime distentæ, & admodum pellucidæ apparebant, quod clare arguit, ex constrictione venarum, cum sanguis ab arteriis in venas transire nequit, serum utcunque fecerni,

cerni, utpote velut in filtro meatus apertiores, & poros configuratos & aptiores habens, in quos fluat; crassior autem sanguinis pars propter meatum disproportionem non omnino in illos recipitur, & propterea intra vasa sua stagnare cogitur. Quantum hæc ad Ascitis, & Anasarcae causas investigandas conducant, aliis judicandum relinquo; hoc solum advertere oportet, Asciten non ex ruptis lymphaticis semper, si omnino unquam provenire, quippe plurimas oves Hydrope pectoris, atque abdominis dissectas diffecui, in quibus vasa lymphatica ita turgida & repleta ubique inveni, ut nusquam magis, adeo ut si quis venarum lymphaticarum historiam plenè absolvere in animo habeat, nulla corpora ad votum ejus, & propositum magis cesserint.

Haëtenus ostensum est, quâ Cordis, & vasorum ejus culpa motus ipsius alteretur.

III. Sequitur, ut in quam criminis

I

fu-

suspicionem veniat sanguis, & quo ejus vitio Cordis motus lædatur, explicemus.

Hic tribus præcipue modis Cordis motum pervertit; videlicet

1. Sua incrassatione, & coagulatione.
2. Abundantia nimia,
3. Defectu.

I Motus Cordis à sanguine alteratur, cum aut ab alieni mixtione, aut suarum partium secessione coagulatur, & grumescit, adeo ut viam sibi ipsi & transitum omnino præcludat; ut in peste, & ex veneno aliquando accidit, unde gravissima illa symptomata, Cordis scilicet anxietas, tremor, palpitatio, pulsus intermissio, & tandem fyncope, & mors repentina succedunt. Quæ omnia in majore molosso, post injectam libram semis lactis recentis, modice calefacti, (experimenti gratia) in venam cruralem, detracta prius pari sanguinis copia, quo lacti recipiendo locus esset, non sine magna commiseratione semel vidi; vix enim semihora

ra inde elapsa fuerat, cum maxima præcordiorum anxietate, oppressione Cordis, & diaphragmatis summa contentione (pro expediendo sanguinis circuitu) afficiebatur, & mox crebra palpitatione, tremore, & gravissimis suspiriis succedentibus, tandem inter miserandos planctus & querelas syncope extinguebatur: in dissecto mox observavi, Venam Cavam, utroque Cordis ventriculos, vasa pulmonum, atque Aortam, lacte cum sanguine penitus concreto impleta, & adeo inter se compactus cum lacte sanguis fuit, ut digitis non ita facile divelli, aut separari potuerit: unde similem in peste coagulationem esse, non est quod dubitem, cum iisdem prorsus signis & symptomatibus se prodere soleat.

2. Sicut autem massæ sanguineæ concretio & grumescencia vias sibi in vasis, & Corde obstruendo, ejus motum tandem eludit, supprimitque; ita si nimia sanguinis copia fuerit, aut plus debita feri, aut chyli quantitate tur-

gescat, vasa sua, & ventriculos Cordis ita replet aliquando, aggravatque, ut distendi nimis sit necesse, satis autem contrahi non possint, adeoque nimia ejus plethora penitus obruantur; atque ideo solenne est, homines lauto & pleno victu semper utentes, atque ebrios præcipue, frequenter suffocari, nisi larga & matura venæ sectione vasa sanguinis depleantur, & clysteribus aliqua pars crapulæ detrahatur, quo libera rursus circulatio fiat.

3. Quemadmodum verò sanguinis plethora Cordis ventriculos, ejusque vasa nimis implendo suffocat, & Cordis motum opprimit; ita e contra cum tanta sanguinis jactura, & vasorum inanitio fuerit, ut ventriculos Cordis irriteret solum, & non satis expleat, Cor in opere suo sæpe frustratum a motu desistit, ut in hæmorrhagiis magnis, & diuturna fame sæpe contingit.

IV. Hactenus ostendisse sufficiat, quantum Cordis motus a seipso, vasis suis,

fuus , aut sanguine alteretur ; ultimo explicandum venit : quomodo pro vario spirituum influxu motum ejus alterari contingat ; nam ut regularis Cordis motus a debito spirituum per nervos influxu omnino dependet , ita ex vario illorum influxu motus ejus plurimum alteratur.

I. Acceleratur Cordis motus in exercitio concitatioe , quatenus à motu musculorum , sanguis in ventriculos ejus uberius urgetur , atque ingeritur , quem cum necesse habeat pari passu expedire , in Cerebrum quoque , non aliter ac in cæteras partes , majore copia suffundit , unde spiritus etiam pro mutuo præstando beneficio , ad Cordis motum expediendum , majore quoque copia in ipsum amendantur. In febribus quoque Cordis motus valde acceleratur , non quod sanguis immaniter ebulliens in Aortam exsiliat , sed quia æstus ejus , & caloris sensus Cordis ventriculis infestus , & in Cerebellum trans-

missus, spiritus, ad motum ejus pro exigentia accelerandum, irritat; partim quoque, quia partes aliquæ sanguinis efferæ, & indomitæ, in Cerebrum depositæ, spiritus inibi hospitantes exagitant, & in orgasmum rapiunt. Etiam à potu vini generosi, & liquoris cujuslibet admodum spirituosissimi, motus Cordis mire augetur, quia partes spirituosæ, ab hujusmodi liquoribus in magna copia in Cerebrum exstillatæ, spiritus Cerebri incolas in similes tumultus incitant.

2. Diminuitur Cordis motus in magnis hæmorrhagiis, jejuniis, diuturna quavis ægritudine, seu moerore, longo languore, affectibus syncopalibus, febribus malignis, in quantum vel ob sanguinis inopiam, aut recentis pabuli defectum, aut longioris morbi deprædantem calorem, aut malam sanguinis diathesin, usuque adeo degener, & depauperatus est sanguis, ut exhausta, effœta, vel quasi vappescens ejus massa spiritibus in Cerebrum exstillan-

dis

dis omnino impar sit: & exinde propter spirituum aut non rectam constitutionem, aut non debitam influentiam, aut penuriam, Cor motum suum remittere necesse habet, donec sanguis vel copia augeatur, vel novo pabulo recreetur, aut crasis ejus emendatior evadat.

Atque hæc quidem secundaria Cerebri, & spirituum culpa accidunt; proxime ostendendum, quo spirituum vitio Cordis motus alteretur.

3. Depravatur utique in passionibus, ut ira, gaudio, terrore subito, quum spiritus nimia, & plus solita copia, aut majore impetu Cordi advolant, motumque ejus maxime corripunt, & horrendis aliquando subsultibus exagitant, & convellunt: quem affectum, quum non satis forsân perpenderent, diminuto vocabulo *palpitationem* Authores passim nominarunt; at revera, Cordis musculus ut easdem cum cæteris musculis actiones perficit, ita ab iisdem morbis haud immunis est, quip-

pe spafmo, & motui convulfivo æque obnoxius eft, & fæpius multo tentatur; in palpitatione enim fic dicta (qui motus convulfivus verus eft) Cor tam violenta fyftole fæpenumero corripitur, ut ipfas costas loco fuo moviffe, atque fregiffe notum fit; quin &, aliorum fpafmorum more, ab iisdem caufis excitatur, & periodice recurrit, & uti fic correpti occafionem plerumque à subito terrore, vel ira accipiunt, ita fimili quavis de caufa in eodẽ affectus denuo incidunt, à qua primo excitati funt; ubi enim fpiritus femel in tumultum, & confufionem acti, impetuoſe nimis in Cor delati fuerint, deinceps ob levem quamcunque occafionem pariter irritati, eandem viam & choream affectabunt, & fimili fpafmo Cor corripient; ut videre eft in iis, qui palpitationi fic dictæ obnoxii funt.

4. Rurſum, uti fpiritus in Cerebro & Cerebello in tumultus & orgasmos acti, Cordis muſculum aliquando nimis

ex.

exagitant, ita sæpe accidit, ut, spiritibus non debito atque æquali tenore influentibus, ille adeo arcte & rigide stringatur, ut à diastole diu vacet; unde nihil magis solenne, quam hysterica passione, aut epilepsia affectos, ingravescente paroxysmo, de Cordis spasmo, & constrictione (quasi manu comprimeretur) plurimum queri; quo tempore si digitum arteriæ applices, ne minimum pulsus vestigiumprehendes, atque ideo, discusso paroxysmo, de magno Cordis gravamine, & oppressione conqueruntur, quia, ob impeditum Cordis motum, sanguis in eo stagnans, & grumescens, illud onere suo opprimit, & valde gravat: qua de causa Epileptici etiam plerique, durante paroxysmo, pectora sua repetitis ictibus concutiunt, & contundunt, quo Cor ad motum incitent, & à coagulatione sanguinem impediant; quod si diutius paroxysmus dureret, periculum est, ne talis coagulatio sanguini inducatur, quam Cor nun-

quam iterum dissolvēt, & excutiet; unde longioris Epilepsiæ paroxysmi sæpe in mortem terminantur.

5. Cæterum, ut in affectibus convulsivis sæpenumero ex vehemēti constrictione Cordis motus aliquandiu interrumpitur, ita nec raro evenit, vel spirituum crasi non mediocriter labefactata, vel influxu eorundem valde impedito, motum Cordis quodammodo aboleri, aut saltem usque eo imminui, ac languescere, ut resolutō ejus musculo, paralyti quadam laborare videatur. Qui quidem affectus licet hætenus inauditus fuerit, & vix nomine cognitus, idem tamen cuicunque Medico curandis ægris, & diuturna praxi exercitato, præsertim hic in tanta populi frequentia, fatis sæpe occurret: certe ex multiplici & diligenti observatione jam dudum mihi constitit hunc ipsum esse morbum, qui in Catalogo mortuorum, singulis septimanis *Londini* edito, vulgo vocatur *The stopping of the Stomach*. Qui-

cun-

cunque enim hoc symptomate affici creduntur, licet ventriculum esse oppressum maxime querantur, iidem tamen si partem affectam ostendi requiras, Cordis regioni manum applicant, eamque ipsam mali sedem esse, plane evincunt: enimvero præter Cordis oppressionem magnam ex stagnatione sanguinis, pulsus insuper, durante paroxysmo, nullibi percipi potest, & licet ægre interim respirent ob consensum partium, idque symptoma ab incautis pro paroxysmo Asthmatico haberi soleat, omnino tamen differt, tum parte affecta, tum morbi signis, & cura; quippe venæ sectio in hoc morbo, uti propter pulsum non perceptibilem omnino difficilis, ita ob spiritus valde debiles & labefactatos plerumque exitiosa admodum, & funesta est; adeo ut sanguinis vel minimam jacturam ferre non possint. Morbus enim hic plerumque accidit corporibus cachecticis, & scorbuticis, præsertim eorum, qui spiritus vini & liquorum ar-

den.

dentium potationi assueti sunt, utpote qui præ cæteris omnibus sanguinis crasim vitiant, & spiritus sic depauperant, ut vel levissimum sanguinis damnum lethale fuerit. Paralytica interim hæc Cordis affectio, licet pulsu valde debili plerumque se prodatur, aliquando tamen periodice, repetitis quasi paroxysmis, per intervalla gravius affligit, atque diutius protrahitur.

Variæ ægrorum Historiæ mihi in promptu sunt, quas enarrare poteram, verum sufficiet hic paucis memorare, quod in Generoso quodam 30. circiter annos nato olim observavi: Is nimio vini Hispanici, & Tabaci usu in eam ventriculi debilitatem, seu potius paralyfin inciderat, ut ab ipso etiam aspectu & mentione cujusvis, licet gratissimi, cibi prorsus abhorreret; in hoc statu per mensem unum aut alterum vino & liquoribus cardiacis vitam sustentabat; pulsus interim valde debilis, & inæqualis, & ex motu corporis quo-

quocunque fyncope metus; tandem affectu à ventriculo ad nervos Cordis transmissio, paroxysmo paralytico id ipsum correptum est, quo durante pulsus nullibi percipi potuit adeo, ut sanguis ubique in corpore (nisi in vasis Cordi propinquis) stagnare prorsus videretur; lividitate autem, & frigore partium, instar cadaveris humi jacentis, veluti quoddam mortis simulachrum adstantibus exhibuit, nisi quod oculos moveret, & spiritum duceret; Paroxysmus iste ad diem unum & alterum protractus est, donec tandem remedium usu Cordis motus restitutus esset: durante affectu mente satis constabat, & post discussum paroxysmum de nihilo magis, quam de Cordis oppressione conquestus est; denique intra duas septimanas simili Cordis affectu extinctus est.

Non absimilis huic casus erat Fœminæ cujusdam Generosæ, quæ post diuturnam vertiginem in paralyin alterius lateris incidit, à qua quidem cito libe-

liberata est usu spiritus lavendulæ compositi, extra illiti, sed quam inconsulto, ex sequentibus patebit; externa enim paralyfis in viscera interna subito conversa est, adeo ut quæ antea respiratione libera, pulsu æquali, appetitu, & digestionem satis gauderet, eodem humore à membris exterioribus introrsum reperiçso, paralyfi interna postea laboraverit, atque in posterum plerumque dejecto, interdum nullo prorsus appetitu per aliquot dies elanguerit: cum autem idem affectus deinceps in nervos cardiacos transmitteretur, pulsus illico admodum debilis, & tactu vix perceptibilis reddebatur, non sine magna Cordis anxietate, gravamine, & suspiriis; quinimo mox hisce symptomatibus, humore à Corde in nervos thoracicos translato, affectus Asthmatis similis, difficilis nempe & laboriosa respiratio, succedebat; & denique ejusdem humoris à Thorace in Cerebrum metastasi facta, magna iterum vertigo, & capitis obnubilatio
insecu-

insecuta est, ut demum pro more quasi solito hæc symptomata sese mutuo exciperent, & variarum partium alterna resolutione Paralyfin hanc vagam quandam circumferrent; donec tandem paroxysmi, non obstante remedium usu, eousque increverent, ut ægra fato cedere coacta sit.

6. Postremo ut interdum spiritibus tumultuosius irruentibus Cor diutius, quam par est, constringitur, ejusque motus pro tempore cessat, nonnunquam iisdem spiritibus debilitatis, aut qualitercunque imminutis, valde oblanguescit, ita ubi influxus eorum penitus intercipitur, ejus motus omnino deficit; ut in Apoplexia, in qua tota Medulla oblongata simul & semel obstrui, & proinde tota systasis nervosa inde orta eclipsin pati videtur; unde Cor simul cum reliquo corpore sensu motuque penitus privatur, & ab opere suo feriatur, donec paroxysmus forte discussus fuerit, quod raro admodum affectui illi concessum est.

Cum

Cum ex prædictis constet, motum Cordis aliunde dependere, atque ex consensu partium diversas mutationes subire; proxime incumbit, ut ostendam, qui affectus, & symptomata diversas motus ejus anomalias consequantur.

Nam ut multæ, ac diversæ alterationes in ejus motu fiunt, ita partes aliæ, quæ proximum cum Corde consensum habent, diversimode noxam ejus participant; cumque Cordi nihil ipso sanguine magis affine sit, nihilque sit, à quo Cerebrum propius dependeat; nihil etiam est, quod istis citius Cordis inordinationem, aut defectum luat.

Noxæ autem, & symptomata, quæ sanguinis liquori inducuntur, duo præcipue sunt.

I. Si Cordis systole, qua liquor sanguinis conquassatur usque, & ad ventriculorum latera, & vasorum parietes alliditur, diutius elanguescat, succus ejus nutritius in partes secedere, grumescere, & gelatinæ in modum incrassari,

fari, tandemque intra fibras Cordis hinc inde pendentessimplicari, & ipsis ventriculorum parietibus accrescere, & à Cordis æstu indurari incipit, eaque quantitatis mole sæpenumero augeri, ut utramque Cordis cavitatem fere impleat, motumque ejus multum diminuat: atque hoc in tabidis, melancholicis, & scorbuticis solenne & familiare est, (utpote quorum pulsus debilis, & intermittens) ventriculos Cordis, & vasa omnia sanguifera chylo coagulato infarcta, & fere repleta esse; ut in pluribus hujusmodi defunctis, & longa mœstitia, aut ægritudine attritis, præsertim si sub isto languore in lecto decubuerint, sæpe observavi; adeo ut mirandum sit, Cor ullo modo constringi, aut reliquum sanguinem adhuc fluidum, ad vitam & calorem in partibus conservandum, in vasis istis præterlabi potuisse; cujus insigne exemplum in Viro forti admodum & robusto, sed tandem graves ob causas afflicto, nuper observavimus, utpote

qui ex magno animi, & corporis vigore eousque intra paucos menses tristitia dejectus est, ut pulsu valde debili, & intermittente cum frequentibus suspiriis, Cordis gravamine, & paulo ante obitum totius corporis refrigeratione magna laboraverit, neque fortioribus cardiacis intus exhibitis, aut pannis calefactis extra applicatis, media licet æstate, ullo modo refocillari potuerit, in cujus Corde, post mortem aperto, magnum polypum, sive carneam molem ventriculos ejus, & præterea vasa majora sanguifera in pulmone fere penitus opplentem invenimus, cui omnia hæc symptomata merito imputari debuerunt: quin etiam me semel, in quodam *Oxonii* tabe extincto, & paulo ante obitum lipothymixæ frequenter obnoxio, observasse memini, dextri ventriculi ostium usque adeo ab hujusmodi carnea concretione obturatum, eamque tam arcte inter fibras tricuspidis impactam fuisse, ut pennæ anserinæ aditus in ventriculum, pro influxu san-

sanguinis, vix restaret; & sinister ventriculus pari fere modo obturatus fuit, ut ægre ostium Cordis digitis recludi potuerit. Quin & hujusmodi concrectiones ulque adeo in carnem mutatas vidi, ut plurimas venas & fibras in iis adverterem, quas cum in frustula difsecarem, sanguinem non aliter, quam si pars aliqua corporis incideretur, recentem effuderunt; claro argumento, nutritium in sanguine succum alimentum partibus præstare, cum ita intra vala sua non solum in parenchymata concrelescere, sed in ipsum carnis colorem, & substantiam, mutari aptus sit, cujus coagulationis hæc ratio esse videtur, quod, cum Cordis motus diu elanguelcat, & simul æger lecto affixus sit, ex plano & æquali isto corporis situ, sanguis lento fluxu delatus, ob motus istam tarditatem & moram (præsertim cum succus nutritius in sanguine admodum glutinosus est) sensim concrescit, & pro varia Cordis & valorum continentium figura varie

configuratur ; unde pro Cordis poly-
po , verme , & serpente interdum ha-
bitus est. Ex quibus constat , quanta
cum utilitate exercitia & agitationes
corporis ad salutem conferant ; nam
quo sæpius in Corde sanguis conqua-
satur , ad va'orum parietes alliditur ,
in habitu corporis à contractione mu-
sculorum agitur , & concutitur , &
denique per poros corporis urgetur ,
eo magis attenuari , & à stagnationibus
istis liberari necesse est , in quas aliter
pars sanguinis : u ritia latis prona est.

2. Ut à debili & parvo Cordis motu
sanguinis stagnatio , & concretio indu-
citur ; ita e contra , ubi motus Cordis
cum robore aliquali & vigore vibratur ,
mixtio ejus optime conservatur : si ve-
ro intensior fiat motus , ex violenta
concussione sanguinis liquor valde at-
tenuatur unde exercitio , balneo , la-
conico sicco aut vaporario sudor su-
pervenit ; qui si diutius , & ultra quam
par est , provocetur , propter feri de-
fectum , sanguis vehiculo tuo spolia-
tus,

tus, circulationi ineptus redditur, & Cor ipsum, propter spirituum dispendium, in opere suo delassatur; unde lipothymia, & syncope succedant.

Atque hæc sunt symptomata, & effectus, quæ, ob Cordis motum hoc aut illo modo alteratum, in ipsum sanguinem proxime redundant; alia autem sunt, quæ partes continentes pariter afficiunt.

I. Motus Cordis, quando debilis valde, & intermittens est, hos capitis affectus, scilicet vertiginem, scotomiam, caliginem oculorum, & lipothymiam inducit; quorum symptomatum ratio in hoc sita est, quod cum spiritus animales, vitæque ipsa à continuo sanguinis in Cerebrum appulsu dependant, si cursus ejus sistatur paululum, aut sufficienti copia non suppeditetur, tum, propter ejus defectum, Caput statim vacillat, oculi caligine obducuntur, & tota corporis compages in præcipitum ruere apta est; atque ideo syncope affectos in dorsum & humum sterni-

mus, ut citius ad vitam restaurentur; quoniam, utut Cor debile fuerit, poterit tamen in eo situ sanguinem, quasi ductu horizontali, in Caput projicere, quamquam in erecto corporis situ sanguinem eo suffundere non potest; ex cujus influxu sensus & vita redit, & imago ista noctis statim evanescit.

2. Ex adverso autem, ubi Cordis motus acceleratur, & sanguis impetuosus nimis in Caput trajicitur, membranas vellicando & succutiendo, Capitis dolorem infert, & spiritus animales, per somnum in Cerebro concentratos, & quasi ab opere feriantes, rapidiore motu suo exagitans, & loco pellens, vigilias inducit: non absimili forsan ritu, ac juxta lenem & placide murmurantem rivulum somnus nos cito occupat, at juxta vortices & cataractas, terrore potius à somno arceri solemus.

Atque hi sunt affectus præcipui, qui motus Cordis varios, velut umbra corpus, sequuntur: proxime sequitur, ut
osten-

ostendam, quomodo fluxus sanguinis, pro diverso corporis situ & figura, alteretur, & quid alterationem istam sequatur.

Quemadmodum (ut prius dictum) pro animalium diversitate, influxus spirituum in Cor diversus est, ita pro vario corporis situ & figura, sanguinis per partes fluxus discrimen subit. Cum enim certissimum sit, sanguinis venosi refluxum non ab attractione Cordis ulla, sed à propulsu arteriosi sanguinis provenire, facile est concipere, quantum partium quoque situs ad facilitandum aut retardandum hunc motum conferat: veluti enim in Homine, cum in pedes erigitur, sanguis à venis Jugularibus, & Vena Cava descendente citius & facilius, suo quasi pondere, in Cordis sinus delabitur; (simili modo atque venæ, in manu elevata mox vacuæ, in demissa vero turgidæ & plenæ cernuntur,) qui autem est in partibus inferioribus, & Vena Cava ascendente, difficilius, & contra

tra naturam suam, solum ab arterioso sanguine versus Cor propellitur, & vi quadam urgetur; at in planum jacente corpore sanguis æque facile ab utrifque redit: operæ pretium igitur fuerit advertere, in quo membri situ sanguis citius partem pervadat, & quæ mala citior, & tardior ejus cursus producat.

Quemadmodum nox & dies, somnus & vigilia, alternatim se excipiunt, & vices mutant; ita situs corporis humani, pro naturæ indigentia, nunc erectus, nunc declivis est.

1. In Homine erecto quoniam sanguis à superiore corpore, nullo fere alieno adminiculo, satis facile in Cor defluit, & sanguis ab inferiore parte corporis non nisi sanguinis arteriosi impulsu, & quandoque muscutorum contractione in exercitio, ægre usque sursum urgetur; ideo circuitum ejus in partibus superioribus celeriores quoque fieri necesse est: quod & postea magis patebit.

2. In declivi autem corporis situ,
cum

cum corpus à motu quoque quiescit, prout partes extremæ magis reliquo corpore elewantur, ita circuitus sanguinis citius, aut tardius per illas peragitur.

Quemadmodum igitur sanguis, quo recentior à Corde provenit, eo vegetior & calidior est; pariter & ubi ab illo per partem aliquam trajicitur, necesse est, ut calorem suum simul isti deferat; quare quo frequentior ejus transitus fuerit, eo major incallescencia & vigor continuo advenit; unde fit, ut ab exercitio tam cito intepescamus: si vero cursu nimis concitato sanguis deferatur, majores (quam par est) in corpore æstus, & magnas Cerebro molestias aliquando facit, ut paulo supra patuit.

Effectus autem, & incommoda, quæ tardior sanguinis transitus in partibus post se relinquit, duo præcipue sunt: nimirum

1. Humoris serosi accumulatio, &
2. Vitalis caloris diminutio.

Quæ in extremas corporis partes (pedes & caput) maxime redundant.

1 In pedibus, præsertim morbidorum, & eorum, qui exercitio commode uti non possunt, cum sanguis ægrius (dum erecti sunt) versus Cor ascendat, ideo stagnatione sua, & transitus mora, vasa capillaria minora sua copia distendit, & in habitu corporis aggeritur; unde pedum tumores oedematosi, & hydropici: Rem ita se habere constat, quoniam cum lecto se tradunt, & pedibus cum reliquo corpore in æquali situ collocatis recumbunt, serum illud cum venoso sanguine per circuitus resorbetur, unde partibus iterum inanitis, tumor ante proximum diem prorsus evanescit.

2. Præter autem humorum congestionem, & tardiores in partibus inferioribus circulationem, etiam caloris diminutio supervenit; nam utut de die minus frigoris sentiamus, quia exercitio & ambulatione sanguis usque propellitur, & proinde novo sanguini, & à
Cor-

Cordis quasi incude adhuc recenti, via aperitur: in lecto autem repositi, si pedibus reliquo corpore declivioribus quieti nos tradamus, pedes non ante incalescent, quam iis magis elevandis lectus componitur; cujus hæc ratio esse videtur, quia ex elevatione ista sanguis venosus citius à pedibus recedit, & proinde liberius & copiosius sanguis arteriosus influit, & cum illo calor in partem restituitur.

Atque hoc adeo familiare est plerisque frigidioris temperaturæ hominibus, quorum sanguis serolo latice magis abundat, ut propter frigoris sentum somnus non ante obrepit, quam lectus ad pedes altius erigendos de novo sternatur.

Ut pedes propter tardiores sanguinis venosi recursum intumescunt, & in frigidantur; ita Cerebrum, si caput in somno nimis demissum fuerit, licet calvariæ integumento inclusum, frigus minus sentiat, quia tamen ex isto
situ

fitu sanguis non ita facile redit, inundationem & irrigationem nimiam conficitur; quis enim ex illis est, qui ita recumbunt, quin proximo mane de capitis torpore, somnolentia, gravedine aurium tinnitu, faciei intumescencia conqueratur? qui omnes affectus, postquam experrectus est, & sanguis denuo humores istos serolos in transitu resorbens secum in Cor retulit, paulatim evanescent.

Et quoniam somni obiter hic mentio incidit, opportunum erit hic paucis ostendere, quis Capitis situs inter dormiendum maxime ad sanitatem conferrat: quandoquidem igitur Cerebrum humanum rete mirabili (quod seri superflui partem à sanguine exciperet, & à Cerebro præverteret) omnino destituitur, atque vasa sanguifera, tortuoso licet ductu ad frangendum sanguinis impetum formata sint, eum tamen illibatum in Cerebrum deponunt, ut *Tab. 5. fig. 3.* ostendit; in qua

aa *Arteriæ duæ Carotides, ubi*

os calvariae subintrant.

bb *Ubi sinuoso ductu per ipsum feruntur.*

cc *Ubi osculis recta sursum kianti-
bus in Cerebri basin sanguinem
emittunt.*

dd *Arteriae Vertebrales, ubi cal-
varium penetrant.*

ee *Ubi ambo earum trunci in unum
coëunt, & canali recto versus
arterias Carotidas incedunt, ut
cum iis anastomosi jungantur.*

Ideo fieri non potest, quin serosior
& aquosior sanguis, prætertim super
planum jacente corpore & capite pa-
riter reclinato, in Cerebrum influat;
cumque præterea in ejusmodi situ lan-
guis in caput suffusus, non tam prom-
pte & subito, quam cum erecti sumus,
à Cerebro recurrat, necesse omnino
est, ut ipsum, & præterea totum syste-
ma nervosum, à nimio sero irrigetur,
id quod malo suo experiuntur, quot-
quot affectibus spasmodicis, hydropi
Cerebri, vertigini, sensuum torpori,
&

& hujusmodi capitis morbis obnoxii sunt; si enim capite humili, & cum reliquo corpore æquali, somno se traderint, propter Cerebrum, & nervos sero nimis irriguos, postero mane de vertigine, scotomia, capitis gravedine, membrorum tremore, linguæ balbutie, totius faciei tumore, passim conqueruntur; quin & sæpenumero inter dormiendum, aut turbulentis insomniis, aut incubo tentantur, & toto mane insequente torpidi, somnolenti, & graves sibi videntur, somnolentiamque vix aut ne vix diu postea excutunt: è contra, qui capite altiore decumbunt, quia ex isto situ sanguis, ejusque serum, suo pondere à Cerebro facilius delabitur, ideo dulces & quietos, licet breviores, somnos capiunt, & mane multo alacriores, & vegetiores evigilant, & ad omne opus & studium magis prompti, atque expediti redduntur.

Atque hic advertere obiter alienum non erit in pessimum illum aliquorum
mo-

morem, qui nocturnis & feris compositionibus (præsertim in magnis Urbibus, & Academiis, quo tempore à studiis, & negotiis maxime vacant) potissimum indulgent; quo nec Cerebro magis adversum aut injurium quicquam potest esse: cum enim, propter declivem corporis situm, urina à renibus secreta non ita facile & prompte, ac cum erecti sumus, in vesicam per ureteres delabatur, (quanquam nec diffitendum est, ureteres ex tunica musculosa consistere, adeoque non solum convehendo, sed propellendo etiam sero inservire, atque pro rei exigentia dilatari, aut constringi posse) cumque vesicæ cervix, ex declivi situ, urinæ pondere non adeo gravetur, atque spiritibus per somnum in Cerebrum aggregatis, & quiescentibus, vesica oneris ejus sensum non ita percipiat, sed officii quasi oblita, ea copia urinæ aliquando distendatur, ut majori recipiendæ spatium vix detur; inde fit, ut, propter impeditum per renes & ureteres

res

res urinæ decursum, serum in totum corpus regurgitet, & nisi diarrhœa postero mane secedat, aut nocturno sudore evacuetur, in Cerebrum pars ejus deponatur, & longa hujusmodi consuetudine eousque illic accumulato soleat, donec tandem in paralyfin, tremorem, hydropem Cerebri, lethargum, aut apoplexiam conjiciat. Rem ita se habere, ex mala & crebra aliorum experientia sæpe didici; multoties enim observavi plurimos homines, inculpatæ aliter valetudinis, hoc vitæ genere sibi nimis indulgentes, hujusmodi morbos frequenter incurrisse. Quæ mala ut effugiat quispiam, qui à bibendi tamen consuetudine abstinere non potest, consulo ut lecto non prius se tradat, quam conscius sibi fuerit, se maximam ingesti liquoris copiam per vesicam reddidisse, quam multo largius & citius evacuabit, si vestibis exutis aut paululum relaxatis aëri ambiēti se caute exponat; prohibita enim transpiratio, & constrictio corporis illa
mire

mire auget urinæ copiam: quod ex hoc constare potest, quia sæpius vesica majore quantitate urinam reddit, cum corpus aëri expositum est, quam cum tempore lecti relaxatur; adeo ut, si quis lecto experrectus statim urinam tota nocte collectam reddat, vesicam iterum exonerare cogatur, & majorem urinæ copiam (si hyemalis & frigida tempestas fuerit) intra quartam horæ partem ab ultima mictione reddet, quam pluribus horis per somnum prius accumulata fuerat; non aliter, quam si quis vesicam exoneret, antequam natandi gratia in aquam descendat, quam primum tamen frigidæ immerfus fuerit, ex contractione cutis, & pororum occlusionem, majori mensura urinam mox iterum deponet, quam antea, licet longo tempore in vesica congesta fuisset.

Quin ex cauta hac à lecto abstinentia, priusquam largam satis urinæ copiam reddidisse securus esset, novum quendam pocula ad seram plerum-

L

que

que noctem, vitam quoque suam ad multos annos, imo ad vividam, viridemque, ut ajunt, senectutem, protulisse.

Verum hæc obiter; & quoniam supinus corporis situs ad planum proxime accedit; non abs re erit paucis ostendere, quid incommodi quoque ex ista corporis positione in somnis eveniat. Quod ut clarius fiat, præmittere oportet; animalium Cerebra, pro diversis corporum figuris, varie constituta esse, nullibi vero magis, quam quoad sinus & ventriculos Cerebri discrimen occurrere: in quadrupedibus enim, quæ prono in terram capite incedunt, uti Cerebellum in Cerebrum aliquantulum incumbit, ita & sinus laterales, inter utrumque descendentes, superiores quoque sunt, & ventriculus pariter quartus, Cerebello subjectus, supra reliquos Cerebri ventriculos collocatur.

In Homine autem, cui caput supra reliquum corpus eminet, Cerebrum
uti

utique Cerebello incumbit ; (intercedente tamen dura matre , & ad utrumque calvariaë latus satis firmiter attensa , ne Cerebellum pondere suo comprimat) pariter quoque & sinus laterales magis in declivi siti sunt , & ex latere inferiore occipitis utrinque oblique feruntur , antequam in venas jugulares terminentur ; unde fit , ut conjecto in lectum corpore , ex supino ejus situ , ubi collum occipite magis attollitur , sanguis in venas jugulares ascendere potius , quam defluere necesse habeat ; atque hinc est , quod , propter retardatum ejus motum & circuitum , continuo aggestus , nec facilem exitum nactus , profundas istas foveas utrinque in occipite imprimit , atque prout Homo in hoc , aut illud latus quiescere solet , ita sinus illi plus in uno latere , quam in alio semper excavantur ; ut cuilibet internam occipitis partem , in quo Cerebellum reconditur , contemplanti facile patet : ob sanguinis autem refluxum impeditum , & vasorum ex-

inde intumescantiam, foveas istas in occipite imprimi, ex hoc constat, quia supra sinum longitudinalem, è quo sanguis satis libere decurrit, ne minimum ejus in calvaria vestigium extat, nisi in inferiore parte, ubi in sinus istos laterales sese exonerat. Si vero refluxus ista cohibitio in tam durum os temporis tractu adeo valeat, ut sinuosos & profundos tractus in eo sibi excavet; quanto magis sanguis ipse, ejusque ferum, in Cerebrum redundet, ipsumque aggravet; & licet venæ omnes, sanguinem quaquaversum à Cerebro excipientes, in sinus non directè aperiantur, sed veluti ductus communis in duodenum, aut ureteres in vesicam, scilicet intra duplicaturam duræ matris, aliquanto spatium incedant; & quod maxime observari dignum est, non osculis versus occiput (quæ rectior exeunti sanguini in sinus laterales via foret) sed versus frontem, retro quam cursus ejus est, apertis hiant; quo fit; ut in risu, spasmis, &c. in venas Cerebri

bri è sinibus refundi aut urgeri non possit, sed quo magis sinus ejus copia turgescunt, eò magis, duplicaturam istam comprimendo, regurgitationem ejus in venas prohibeat, quæ omnia melius percipientur ex *Tab. 5. fig. 4.* in qua designantur per

a a a Sinus longitudinalis apertus.

b Origo ejus circa os cristæ Galli, ubi impervia est.

c Ubi in sinus laterales utrinque sese exonerat.

dd Duo sinus laterales.

e Sinus quartus.

ff Locus, ubi sinus omnes sanguinem extra calvariam in venas jugulares deponunt.

hhh Venæ ex utroque Cerebri latere sanguinem in sinum deferrentes.

iiiiiii Oscula illarum, ubi sanguinem, retro quam sanguinis in sinu cursus est, exonerant.

Tab. 6. Fig. 1. Exhibet sinus Cerebri laterales, ut in venas Jugulares ex-

166 RICHARDI LOWER CAP. II.
tra calvariam terminantur ; in qua designantur per

a *Pars sinus longitudinalis abscissa.*

bb *Duo sinus laterales.*

cc *Locus, ubi sinus laterales utrinque in osse Occipitis ampliantur, & foveas in osse excavant.*

dd *Ubi sanguinem extra calvariam deponunt.*

ee *Ubi sinus laterales in egressu extra calvariam cum sinibus vertebralibus communicant.*

ff *Duo sinus tortuosi in calvariae osse excavati, ad reprimendam sanguinis regurgitationem in sinus Cerebri.*

gg *Duo ductus immediate extra calvariam, per quos glandula pituitaria in humano Cerebro aquam, quam è ventriculis Cerebri excipit, in venam Jugularem utrinque exonerat.*

hh *Venæ Jugulares.*

At

At verò quocunque modo sanguis, sive in sinibus, sive in venis, sistatur, malum tandem in Cerebrum resilit, atque inibi futuris morbis & materiam congerit, & fomitem abunde subministrat: quippe ferum ob hujusmodi causas præpeditum, & inter anfractus Cerebri accumulatum, piam matrem eousque distendit, donec tandem vel acrimonia sua eam erodat, vel copia sua perrumpat; unde in basin Cerebri defluens, medullam oblongatam, atque nervos ex ea ortos, stagnatione sua corrumpit, aut acredine sua continuo laceffit, unde hydrops Cerebri, convulsiones, & dirus mortis apparatus in capite accumulatur: si verò ferum illud à substantia Cerebri imbibatur, paralyfes, sensuum torpores, lethargum, somnolentiam, aliosque graves affectus capiti inducit.

Præterea, cum ventriculus quartus Cerebello subjectus, multo declivior, & magis in profundo situs sit, quam reliqui in Cerebro ventriculi, & quam

ipsum etiam infundibulum, inde fit, ut lymphæ in ventriculos Cerebri è plexu Choroeide secreta, in ventriculolum quartum, reliquis magis declivem, potius, quam in infundibulum defluat; præsertim si capite reclinato somnum quis capiat; ex quo humorum decubitu cavitas illa plurimum repletur, & eousque aggravatur, ut, ponderis ejus sensu nervis præcordiorum communicato, sæpe Cordis oppressio, & Incubus inducantur; atque ideo solenne est hydrocephalis fere omnibus, ut nunquam supini impunè dominant, quin in latus decumbere cogantur, quo melius hujusmodi molestias prævertant: imo novi quendam incubo olim maxime obnoxium, virum alias robustum & satis sanum, qui per duos annos nunquam in dorsum conversus dormivit, quin simul affectu isto corripereetur; adeo ut necesse haberet servum contubernalem in eodem lecto decumbentem admittere, qui statim ac gemitus & suspiria, quibus affectus iste

iste incipere solebat, exaudisset, ipsum in latus alterutrum converteret, quo factum est semper, ut insultus isti præcaverentur.

Quin & plurimos infantes recens editos, si motibus convulsivis obnoxii fuerint, nunquam diu aut placide in cunis dormire, sed variis spasmodis, & artuum subsultibus corripì observare est; cujus hæc causa esse videtur, quod cum eorum Cerebra multa aqua abundant, ex hujusmodi supino decubitu, qualis in cunis est, aqua in ventriculis Cerebri contenta in ventriculum quartum potius, quam in infundibulum defluit, & proinde medullam oblongatam (ex qua nervi præcordiorum oriuntur) valde aggravat, & comprimendo illam, spirituum in nervos transitum impedit; unde Cordis gravamen, & motus convulsivi tandem succedunt. Atque hoc ideo magis verisimile est, quia in contrario situ, scilicet intra ulnas nutricum, vel in earum sinu, ubi caput magis attollitur, placide &

secure magis obdormiunt: hoc ipsum præterea observare mihi contigit in Academico quodam *Oxon.* 4. abhinc annis hydrope pectoris extincto, qui postremo morbi decursu, somnum nisi prona facie, & inclinato capite capessere non potuit; si enim capite in pulvinar reclinato somno se composuisset, intra tertiam horæ partem horrendis insomniis & terroribus tristis semper evigilavit; quin & tremore Cordis, & ejusdem oppressione maxima diu postea afflictus fuit: in Cerebro autem post mortem aperto ventriculi aqua summe distenti reperiabantur, nulla autem præterea notabilis culpa in toto capite apparuit.

CAPUT III.

Sanguinis Motus & Color.

*De celeritate Circulationis, & quæ sit
differentia inter sanguinem Veno-
sum, & Arteriosum.*

Postquam ad hunc modum constitit, qualis Cordis fabrica sit, unde ejus motus proveniat, quibusque de causis motus ejus alteretur, & quales affectus & symptomata alterationes istæ sanguini inducant, reliquum est; ut quam celeri cursu sanguis omnis per Cor circuletur, proxime ostendam.

De motu sanguinis per ventriculos Cordis quæcunque ante *Harvejum* Authores tradiderunt, tam inania & futilia sunt, ut sponte sua jam evanuerint; & inter posteros, qui inventam ab ipso circulationem amplexi sunt,
ut.

utcumque , ipsa hypothefi cogente , totum sanguinem transire Cor , & circulari statuunt , de transitu tamen celeritate , & quantitate sanguinis , qualibet vibratione expressi , ita scripserunt , ut fabricam Cordis , motumque ejus non satis attendisse videantur ; nam plerique guttulas aliquot , aut scrupulum , aut drachmam unam , pauci semiunciam tantum sanguinis singulis pulsibus expelli concedunt ; & quidem fatendum est , in diversis animalibus pro varia corporum magnitudine , Cordis ventriculos plus aut minus continere & ejicere ; in Homine tamen & majore quovis animali tam exiguum quantitatem quolibet pulsu transmitti , quam sit inconsultum asserere , ex sequentibus patebit.

Equidem in ea opinione sum , totam sanguinis massam qualibet hora non semel atque iterum , sed sæpe Cor trajicere , quod ut magis perspicuum reddatur , sedulo advertendum est , quantum sanguinis in Cordis ventriculos , quoties

ties dilatantur, influat, quantumque ex iis, dum constringuntur, effundatur: cum igitur, in omni diastole ventriculos summa distensione dilatari, ex autopsia appareat, contra vero in systole Cordis latera tam stricte invicem coire, & coarctari, ut digitum minorem (si cono abscisso intromiseris) ipsa manu vix fortius comprimās; hinc est, quod certissimum arbitrer utrumque ventriculum in diastole tantam sanguinis copiam, quantam capere potest, recipere, & in omni systole, quicquid receperit, totum penitus expellere. Atque hoc quidem in Cordibus, & Auriculis animalium recens editorum, ranarum, anguillarum, & serpentum, oculis ipsis plane obvium & perspicuum est; quippe quorum Corda & Auriculæ in qualibet systole, excusso omni sanguine, ita penitus deplentur, ut prorsus alba appareant; rubicundus vero color in diastole (cum sanguis iterum in eas influit) per vices ipsis redit; quin & idem Cordibus majorum

jorum animalium contingere, extra dubium est, licet ob parenchymatis crassitiem tam clare oculis percipi non possit.

Quo supposito si pulsus etiam numerentur, haud arduum erit conjicere, quantum sanguinis intra horæ spatium per Cor trajiciatur; supponamus itaque, in sano & vegeto Homine Cordis ventriculum sinistrum duas circiter uncias, ut *Clariss. Harvejus* observavit, capere (quanquam ipse multo capacior in aliquibus sæpe observavi) & si tota illa sanguinis quantitas in omni systole à Corde expellatur, numeratis intra horam duobus millibus pulsuum, (quæ minima omnium computatio est) necesse est, sanguinis unciarum quatuor millia intra horam Cor trajicere: tot vero unciaë trecentas triginta & duas libras constituunt; dato autem, in Homine viginti quinque libras sanguinis inesse (quæ major est quantitas, quam plerisque Hominibus à Natura, aut ab Anatomicis, concessa est; dicunt enim

enim totius sanguinis, in corpore humano contenti, mensuram raro viginti quatuor libras excedere, aut minorem esse libris quindecim) certissime sequetur, totum hujusce Hominis sanguinem intra unicum horam tredecies per Cor circulari: verum cum raro accidat, tantam sanguinis copiam Homini sano inesse, aut Cor tam paucis pulsibus intra horæ decursum moveri, rationi consonum est, sanguinem in plerisque aliquanto sæpius quam tredecies Cordis ventriculos pertransire.

Atque ita se habet in omnibus animalibus, modo integra valetudine fruuntur; aliquando autem multo celerius, ut in febribus, exercitio violento, & motu Cordis convulsivo, transire putandum est; pulsus enim tunc longe velociores sunt, & proinde sanguis duplo sæpius trajicitur: è contra autem in ictero, scorbuto, aliisque hujusmodi affectibus, per quos Cordis motus languidus & inæqualis evadit, aut si quando vasa ventriculi ejus chylo grumescente

mescente infarciantur , sanguis multo tardius pertransit; quin etiam respectu temperamentis, sexus, & ætatis pulsus variari solet, ut trajecti sanguinis mensuram, atque circuitus vices accurate æstimare, atque definire impossibile sit; at in sanis & robustis animalibus sanguinem multo velocius ferri, & Cor ipsum pervadere, quam vulgo creditur, aut hætenus scriptum est, ex ipsa ventriculorum cavitate, & pulsuum numero satis patet: atque ita omnino fieri debet, si partes sanguinem ipsum constituentes, &, nisi perpetuo & concitato motu exagitentur, ab invicem secedere, & grumescere aptas, quis recte perpendat.

Verum ne quis hæc ita dicta intelligat, quasi sanguinis portio aliqua (utpote quæ vasis Cordi propriis, aut vicinioribus, & ab ejus fonte non adeo remotis, fertur) non multo citius & frequentius, quam reliquus per extrema corporis delatus, per Cor circuletur; ipsa enim vasorum & partium vicinitas
aliud

aliud arguit: nam hoc est, quod affirmo, licet omnes sanguinis partes non æquis passibus, aut totidem vicibus per Cordis sinus deferantur, quæcunque tamen sanguinis copia aut quantitas fuerit, omnem certe toties per Cor circulari, quoties modo dictum est.

Quam celeri autem passu sanguis omnis à Corde per totum corpus trahitur, non aliunde facilius est concipere, quam ex seri cum eo mixti citissimo per renes decursu: Quippe cum duæ vel tres libræ cerevisiæ matutino haustu in ventrem infusæ intra semihoram fere totæ (& citius multo si frigida tempestas fuerit) à vesica iterum reddantur; & cum serum illud plerumque dimidiata tantum sanguinis, in renes delati, pars sit, quidni asserere fas sit, quatuor vel sex libras sanguinis fero diluti, tantulo temporis spatio, per duas arterias emulgentes (ut vocant) in renes à Corde transmitti. Si autem per vasa tam parva, si cum reliquis conferantur, tanta liquoris sanguinei

M

copia

copia tantillo spatio pertranseat, haud arduum erit intelligere, quam concitato motu reliqua sanguinis massa omnis in cæteris corporis partibus feratur: Quod magis adhuc manifestum apparet in iis, qui aquas acidulas minerales tanta copia bibunt, ut aliquos noverim, qui duos fere congios aquæ unico mane partitis haustibus epotaverint, atque intra quatuor horas totam fere iterum per vesicam reddiderunt. Quæ aquæ copia sanguinis quantitatem in plurimis hominibus plus duplo excedit, & pariter certum est, eam per utrosque Cordis ventriculos una cum reliquo sanguine sæpius pertransiisse, antequam per renes secerni, aut à vesica deponi potuerit: neque enim aliud à ventriculo & intestinis liquori cuilibet, nisi per Cor & sanguinem, in renes & vesicam transitus aut via à natura conceditur; si autem tanta copia aquæ (quæ ut modo dictum dimidiata tantum sanguinis in renes delati portio est) tam exiguo tempore, & per tam
exiles

exiles arterias pertranseat, quid precor de reliqui sanguinis transitu per vasa omnia majora existimandum sit?

At non conjectura solum, sed & experimentis insuper demonstrare facile est, celerem hunc sanguinis à Corde projecti motum; si enim sanguis ex alterutra arteriarum Cervicalium aperta intra duodecimam horæ partem fere totus effluat, quidni conjicere liceat, totam sanguinis massam multo breviori spatio per Cor circulari; qui enim tam cito per unicum arteriæ ramum fere totus effunditur, quanto citius idem ex trunco Aortæ, aut omnibus ejus ramis simul discissis efflueret?

Sed ut accurate magis sanguinis cursus, & admiranda celeritas æstimetur, experimentum hoc unicum sufficiet: Nimirum in cane majore utramque arteriam Cervicalem discidi, simulque immisso in orificium, in sinistro pectoris latere è regione Cordis factum, digito Aortæ truncum infra Cor com-

pressi, ne quid sanguinis per illam descenderet, & arterias denique Brachiales sub axillis coarctari curavi, quo factum est, ut omnis fere sanguis per Cervicales (præter illum in Vertebrales transmissum) è Corde impelleretur; atque mirum dictu, intra vigesimam horæ partem totus effluerit; adeo ut negandum non sit, omnes ejus massam isto spatio Cor transiisse: quin etiam observare est in vulneribus, ubi arteria aliqua magna discissa est, quam brevi sic vulnerati sanguinem fere omnem cum anima profundant, quem tamen necesse est totum prius per Cordis ventriculos circulari.

Verum hic objectum iri prævideo, Cor inter hujusmodi vulnera & torturas multo celerius pulsare, & proinde sanguinem multo citius trajicere; at si sanguis, postquam istæ incisuræ factæ sint, paulo supprimatur, adeo ut dolor omnis & metus prius evanescant (quod cito in junioribus canibus fit, qui hujusmodi injurias neque tam ægre, nec tam-

tamdiu in animo ferunt) pulsum Cordis non ita corripitur & accelerari certum est: & revera licet fatendum sit, postquam plurimus sanguis profusus est, & animal pene fatiscere incipit, pulsum celeriores reddi, id tamen non antea fit, quam vasa omnia ita depleta fuerint, ut reliquus Cordis ventriculis satis implendis non sufficiat; atque ideo pro continuo sanguinis dispendio pulsus continuo minor, & crebrior redditur, usque dum sanguinis influxu penitus deficiente, etiam Cordis motus omnino cesset.

Si autem objiciatur, sanguinem facilius, & proinde citius ex arteria discissa effluere, quam per habitum corporis circumfertur, cum illic libero & pleno torrente, hic non nisi per varios anfractus & obices, & ipsius quoque carnis angustias atque poros in venas feratur, non aliter forsan quam fluvius aperto alveo magis celeriter decurrit, quam si per cribrum trajiciatur.

Huic objectioni facile erit referre,

quod, non obstantibus viscerum & habitus corporis angustis, sanguis licet non æque celeriter è venis, ac ex arteriis apertis effluat, in ipsis tamen venarum sectionibus, quamdiu Cordis motus viget, non multo tardius effunditur; quippe in canibus sæpenumero expertus sum, si collo arcte ligato, & Aortæ trunco infra Cor compresso, quo fluxus sanguinis in caput dirigatur, vena Jugularis alterutra discindatur, pari pene spatio ac copia ex vena ista, quam ex arteria Cervicali detrahetur, saltem usque dum maxima pars sanguinis adimatur: postea vero, cum ob tantum ejus dispendium, Cordis motus oblanguet, reliquum, ut debilius à Corde propelli, ita multo parcius & tardius è vena quoque profluere, agnoscendum est.

Posito autem tam celeri sanguinis circuitu (quem etiam me satis probasse arbitror) utique non apparebit, tantum esse discrimen inter sanguinem arteriosum, & illum in venis contentum, quantum vulgo creditur.

De

De Colore Sanguinis.

Qui sint utriusque sanguinis varii reditus, & vectigalia, ex quibus constant, alibi à me dictum est, eodemque in loco disserui de *Coloris* diversitate, & à qua causa differentia hæc inter utrumque maxime notabilis proveniat; verum cum pro tuenda, & continuanda nimis per omnia biolychnii cum lampade analogia, Doctiss. *Willisii* auctoritati, & præconceptæ opinioni, quam propriæ encheiriæ hac in re magis confisus fuerim, atque longior dies me aliud jam edocuerit, sententiam priorem meliore mutare non pigebit; neque enim aliorum dogmata & opiniones convellere, aut propriam mutando mihi ipsi ludibrium facere in animo est, sed quod ratio suggerit, & confirmat experientia, apud me plus auctoritate valet, semperque valebit.

Igitur *Coloris* diversitatem, quæ inter sanguinem venosum & arteriosum

cernitur, à sanguinis in Corde accensione (si quæ tamen illic concedenda sit) neutiquam dependere certum est; posito enim, illam potissimum in Corde fieri, cum par sit utriusque ventriculi officium, neque aliter quam (ut supra dictum est) fibrarum robore & crassitie discrepent, quidni color in dextro pariter immutari debeat? at certo constat, sanguinem ex arteria pulmonali eductum venoso per omnia similem esse, crassamentum ejus nempe obscuri coloris est, & superficie tenuis solum rutilat: quinimo nec à sinistro Cordis ventriculo novum hunc ruborem sanguini impertiri certissimo hoc experimento confici potest; si nimirum aspera arteria in collo nudata discindatur, & immisso subere arcte desuper ligetur, ne quid aëris in Pulmones ingrediatur, sanguis ex arteria Cervicali simul discissa effluens (saltem qui aliquandiu post præfocatum Pulmonem erumpit) totus venosus pariter, & atrii coloris apparebit, non ali-

ter

ter quam si vena Jugulari pertusa profusus fuisset. Hoc ego sæpius expertus sum, idemque ex eo adhuc clarius apparet, quod sanguis intra sinistrum Cordis ventriculum, & Aortæ truncum sive strangulati animalis, sive morte naturali confecti, (in quo aëri in sanguinem commeatus præcluditur) totus venoso similis semper reperitur.

Postremo, ne quis ultra vel dubitandi locus supersit, experiri animum subiit in cane strangulato, postquam sensus illum, & vita omnis deseruissent, an sanguis adhuc fluidus, è Vena Cava in dextrum Cordis ventriculum & Pulmones impulsus, pariter floridus per venam Pneumonicam totus rediret; itaque propulso sanguine, atque insufflatis simul, nec non perforatis Pulmonibus, expectationi eventus optime respondebat, quippe æque purpureus in patinam excipiebatur, ac si ex arteria viventis effusus fuisset.

Quemadmodum sanguinis arterio-

si colorem floridum & purpurascen-
tem, non ab accensione in Corde
ulla acquiri, ostensum est, ita neque
ater sanguinis venosi color ab ulla e-
jus in venis extinctione dependet; si
enim hoc fieret, quidni sanguis arte-
riosus, postquam extravasatus est,
penitusque extinctus, similem colorem
obtineret?

Quocirca, cum ita se res habeat,
proximo in loco videndum est, cui
tandem sanguis acceptum refert, quod
colore tam rutilo & purpureo penitus
imbuatur: atque hoc Pulmonibus tri-
buendum est, quippe expertus sum
sanguinem, qui totus venosi instar sub-
nigricante colore Pulmones intrarat,
arteriosum omnino & floridum ex illis
rediisse; si enim abscissa anteriore parte
pectoris, & folle in Asperam Arteriam
immisso Pulmonibus continenter in-
sufflatis, & (quo liber per eos aëri
transitus fiat) acu simul undique per-
foratis, vena Pneumonica prope auri-
culam sinistram pertundatur, sanguis
totus

totus purpureus & floridus in admotum vasculum exiliet; atque quamdiu Pulmonibus recens usque aër hoc modo suggeritur, sanguis ad plures uncias, imo libras, per totum coccineus erumpet, non aliter quam si ex arteria vulnerata exciperetur. Quod vero sanguinem è vena Pneumonica detractum venoso similem prius scripserim, id etiam expertus dixi, sed cum, Pulmones perforatos continenter insufflando, animali vitam tamdiu conservare nondum experimento mihi innotuerat; adeo ut aër omnis è Pulmone prius exclusus fuisset, quam venam Pnemonicam arripere, & pertundere potuerim quod experimentum, quo Pulmones in continua distentione, salva interim animalis vita, diu continentur, Celebrissimo Domino *Rob. Hooke* deberi, agnosco.

Verum si quis comminutioni sanguinis in Pulmonibus potius, quam aëris cum sanguine mixtioni, floridum hunc ipsius colorem tribuendum esse, contendat,

tendat, eum perpendere oportet, an revera sanguis in Pulmone magis, quam in corporis musculis, si omnino æque, comminui atque confringi possit; quippe cum Pulmones in continua dilatatione ad experimentum hoc recte conficiendum contineantur, non video, quomodo aliter, quam per poros eorum transeundo, sicut in reliquo corporis habitu, comminuatur.

Præterea colorem hunc rutilum particulis aëris, sese in sanguinem insinuantibus, omnino deberi, ex eo satis perspicuum est, quod sicut in Pulmonibus per totum floridus redditur, quia in illis aër per omnes sanguinis particulas diffusus cum ipso intimius permiscetur; ita sanguinis venosi in vase excepti superficies & pars summa, quatenus aëri exposita est, coccineum quoque colorem acquirit; quæ si cultello auferatur, proxima quæ subjacet à simili aëris contactu in eundem brevi mutabitur: quinetiam si placenta sanguinis, postquam diu resederit, invertatur,
brevis

brevi spatio cuticula ejus exterior & summa (dummodo sanguis sit incorruptus) purpureum colorem induet, & vulgo notum est, sanguinem venosum in patinam exceptum, & diutina agitatione commotum, quo aërem penitus intromittat, purpureum omnino evadere: nec miretur aliquis, secretionem, aut admixtionem aëris sanguini tantas colorum mutationes conciliare, cum videamus alios etiam liquores, prout eorum pori lucis radios plus minusve excipiunt, aut refringunt, diversas quoque colorum species fortiri.

Si per quos Pulmonum meatus spiritus aëris nitrosus in sanguinem transeat, eumque copiosius imbuat, à me quæras, ostende & tu mihi, quibus porulis alter ille spiritus nitrosus, qui in nive est, per delicatulorum pocula transit & æstiva vina refrigerat; quod si vitrum, aut metallum spiritui huic non sint impervia, quanto facilius laxiora Pulmonum vasa penetrabit? Denique

que si fuliginibus & seroso humori exitum non negemus, quidni per eosdem porulos, vel similes, nitroso huic pabulo introitum in sanguinem concedamus?

Quare sanguinem in suo per Pulmones transitu aërem haurire, ejusque admixtioni floridum suum colorem omnino debere, maxime verisimile est; postquam autem in habitu corporis, & viscerum parenchymatis aër rursus à sanguine magna ex parte avolavit, atque per poros corporis transpiravit, sanguinem venosum illo privatum obscuriorem & nigriorem illico apparere, rationi pariter consentaneum est.

Ex quo conjicere facile est, quantum sanguini beneficium ab admixto aëre accedat, quantumque intersit, eum salubrem semper & serenum haurire, quantumque aberrant illi, qui aëris hoc cum sanguine commercium omnino negant; absque quo fieret, ut posset aliquis non minus salubriter versari in pædore carceris, quam inter
amœ-

amœnissima vireta, ubicunque scilicet ignis sat commode ardere potest, ibi & nos æque commode respirare.

De Venæ Sectione.

Qua copia sanguis turgescit sæpe, quibus vasis, & quam celeri motu quaquaverfum à Corde per corpus trajicitur, atque ex arteria aperta quam cito ille, & quali impetu erumpit, hætenus dictum est; ex quibus constat, quam necessaria interdum sit Venæ sectio ad imminuendam sanguinis quantitatem, vel ad sufflaminandum illius motum, & quam periculosa ipsius administratio fuerit, si forte inexperta & rudi manu peragatur.

Cum enim propter imperitiam, aut quod minus exercitatus quispiam ad Venæ Sectionem accedit (unde animum metus occupat, & manum tremulam, & incertam reddit) sæpe numero contingat, ut arteria aperiatur, vel nervus aut tendo incisione aut punctura lædatur; unde tumores, inflam-

flammationes, gangrænæ, aut spasmi haud raro succedunt, quæ si non mutilanda, aliquando inutilia in posterum membra reddant; non abs re, neque præter operis institutum fore arbitror, si hic appendicis loco paucis ostendero, quo modo, & instrumento fieri possit, ut sanguis è quacunque Vena (si ab injecta ligatura extumescat) licet subjectam habeat arteriam, nervum, aut tendinem, tuto & secure detrahatur.

Quandoquidem igitur in Venæ sectione nihil unquam mali accidat, nisi aut penitus pertusa, vel dissiliente Vena, Lanceolæ cuspidis nimis in partem demittatur, ea hujus fabrica est, atque ita in venam adigi debet, ut utrumque facile præcaveri possit; quippe non ancipiti acie (nisi prope cuspidem) sed ex inferiore parte, qua cute applicari debet, parum obtusa & rotunda formatur, uti è *Tab. 6. Fig. 3* magis apparet; in qua

a *Lanceola.*

b *Locus*

b *Locus ubi lanceolæ acies superior in planum terminatur.*

c *Ubi inferior ejus acies desinit, reliquo Lanceolæ inferiore tergo rotundo (licet neutiquam crasso) existente, ne cutim subjectam, dum ipsa in Venam adigitur, compressione sua laceret.*

Quæ Lanceolæ figura à communi nihil differt, nisi quod ex altera parte, fere usque ad cuspidem, acies ejus parum retusa sit.

Modus autem utendi alius non est, quam ut ligato membro, & extumente vena, Lanceola illi prope admovenda, ita tamen, ut infra illam quam maxime deprimatur, dein cuspidem sursum adacta paulatim, & oblique, transversim Vena incidatur; quæ si ita dirigatur, neque cuspidem ejus Vena eludet, neque subjectæ partes ullatenus offendi possunt: qui modus Venæ sectionis uti facillimus est, ita nunquam licet mediocriter perito infelix cedit.

Et quanquam Medicis, & Chirur-

N

gis

gis frequenti usu exercitatis hæc non scribam, ex quo tamen plurimorum salutem periclitari, & vitam in discrimen adduci passim viderim, vel quod Venæ sectio male administrata fuerit, vel quod Chirurgus satis tempestive advocari non potuerit à Medicis, qui plerunque ab hac praxi abhorrent, ideo hanc Lanceolæ figuram atque usum excogitavi, quo illam securius & confidentius tractent.

CAPUT IV.

De Transfusionē Sanguinis ex animali alio in aliud: Quo tempore, & qua occasione ab Authore inventa sit.

Quæ hæcenus dicta sunt de sanguine, ea pertinent ad *circularem* ejus *motum*, qui intra *sphæram unius corporis* absolvitur, nimirum collatis quasi rationibus accepti atque expensi, mensuram liquoris, & temporis spatium, quo *sanguis per ventriculos*
Cor-

CAP. IV. CORDIS ANATOME. 195

Cordis è venis in arterias *ejusdem animalis* trajicitur, ad calculos revocavimus. Nunc quod porro tradituri sumus, *De ipsius transfusione ex hoc in aliud animal*, nescio ante triennium proxime elapsum, an cuiquam injecta sit aut perficiendi spes, aut experiendi cogitatio: nam & postquam in publicum proposita res est, tanquam magnos usus in medicina habitura, plerique tamen operis difficultate absterri, & novitate perculsi, aut manus ab experimento abstinebant prorsus, aut frustra admovebant: ut tandem veluti obsoleta *Pythagoræ* fabula, & vanior altera μετεμψύχωσις optari potius ab inconconsultis, quam à sapientibus sperari videretur.

Itaque lubet mihi rem totam, ut gesta est, exponere, simulque ostendere, & qua ratiocinandi serie, à me primum *excogitata* atque *suscepta*, & quibus demum mediis & auxiliis *ad effectum perducta sit*.

Complures anni sunt, cum alios

Oxonii viderim, & ipse experiendi causa, varios liquores opiatos, emeticos, multosque id genus medicinales in vivorum animalium venas injecerim; quo id fiat artificio jam satis notum, nec hujus loci est dicere, quos eventus atque exitus singula experimenta habuerint: cum vero insuper plures alimentares succos simili modo infuderim, atque cum variis vini, tum cerevisiæ injectionibus sanguinem diversorum animalium satis apte & amice congruere vidissem, animum mox subiit experiri, annon multo magis sanguis diversorum animalium inter se conveniret, & sine periculo aut lucta commisceretur, & quoniam in cruore extravasato (utcunque satis præcaveri posset, crebra agitatione, ne coaguletur) nativa tamen crasis partiumque textura ut immutetur, necessesse est; idcirco longe mihi commodius videbatur, animalis vivi, & adhuc spirantis sanguinem illibatum in aliud transmittere, quod etiam facilius peragi

agi videbatur, quod motum sanguinis per vasa sua tam citatum & rapidum, ut in momentis aliquot totam fere sanguinis massam, qua data porta, effluere observassem; quare spem hinc animo concipiens ad experimentum ejus tentandum animum & manus adhibui.

Et primum fistulis, hinc inde adaptatis è vena Jugulari hujus, in Jugularem alterius transmittere conatus sum; sed cum propter languidum sanguinis venosi motum, eum in fistula concreescere statim, & sibi ipsi viam obstruere viderem, mox aliam viam tentare coëpi, & præeunte quasi ipsa natura, statui tandem ex Arteria unius in Venam alterius sanguinem transvehere, novoque hoc artificio ipsius circulationem quasi ultra præfinitos limites extendere.

Quocirca cum ex voto omnia expectationi responderent, tandem *Oxonii*, sub finem *Februarii* Anni 1665. præsentibus Doctiss. Viris Doctore

Iohanne Wallis, Mathematices Professore *Savilliano*, Domino *Thoma Millington*, Medicinæ Doctore, aliisque ejusdem Academiae Medicis experimentum hoc novum, jucundo sane spectaculo, atque optimis auspiciis, exhibui.

Nimirum comparatis canibus, cæterisque, quæ ex usu esse videbantur, ex eorum uno medicoris magnitudinis, aperta vena Jugulari, sanguinem eousque detraxi, donec ejulatu & summa contentione vires jam fatiscere, & spasmos imminere, satis constaret; deinde ut tanto hujus dispendio alterius sanguine subvenirem, è Cervicali Arteria molossi majoris ad latus ipsius alligati, atque compositi, sanguinem eousque immisi, usque dum ab irruentis ejus copia sese impleri nimis atque opprimi inquietudine sua rursus fateretur: quocirca arteria immittente iterum ligata, è cane recipiente rursus sanguinem detraximus, quod alternis vicibus toties repetitum est, donec in
duo.

duobus majoribus molossis, (quorum utriusque sanguinem minor canis exceperat) nec sanguis amplius, nec vita superesset: interea ut minor iste, licet tantum sanguinis per vices ipsi detractum sit, immissumque, quantum opinor totius corporis pondus æquaret, Jugulari tamen confuta, & vinculis, quibus detinebatur, solutis, à mensa protinus defiliit, & quasi injuriarum oblitus mox domino suo adblandiri, & quo à sanguine se mundaret, in gramine sese volutare, non aliter omnino, neque majore incommodi aut offensæ indicio, quam si in profluentem solummodo conjectus fuisset.

Horum fama cum mox *Londinum* pervolarer, accepta Epistola à *Clarissimo Boyleo* impense rogatus sum, ut totius experimenti methodum *Societati Regiæ* impertirem, quod non ita multo post à me præstitum, in *Philosophicis* ejusdem Societatis *Transactionibus*, *Decembre insequente Anno 1666.* publici juris factum est: &

tum rumor ejus ad exteras Gentes, & *Galliam* pervagatus est, ubi mox rei novitate allekti diligentius illam prosequi, & aliis subinde experimentis augere, illustrare, quodque ego solum in Brutis perfeceram, ad Hominis usum accommodare coeperunt; uti in scriptis illorum *Seq. Martio Anni 1667.* tunc primum editis, apparet: Atque hæc fatis bene, & ad Gentis istius laudem, quod Philosophiam, & Medicinam quoque modo ornare, vel adaugere satagunt; verum cum per Hominum ora jam ubique volitet hæc nuper inventa sanguinis Transfusio, & *Dionysius* quidam, Philosophiæ & Mathematices Professor, in Epistola nuper edita celeberrimi hujus experimenti inventionem mihi præripere, & sibi arrogare conetur; ut quo jure, quave injuria id fecerit, Lectori appareat, liceat *Clarissimi Boylai* ad me literas, & meum ad eas responsum hic loci inferere.

LONDINI, Junii 26. 1666.

A Deram (*Vir Clarissime*) proximo die Mercurii in solenni Societatis Regiæ conventu, in Collegio Greshamensi habito, ubicum à D. D. Wallis exaudiveram, difficillimum illud experimentum de sanguine ex Canum altero in alterum transmittendo Te tandem (*se præsentem*) feliciter absolvisse, rem plane dignam judicavi, quæ Celeberrimo isti Cætui innotesceret; adeoque Author eram, ut illi à Reverendo Viro rei, prout gesta fuerat, narrationem exigerent; cujus ille eam reddidit rationem, quæ apud nos existimationem famæ Tuæ non parum commendaret. Verum de tam insolito & insperato conamine varia particulatim interrogatus, expedire potius censuit, ut Tu de singulis scripto responderes, quam ille viva voce: quapropter & ego coram indicabam, Te mihi dudum pollicitum esse, rem illam (si quando votis responderet) Te mihi enarraturum; quod & Te præsti-

turum in me suscepi; idque eo plenius, cum Cætum hunc tam celebrem de ejusdem successu accuratius enarrando sollicitum intelligeres. Hoc itaque ut jam dignari velis obnixè rogo, totamque hujus negotii peracti methodum ordine exponere, quæ tam prospere successit. Quod eo pressius urgeo, quod ingeniosi admodum Viri aliquot, & satis Critici, nec creduli nimium, rem arduam judicaverint, & audacter dictum, cum ego ante aliquot menses obiter indicaveram, à Societate Regia ad id rogatus, quid Tu antehac jam tum Oxoniæ tentaveras; & quanquam tum temporis, propter instrumentorum apparatus non satis idoneum, non per omnia res ex voto successerat, non desperasset tamen me, quin illud postmodum absoluturus esses. Avocor ego jam hoc momento, ut non vacet mihi veniam deprecari, quod hoc Tibi facefferim negotii; quod tamen eo minus invitatus feci, quoniam Tuo non cessurum incommodo judicavi, si hac occasione tam auspiciata

*Spicata Celeberrimus hic Cætus Te
cognoverit, inter quos complures sunt,
qui Te & debite æstimant, & amice co-
lunt, & quidem præ cæteris,*

Tui amantissimus

Amico plurimum honorando
D. Richardo Lower, Medici-
næ Doctori, tradantur

Rob. Boyle.

Oxonii.

OXONII, Julii 6. 1666.

Accepi literas Tuas, Honoratissime
Vir, & prout à me expetis, totam
Transfusionis methodum eodem, quo
ipse ordine perfeci, Tibi breviter ex-
ponam: Itaque si canis, aut cujuscun-
que animalis, sanguinem lubet in ali-
ud, seu ejusdem, seu diversi generis,
transfundere, primo attollatur Arteria
Cervicalis altera, eademque à nervo
octavi paris separata fere ad digiti lon-
gitudinem denuдетur; deinde parsejus-
dem superior, Cerebrum versus, vin-
culo stringatur firmo arctoque, utpote
quod

quod laxare iterum, aut solvere per totum operationis processum non opus est; mox inferius, qua Cor respicit, eidem vasi ad distantiam semidigiti à prædicto vinculo altera colligatio aptetur nodo ita solubili, ut pro data occasione vinculum adducas cum velis, aut remittas: Ligaturis ad hunc modum ex utraque parte dispositis, & spatio intermedio duobus filis sub arteria trajectis, scalpello ipsa aperiatur, & calamus incisuræ Cor versus inseratur, cujus exterius foramen ligneo bacillo obturandum est: Arteria autem, qua calamo incluso superjacet, filis istis arctius circumductis firmiter vinciatur

In altero animali, quod prioris sanguinem admittere oportet, denudanda est Venæ Jugularis portiuncula semidigiti longa, cujus utrique extremo adhibenda ligatura, nodis utrinque ita connexis, ut ad libitum laxare possis, aut constringere. quorum interstitio bina quoque fila subter venam ducenda sunt, exinde facta incisione, foramini duo Calami-

lami inferendi, quorum alter, truncum Venæ descendentem spectans, cruorem ex alio cane influum excipiat, atque ad Cor deferat; alter sursum versus Cerebrum intrusus, proprium hujusce Animalis sanguinem in scutellas effundat: utrumque autem, non nisi ex occasione aperiendum, ligneo interim epistomio obturare oportet, & filis denique, ut supra, Venam circumligare.

Quo facto, tandem ipsi canes in latus inclinati juxta se invicem, quam commodò fieri potest, ita deligentur, ut calamorum unum alter excipiat: verum quia obtortis collis tam prope admove-ri non possunt, ideo præter extremos duos calamos, aliquot intermediis opus est, quibus & copulentur illi, & sanguis transvehatur.

Jamque rebus ad hanc rationem instructis, atque apparatis, jam primum aperiantur duo calami, nempe in hoc Animalis, qui in venam ipsius Jugularem descendit; in alterno, qui prodit ex Arteria ejus Cervicali; inter quos
post-

postquam alii, quot usus erit, interjecti sunt, atque invicem coaptati, si in utroque laxentur nodi, quos pro arbitrio solubiles esse jussimus, sanguis illico per calamos non aliter, quam per continuatam arteriam, facta veluti Anastomosi, impetuosius transilit: Quamprimum igitur Animalis recipientis collum laqueo strinxeris, ut fieri solet in Phlebotomia, aut saltem in oppositi cervicis latere Venam digito compresseris, exempto protinus obturaculo, aperiatur Calamus Jugularis superior, nimirum ut, sanguine alieno per Inferiorem irruente, proprius interim ex isto in patellas effluat, (partitis tamen hoc vicibus, atque interpolatim, habita semper εὐπορίας & virium ratione) donec tandem alter canis inter ejulatus, languores, & spasmos postremo animam cum vitali succo effuderit.

Peracta hac Tragædia, è Jugulari superstitis Animalis eximatur uterque calamus, nodisque, qui prius erant solubiles, jam firmitus obnexus, discin-
da.

datur Vena, id quod fieri potest nullo fere Canis incommodo, eo quod, Jugularium circa Laryngem præ larga existente ἀνατομῶσι, una earum sufficiat sanguine è Capite deferendo. Discisso vase consuatur cutis, laxentur vincula, & permittatur cani prosilire è mensa: enim vero ille tanquam suscitatus è somno, concusso paululum corpore, vivus valensque abit, alterius sanguine alacrior, forte & vegetior, quam suo.

Unicum hoc insuper monendus es, Præstantissime Vir, siquidem calami non ita stricte vasis alligari, aut sibi invicem adaptari possent, quin ex animalium contentione laxari, atque solvi denuo, & sæpe contingat, ideo consultius duxi in posterum fistulis argenteis in hoc constructis omnino uti; quæ ne à vasis, quibus inseruntur, rursus avelli possint, ideo in altero extremo, circulari aliquo annulo eminenti, & quo securius vasa desuper stringantur, eoduplici firmentur, qualem Tab. 7. fig. 1. exhibet; & quo minore Transfusio-

nis

*nis incommodo, siue vasorum periculo,
aut impedimento, præsertim ubi ani-
malia varie se jactant, & contorquent,
res peragatur, uniendæ sunt per duas
minores fistulas, inserendas Arteriæ
Cervicali, ex equo vel bove exemptæ,
quæ omnes ita conjunctæ sanguinem ab
immittente ex illa, ad recipientem ab
hac parte, fistulam convehant: cujus
arteriæ intermediæ, atque substitutæ,
hoc habemus amplius beneficium, quod
animalibus, varie licet renitentibus, o-
bediat, tum quod sanguinem in illa con-
tentum, si forte stagnare contigerit,
pro libitu propellere ulterius & surgere
vel pro re data prorsus suppressere po-
teris. Hæc scripsi, quo fidem Vestram
Illustrissimæ Societati pro me datam
liberarem, atque amplius ut innotes-
cat, nullo studio aut officio Tibi un-
quam defuturum*

Tui observantissimum

Honoratissimo D. D.

*Roberto Boyle, ita-
dantur Londini*

Richardum Lower.

Hæc

Hæc igitur non eo in hunc locum transtulimus, ut transfusioni ipsi jam satis notæ, lucem foenerentur, sed ut Lectori de Inventionis tempore, atque Authore melius constaret, omnis enim ad experimentum illud apparatus, atque in illo præstando operatio, in sequente Tabula tam clare exhibetur, ut alioqui supervacuum fuerit de eâ quicquam amplius memorare. *Tab. 7. fig. I.* in qua

a *Fistula argentea.*

b *Pars ejus, quæ Venæ, vel Arteriæ inferenda est, & circulari annulo duplici & eminenti donatur, quo securior de super ligatura fiat.*

Fig. 2. Exhibet fistulam argenteam pro sanguine in brachium humanum convehendo, formatam; in qua

a a *Fistula argentea.*

b *Parse ejus minor, quæ Venæ brachii inferenda.*

c *Pars ejus major, ubi sanguinem excipit.*

dd *Duo partis ejus folia, utrimque*
O
per.

*perforata pro trajiciendo filo, quo
bractea brachio alligetur.*

*e Sinus in medio inter utrumque
folium excavatus pro fistula im-
mittente commodius excipienda,
qui venam subiectam adeo com-
primit, ut nihil interim sangui-
nis ex illa exstillare, aut erumpe-
re possit, atque satis apte com-
parari potest foveæ in medio labii
superioris humani.*

*Fig. 3. Exhibet fistulas Arteriæ emit-
tenti, & Venæ recipienti adaptan-
das ante sanguinem transfundendum;
in qua*

a Arteria Cervicalis emittens.

*b Eadem Arteria, nodo iterum solu-
bili arte ligata.*

*c Fistula pro sanguine convehendo
arteriæ immissa.*

*d Locus, ubi Arteria super fistu-
lam inter annulos arte ligatur.*

*e Fistula pro sanguine excipiendo, &
in venam Jugularem transmit-
tendo.*

f Ve-

f *Vena Jugularis.*

g *Locus, ubi Vena ad fistulam arctè alligatur.*

h *Vena ligata nodo iterum solubili.*

Fig. 4. Exhibet Arteriam Cervicalem, ex equo vel bove exemptam, & fistulæ argenteæ utrinque adaptatam; in qua

a *Arteria Cervicalis.*

bb *Fistula utrinque Arteriæ adaptata.*

Fig. 5. Exhibet totum simul apparatus sanguinis, ab uno animali in aliud transfundendi; in qua

a *Vena Jugularis tendens ad Cor Animalis, in quod sanguis transmittendus est.*

b *Fistula argentea, in venam Jugularem immissa.*

c *Vena arctè ligata super fistulam.*

d *Vena ligata nodo facile solubili ultra fistulam.*

eee *Fistulae, & Cervicalis Arteria, intermediae, quæ sanguinem a fistula immittente in recipientem convehunt.* O 2 f Fi-

f *Fistula argentea ab Arteria emittente sanguinem excipiens.*

g *Arteria alterius animalis sanguinem emittens.*

h *Locus, ubi Arteria ad fistulam inclusam arcte alligatur.*

i *Locus, ubi eadem ultra fistulam ligatur nodo pro occasione iterum solubili.*

Fig. 6. Exhibet eundem apparatus pro transfundendo sanguine a bruto in Hominem, cujus usus ex prioris tatis intelligi potest.

Cum igitur exeunte *Februario Anni 1665 Transfusio* a me primo perfecta fuerit, atque *Clariss. Boylei* literæ ad me datæ sexto *Junii sequentis*, & proximo *Decembre* Responsum nostrum *Philosophicis Transactionibus*, quæ jam tum typis mandabantur, insertum: *Dionysii* autem nulla super ea re mentio, nisi integro post anno, facta fuerit, & præterea ipse fateatur (utcunque jam ante decennium, ut ait, de ea aliquid animo conceperat) esse tamen trans-

transfusionem possibilem, & quo ea modo fieri posset ex libellis Philosophicis Anglorum primum intellexisse; cuiudemum tribuenda sit hujusce experimenti inventio aliis judicandum relinquimus.

Sed cum quorundam Hominum ea indoles atque animus sit, ut nihil placeat, quod ipsi non invenerint, nihil bene & feliciter excogitatum sit, cujus sese Authores esse non venditent, non erit mihi admodum molestum, utique nullatenus conscio vel cogitati de ea re cujuspiam à quopiam alio, atque insuper de ea à me perfecta Clarissimorum Virorum testimoniis abunde ornato: nullus interim dubito, quin magno generis humani commodo inventum illud, cujus cujus sit, celebre. tur, si consulta & prudenti manu peragatur.

Quippe non est, quod cogitemus, sanguini humano illum cæterorum animalium minus, quam inter se mutuo congruere, quod tum nupera Gallo-

rum experimenta abunde confirmant ,
 & nos etiam non ita pridem experti
 sumus in quodam *A. C.* amabili qua-
 dam infania detento , cujus brachio
 diversis temporibus sanguinis ovini a-
 liquot uncias in conventu *Regiæ So-*
cietatis immitti curavimus , atque id
 absque omni ejus incommodo : ve-
 rum amplius ut nos hoc in eo cum
 aliquo etiam ipsius fructu experire-
 mur , statueramus hoc idem ad men-
 tem illi saniozem procurandam aliquo-
 ties repetere , nisi genio ille magis ,
 quam salutis suæ consulens spes nostras
 omnino elusisset.

Verum enim vero cum ex æquo non
 omnibus competat alienum sanguinem
 admittere , neque ullum sit tam utile
 remedium , cui temeraria atque impor-
 tuna administratio infamiam non facile
 intulerit , operæ pretium fore existi-
 mo , si paucis saltem & breviter in-
 nuam , in quibus corporibus , & quo
 potissimum valetudinis statu , trans-
 fusio tentanda sit.

Quo.

Quorum igitur sanguis valde putridus, diuque corruptus est, aut extraneo & venenato fermento penitissime imbutus, tum quibus viscera inquinata & labefactata sunt, prout in scorbuto, lue venerea, lepra, veneno, aut morbo aliquo diuturno & putrido infectis passim accidit, non est, quod beneficium aliquod aut iuvamen ex transfusione expectent.

Nimirum impurus sanguis repetito per viscera transitu vitia atque inquinamenta sua iis affigit, fermenta corrum-
corrumpit, & tandem propria qualitate ac indole ita imbut, ut novus aliunde, è quocunque licet sano animali, substitutus, dum per easdem partes continuo circulatur, contracta labe in eandem diathesin cito degeneret, non aliter quam vinum à mucido vase odorem & vitium mox contrahit.

*Sincerum nisi vas, quodcunque
infundis acescit.*

Verum è corporibus bene constitutis si forte importuna venæ sectione, il-

lato vulnere, aut quacunque demum hæmorrhagia, sanguis ea copia detractus aut deperditus sit, ut subsidium aliunde præsentaneum requirat, nullus dubito, quin brutorum sanguis in amissi locum secure possit, & cum fructu, substitui. Quinetiam in arthriticis, & Maniacis, quorum corpora robusta, firma viscera, & Cerebri crasis nondum vitiata, quin & sanguis nulla putredinis labe infectus est, fortassis non minus beneficium ex recentis sanguinis infusione, quam veteris detractioe sperandum est.

Quamobrem ut majore Hominum fiducia, & operandi consuetudine, celeberrimi hujus experimenti usus confirmetur, atque utilitas innotescat, mihi profecto res visa est non indigna, quæ Medicorum omnium curæ, & ubicunque experiundi occasio sese obtulerit, universo orbi commendetur.

Interim hoc saltem Gentis nostræ seu felicitati, seu etiam laudi tribuatur, quod uti *Harvejus* sanguinem intra

tra propria vasa *circulantem* corpori suo vitam præstare primo docuerit; ita & eum extra corporis sui ambitum ad alterius salutem *transferri* posse, à nobis primo detectum est.

CAPUT V.

De Chylo, ejusque in Sanguinem Transitu, & Transmutatione.

QUa ratione, in casibus quibusdam extraordinariis, & magnis hæmorrhagiis, sanguis immediate subministrari possit, in capite superiore ostendimus. Jam porro considerandum venit, quomodo necessaria ejus dispendia, atque (ut ita dicam) quotidianæ expensæ instaurentur; quod aliunde fieri non potest, quam ex Chyli in illum influxu. Chylus autem cum ex ingestis alimentis in ventriculo, fermenti ipsius ope, conficiatur, unde illud continuo suppeditetur, paucis inquiramus, priusquam de Chyli in Sanguinem transitu atque transmutatione fusius disseramus.

A Veteribus plerisque, & à quibusdam etiam ex Neotericis, apud quos sacra in omnibus Veterum est auctoritas, passim statuitur, per Vas breve commercium quoddam dari inter lienem & ventriculum, atque ab illo viscere ventriculum menstruum acidum mutuari, quod facultatem ejus concoctricem adjuvet. Cui opinioni licet circulatio sanguinis satis aperte reclamet, cum tamen ex ipsa fabrica & conformatione vasorum, quæ lieni cum ventriculo communia sunt, res magis elucescat, & quo nemo ejus ignarus amplius molestus sit, istarum partium descriptionem hic plane tradam.

Vasa igitur ad lienem & ventriculum, præter nervos & lymphæ ductus, nulla nisi venæ & arteriæ pertingunt, & primo quod ad *Arteriam Celiacam* spectat, illa ex Aorta paulo supra Arteriam Mesentericam exoritur, unico trunco, qui mox dividitur in plures ramos, quorum

Primus Hepati, Pancreati, & Intesti-

testino Duodeno totus impenditur.

Secundus ubique per totam ventriculi superiorem regionem disseminatur, indeque arteria Epigastrica appellatur.

Tertius vero arteriæ Coeliacæ ramus, qui & omnium maximus est, in duas propagines dividitur, quarum Prior quidem versus sinistram lienis partem procedit, sed ubi lienem appropinquat, diffissa quasi in bivium, furculum unum in ventriculi fundum exporrigit, alterum in lienem reflectit: Secunda vero rami hujus propago, paulo ulterius protracta, prope alteram lienis partem, in quatuor furculos dividitur, quorum duo in lienem reliqui in ventriculum quaquaversum explicantur.

Si autem alterutri horum ramo majori atramentum vel lac è siphone injiciatur, clare & perspicue videbitur, liquor postquam ad commune istud bivium vel quadrivium pervenerit, in lienem & ventriculum simul deferri;

adeo ut si circulatio sanguinis id ipsum non suaderet, vel hinc tamen clare pateret, nihil per has arterias à liene in ventriculum, aut vice versa, deferri posse, cum sanguis aliunde simul in utrumque projiciatur.

Venas autem Splenicæ hoc non posse præstare, circulatio sanguinis multo magis probat, verum ut hoc quoque clarius adhuc ex ipsarum conformatione appareat, Venas Lienares, earumque divaricationes, quæ liquorem suum cum venis à ventriculo redeuntibus communicant, breviter explicabimus.

Ut igitur omnes Arteriæ, quæ sanguinem in hepar, pancreas, duodenum, ventriculum totum, lienem, & omentum deferunt, unico trunco ex Aorta oriuntur; ita pariter Venæ omnes, quæ ab omnibus istis partibus proveniunt, & sanguinem ab illis reducant, in unum truncum coeunt, in Venam Portam terminantur.

Venæ illæ, quæ inter ventriculum
&

& lienem brevibus furculis sibi mutuo occurrunt, & ideo *Vas Breve* appellantur, nihil aliud sunt, quam rami venarum à ventriculi fundo descendentes, quibus in medio fere spatio alii à liene provenientes obvii fiunt, & melioris conductus gratia conjuncti in unum truncum coeunt, qui sanguinem ab utroque redeuntem, & jam commixtum, versus Portam convehit; adeo ut sanguis à ventriculo reductus: alteri à liene obviam factus, & in unum truncum exceptus, sit quasi duo rivuli minores, in unum fluvium confluentes, & versus communem utrinque Oceanigremium simul properantes. Eodem modo fit in aliis venis, quæ inter dextram, sive anticam henis partem, & ventriculi fundum dextrum commercium quoddam facere videntur: nimirum duæ venæ utrinque prodeuntes in medio inter utrumque spatio, quasi plateæ plures in communem aream excurrentes, & postea in unicum truncum coalescentes, in Venam Portam terminantur. Quod

Quod autem nihil per Vas Breve, five venas istas à liene in ventriculum deponatur, præter circulationem sanguinis, valvularum etiam structura satis probat; quippe in isto venarum, à liene & ventriculo provenientium, congressu valvulæ existunt, quæ refluxum sanguinis in ventriculum, aut lienem utrimque impediunt, nam si truncus Rami Splenici infra congressum istum ligetur, & sanguinem à venis Splenicis in venas Hypogastricas urgere tentaveris, statim venæ citra valvulas intumescunt, & disrumpuntur potius, quam aliquid sanguinis transmittent, ut cuilibet promptum & facile erit in animali majore experiri, in quo vasa hæc ampliora existunt.

Ad hæc observare est, canes, quibus lien exsectus est, nihilominus voraces esse atque ciborum avidos, sed assumpta quælibet æque cito conficere, ac si viscere illo mutilati non essent.

Constat itaque, lienem nihil ad ventriculum immediate transferre, sed aliunde,

unde, atque ex ipso sanguine petendum est fermentum hoc, quod ingesta omnia in cremorem lacteum dissolvat. Cujus rei id quoque non leve est argumentum, quod melancholia hypochondriaca affecti, humore salino in ventriculum deposito, magna boulimia sæpissime tententur, & quamdiu appetitus iste durat, ab omni dolore corporis immunes sint; humore vero isto acri & ferino, metastasi quasi facta, in alias corporis partes deposito, cruciatus & spasmi cieantur, interea etiam ut ventriculi appetitus omnis, & digestio propter defectum ejus penitus flaccescat; quod hypochondriacis fere omnibus solenne est, atque malæ sanguinis diathesi potius, quam lienis vitio, proxime imputari debet.

Cum autem ventriculus omni fibrarum genere instructus sit, uti cibum demissum primo undique complicat, & blande amplectitur, ita postquam pars ejus aliqua dissoluta, & in mollem materiam, disjunctis ab invicem particulis,

culis, redacta fuerit, eam continuata fibrarum contractione in intestina propellit, unde à Venis Lacteis, passim per intestina dispositis, absorbetur.

Et quoniam Vasa Lactea angusta admodum, & perexiguus orificiis prædita sunt, ut puriorem tantum, & defæcatiorē massæ fermentatæ partem ex intestinis excipiant, ideo tantus intestinorum ambitus factus est, ut eo plura hujusmodi vasa admittant; quo fit, ut vasorum parvitas ab ipsorum numero compensetur, quare cum venæ Lactææ in superioribus intestinis sufficienti Chyli copiæ assumendæ, tum numero, tum meatibus, omnino impares sint, ideo intestina eo ingenio constituta sunt, ut continuo fibrarum motu, à pyloro usque ad intestinum rectum successively propagato, sese perpetuo contrahant, & ita chylum deorsum detrudant, quo vasorum omnium orificiis offeratur. Dum vero eorum ora præterlabitur iste succus, utiles & alimentosæ

tosæ partes ab excrementis separantur, atque tinctura solum defæcatior & purior in Venas Lacteas transit, crassiore & fæculentior parte, veluti capite mortuo, in intestinum Rectum detrusa. Quo autem modo secretio hæc perficiatur, non aliunde datur intelligere, quam ex eo quod diversi pori in interiore intestinorum tunica ita dispositi & configurati sint, ut cremorem solum lacteum admittant, crassiores vero partes, cum nullam habeant similitudinem, aut proportionem cum intestinorum poris, per quos in Lacteas transitus fit, ideo illibatæ prætereunt, & à motu intestinorum deorsum usque depelluntur; si autem Venæ Lactææ in cavitatem intestinorum apertis osculis, & immediate hiarent, non solum fæculentior & impurior pars massæ, in intestinis contentæ, sed & flatus & halitus fætidii & stercoracei perinde in sanguinem transfirent, cumque pessime inquinarent.

Cæterum ut ipse hujusce rei experi-

P

men-

mentum facerem, in animali, cibus prius optime satiato, intestinum Jejunum, vulgo ita dictum, ubi in ilia transit, arcte ligavi, atque folle per pylorum immisso aërem valide immisi, cumque intestinum illud satis distentum esset, pylorum pariter fortiter strinxi, & dein postea intestinum aëre usque adeo repletum & tumefactum manibus compressi, & expectavi ilico, chylum in venis lacteis statim ab insequente aëre versus commune receptaculum impulsus iri, quod neutiquam tamen successit, adeo ut certum sit, venas lacteas in intestina rectà non hiare, neque spiritum ullum aut flatum in illas admitti.

Et cum præpeditum aëri aditum esse in venas lacteas constaret, experiri subiit in alio animali similiter pasto, annon facilius liquori cuilibet tenui ingressus pateret; ligata ergo eadem intestini parte, per pylorum spiritum vini atramento tinctum infudi, eoque constricto intestinum atra hac tinctura tumi-

tumidum leniter primo, dein arctius compressi, suspicione quadam ductus, tenui saltem & subtili huic liquori æque ac chylo aditum datum iri, sed aliter omnino evenit; neque enim chylus in venis lacteis intestino proximis colore isto infici, aut alterius liquoris quicquam versus commune receptaculum impelli videbatur; unde opinari licet, venas lacteas non directe & immediate in intestina hiare, sed oblique inter eorum tunicas ferri, antequam in cavitates intestinorum penetrent, non aliter forsan ac ductus communis in duodenum, aut ureteres in vesicam terminantur; quo fit, ut quo fortius latera intestini aut vesicæ ab intus contentis distenduntur, eo arctius eorum ostia claudi contingat: quare verisimile etiam videtur, chylum non omnino in venas lacteas exprimi, cum hujusmodi intestinorum contractio & corrugatio ipsi potius aditum præcludat, in quantum scilicet lactearum meatus & canales inter tunicas intestinorum perre-

prantes, constringit: adeo ut motus iste intestinorum continuus, & peristalticus, ut vocatur, cum solummodo in finem fieri videatur, tum ut chylum, in lacteas receptum, versus commune receptaculum urgeat, tum etiam ut massam chyli, è ventriculo exclusam, deorsum propellat, & lacteis omnibus absorbendam sistat, cum autem motus iste vermicularis, & per vices interpolatus sit, probabile est, tunc temporis chylum in venas istas assumi, quando pars aliqua intestini à motu & corrugatione conquiescit, & proinde officia lactearum laxiora, & patentiora sunt.

Cum autem chylus per hujusmodi poros & angustias ex intestinis in lacteas transeat, à ratione non alienum videtur, ab humore è pancreate in duodenum secreto, pro faciliore transitu, magis dilui & attenuari, quippe cum glandula illa reliquis omnibus adeo affinis sit, ut ejusdem substantiæ atque

que texturæ videatur, atque humor omnis, è glandulis quibuscunque separatus, similis omnino, & velut lymphæ tenuis, & pellucidus sit, quidni eisdem usibus inservire credendum sit? Quocirca uti glandulæ, circa os & fauces sitæ, lympham suam inter mastigandum exstillant, qua cibos perfundant, & emolliant, (tum ut facilius in ore volutandos, tum ut prompte magis deglutiendos reddant,) ita maxime verisimile mihi videtur, magnam illam glandulam eo loci sitam esse, atque ductum istum in intestina apertum, ut lymphæ, inibi secreta, cum descendente chylo misceatur, quo angustos lactearum canales promptius ineat, & magis libere & expedite pertranseat; & quoniam chylus in vasis lacteis, aut ob crassitiem suam, aut liquoris potu-
lenti inopiam, (qui pro vehiculo est) aliquando stagnare, & concreescere, & proinde vasa illa penitus opplere, & infarcire aptus est, ideo glandulæ in mesenterio passim constitutæ videntur, ut

similem præterlabenti chylo lympham affundant, quo tenuior & dilutior (qualis semper ultra glandulas mesenterii apparet) continuo evadat. Et licet in alios præterea usus lymphæ hæc inservire possit, cum tamen tantum periculum sit, ne chylus intra minutos & capillares istos ductus subsistere, & crassitie sua sibi ipsi viam obstruere, aut longiore mora concreescere possit, ideo præcipue à summo Conditore cautum esse videtur, tum ut lymphæ, è Pancreate in intestina transmissa, perfundatur, quo facilius in lacteas transeat, tum ut in media inter intestina & receptaculum via, eadem tenuissima lymphæ, iterum in glandulis mesenterii separata, diluatur, quo reliquum cursus sui stadium versus commune receptaculum absolvat.

In quod receptaculum venæ lacteæ omnes, veluti totidem fistulæ, in commune lactis castellum sese exonerant; & ne inibi stagnet, & concreseat chylus, vasa lymphatica omnia, quæ ex
toto

toto inferiore corpore, & visceribus, & glandulis omnibus in abdomine contentis, proveniunt, lympham suam in receptaculum deponunt, tum ut tenuissimo liquore suo illud nitidum semper, & elime conservent, tum ut chylum pro faciliore per ductus thoracicos transitu magis diluant: & ne in medio inter receptaculum & Venam Subclaviam itinere quacunque de causa concrescat, glandulæ plurimæ minores, ubique circa viscera pectoris dispositæ, lympham suam in ductus chylicos diversis in locis inferunt, Deo providente, ne vitæ nostræ subsidium unicum commeatu libero ullibi caret.

Et quandoquidem chylus per vasa Thoracica, præsertim in erecto corporis situ, ut in Homine, difficiliter adscendit, & proinde ob motus tarditatem ad coagulandum proclivior est, ideo inter tendines diaphragmatis, ubi spinæ alligantur, magnum hoc receptaculum constituitur, quo fit, ut quo-

ties diaphragma in omni inspiratione contrahitur, tendines isti valde attracti sacculum hunc lacteum, modo chylo turgidus fuerit, plurimum comprimant, & exagitent, adeoque chylum in illo contentum per ductus chylicos in venam Subclaviam propellant, & continuo vectigali massam sanguinis, continuo pereuntem, instaurant.

Quoniam autem sanguis, vitæque ipsa, à continuo recentis chyli influxu dependet, necesse est, ut chylus via libera & aperta semper in eum transeat; quare ductus chylicus per totum fere tractum à receptaculo ad venam Subclaviam usque, nisi prope Cordis regionem, duo sunt, & instar scalæ latera mutuo communicant, non alium certe in finem, quam ut si alter obstructus fuerit, chylus per alterum ascendat.

Ne denique idem chylus ad ipsum limen impingat, aut quoque modo præpediatur, ideo ostio plerumque duplici,

plici, nonnunquam etiam pluribus, (aut sicubi unicum tantum reperiatur, id laxius esse solet) in venam Subclavi-
am suffunditur, & ne sanguis præterla-
bens in aperturam ejus incurrat, ipsam-
que oppleat, valvula isti, quasi oper-
culum, obducitur, quæ sanguinem, à
vena Jugulari & Axillari redeuntem,
rejiciat, & obtento quasi velo, fora-
men illud ab irruentis sanguinis affluxu
defendat, ut ex *Tab. 6. Fig. 2.* infra ex-
plicata apparebit.

Atque hæc via unica est, qua chylus
è ventriculo & intestinis in ipsum san-
guinem & Cor infunditur; verum quia
nonnulli in eodem cum Veteribus er-
rore etiamnum versantur, venasque
Meseraicas chylum ex intestinis exci-
pere confidenter statuunt, ipse ut de
hac recertior fierem, seriam aliquando
impendi operam, atque non uno expe-
rimento tandem mihi constitit, totum
chyli penum nulla alia via, quam per
ductus chyliferos, in sanguinem infun-
di; si enim cursus ejus per vasa Tho-

racica impediatur , animal , qualicun-
 que cibo fatiatum , intra paucos dies
 fame penitus interibit , quod in duo-
 bus canibus expertus sum ; alterius e-
 nim thorace in dextro latere intra duas
 costas inferiores aperto , digitum im-
 misi , & ungue velut in ferram resecto ,
 commune receptaculum tribus horis à
 pastu valde turgidum perfregi , & la-
 ceravi , ut chylo in cavitatem thoracis
 exitu dato , transitus ejus in ductus
 chyliferos penitus interciperetur ; quo
 facto , & confuto vulnere animal hoc
 cibo , quantum capere voluit , postea
 satiavi , cum autem intra paucos dies
 exspiraret , & à me statim disseicaretur ,
 ventriculum atque intestina valde re-
 pleta , quin & venas lacteas chylo ple-
 nas inveni , nihil autem ejus in toto
 ductu Thoracico apparuit , verum in
 eo pectoris latere , in quo commune
 receptaculum apertum fuerat , duæ li-
 bræ chyli repertæ sunt , unde certo con-
 stare arbitror , ob præpeditum chyli
 per ductus Thoracicos transitum , ani-
 mal ,

mal, ventriculo licet cibis referto, tamen fame periisse.

De quo tamen ut certior redderem, alterum canem simili modo, sed in adverso, seu sinistro latere, inter tertiam & quartam costam superiorem, perforavi, qua in regione ambo ductus chyli-feri, in unum plerumque truncum coeunt, qui deinceps ex latere oesophagi inferiore, ubi musculo substrata incumbit, versus venam Subclaviam sub communi pectoris tunica incedit; immisso itaque per vulneris orificium digito, ductum quoque istum diffregi, quo disrupto, chylus in cavitatem sinistram pectoris exire, ulterius vero penetrare neutiquam potuit; quare vulnere curato, canem per paucos dies bene pastum detinui, ex quo tempore elanguescere coepit, & paulo post obiit: cum autem thoracem ejus diffecarem, claustrum illud pectoris, ubi ductus iste disruptus fuisset, chylo penitus repletum, & pulmonem lateri isti agglutinatum inveni, quo autem certior forem,

rem, canalem istum usque adeo per-
ruptum esse, ut nihil chyli ulterius de-
ferre potuerit, aquam è siphone in du-
ctum chyliferum inferius injeci, quæ
ultra, quam canalis iste perruptus fue-
rat, penetrare non potuit, sed in ca-
vitatem pectoris tota exiliit, claro sa-
tis argumento, chylum per venas me-
sentericas non intrare, neque ullam ali-
am dari viam, qua sanguini misceatur,
cum animal ex transitu per vasa thora-
cica impedito tam certo intereat. Quin
& hoc denique ante omnia confirmat,
chylum in venas mesentericas non influe-
re, quia si sanguis ab animali ita tracta-
to post diem unum aut alterum adima-
tur, nihil chyli in illo apparebit, licet
paucis antea horis optime pastus fue-
rit, quod aliter omnino fieri debuit,
nisi influxu ejus hoc modo prorsus in-
terciperetur.

Et profecto mirandum est, quen-
quam, re ita clare pertractata, Hepatis
patrocinium amplius suscipere, atque,
ut ipsi sanguificationis munus postlimi-
nio

nio asseratur, *Ludov. Bilssi* experimentum *Pecquetto* objicere; nam & *Bilssianum* illud frustra semper tentavi, & experimento insuper hoc nostro conficiam, ut chylus nulla alia via, nisi per *ductus Pecquettianos* sanguini instillari, & commisceri in posterum credatur.

Quemadmodum enim ductibus istis disruptis chylus omnis in cavitatem thoracis effluit, ita si ductus iste in lævo pectoris latere, (orificio ibi prius facto) immisso digito per horam comprimatur, chylo, quia alius in sanguinem transitus non datur, commune receptaculum, & vasa lactea omnia in mesenterio, atque infima parte ventris adeo turgescunt, & distenduntur, ut nunquam clarius, aut perspicue magis ostendi possint; nempe jucundissimo spectaculo constat, qualis eorum fabrica, valvulæ, anastomoses, quam varii præterea mæandri eorum sint, quam densa serie totum intestinorum ambitum & superficiem perreptent, quam

quam infra receptaculum multiplici ordine dispositæ, non secus ac uniones in puellarum monilibus, turgescant, ut certe quicquid de iis hætenus à quopiam scriptum, aut delineatum fuerit, prorsus nihil sit.

Quin & observatione præterea valde dignum est, ex obstructo hoc ductu Thoracico, chylum in vasa lymphatica, tum in pectore ubique, tum in abdomine disposita, renitentibus licet valvulis, adeo insinuari, & retro urgeri, ut primo forsan intuitu incautis imponere possit, & *ductus Bilsii* roriferos adesse suadeat; licet revera non aliunde hoc eveniat, quam quod succus iste albus propria via præpeditus, in vasa illa regurgitet, non aliter forsan, quam ab inundante mari flumina in alveos suos repressa irruenti æstui locum cedunt; atque ideo uti resfluente mari flumina iterum intra ripas suas subsidunt, ita remota ista compressione, & chyli in sanguinem introitu restituto, chylus totus iterum in ductus Thoracicos re-
for.

forbetur, & in vasis illis lymphaticis nullum sui vestigium post se relinquit.

Cujus experimenti administrati modum exhibet *Tab. 6. Fig. 2.* in qua signantur ad

a a *Ductus chyliferi duo, in unum truncum in sinistro pectoris latere coeuntes.*

b *Locus, ubi immisso digito truncus iste comprimitur.*

c c c c *Valvulae ejus, quae à regurgitante chylo ex obstructo ductu utrinque infra compressionem intumescent.*

d *Truncus supra compressionem, propter impeditum chyli transitum, flaccescens.*

e *Vena Jugularis.*

f *Vena Axillaris.*

g *Eadem vena, ubi Venae Cavæ descendenti accedit.*

h *Ostium ductus chyliferi, ubi chylus à communi receptaculo allatus, in venam Subclaviam infunditur.*

i *Val-*

i Valvula apertura isti apposita, quæ sanguinem, è venis Jugulari & Axillari redeuntem, ita transvehit, ut influenti chylo impedimento non sit.

Cum autem experimentum hoc adeo jucundum sit, atque facile ab exercitata manu perfici possit, ejus faciendi modum atque rationem paulo accuratius enarrabo.

Retracto itaque canis, ut ita dicam, brachio sinistro, perforetur thorax paulo supra regionem Cordis, intra tertiam & quartam costam superiorem, qua in regione ductus iste ex latere oesophagi inferiore, supra musculum gulæ substratum, singulari fere trunco incedit, dein immisso digito totus oesophagus ad musculum istum compellendus est, quo fiet, ut ductus quoque obturetur; ita tamen insinuari digitus debet, ut ab arteria Axillari, proxime incumbente, abstineat, atque ita per horam detineatur, (& si artus canis, post immissum digitum, paululum

lum laxentur, magis tranquille feret) quibus peractis, notatu dignissimum est, quamdiu compressione ista motus chyli intercipitur, nihil ejus in detracto sanguine apparere, modo hujusmodi operatio statim à pastu administretur; intermissa autem compressione, intra dimidium horæ sanguini rursus detracto lactis crudi magna copia innabit.

Postquam autem totum chyli tractum, ab intestinis ad venam Subclaviam usque, ad hunc modum exhibui, tantum restat, ut ostendam, quomodo illi cum sanguine conveniat, & quot mutationum vices subeat, antequam in nutrimentum partium facessere, aut in ipsum sanguinem assimilari aptus sit. Quare advertere oportebit, chylum perenni influxu sanguini instillatum, eique sensim commissum, simul cum illo deferri, & pro longiore, aut brevior ejus in massa sanguinis fermentatione, & circuitu, plus aut minus coqui, & elaborari.

Q

Si

Si enim dum adhuc recens est, & nondum per plures horas in sanguine coctus, in mammas & ubera deponatur, adeo naturam & pristinam faciem suam retinet, ut neque gustu, aut colore ab ipso chylo distingui possit, ut in gravidis animalibus sæpe expertus sum; cum enim chylum è communi receptaculo exceptum, & ipsum sanguini detracto innatantem, & lac ipsum ab uberibus expressum inter se conferrem, nullum omnino discrimen percipere unquam potui, (nisi quod chylus in receptaculo aliquantum falsior esset) atque ideo dubitandum non est, lac omne in ubera & mammas ab ipso sanguine per arterias mammarias deponi, neque frustra quærendi sunt alii ductus, qui immediate magis è ventriculo & intestinis lacteum hunc succum in illas transferant; nam cum sanguis huiusmodi chylo turgescat, cumque is continuo simul cum sanguine in omnes partes corporis propellatur, quidni conicere liceat, ad singulos ejus appulsus

sus album hunc succum in uberum colatorio separari, & in vasa excretoria, & tubulos lacteos transire.

Neque enim chylus sanguinis massæ confusus naturam & indolem suam mox adeo exuit, ut albedinem suam illico deponat, sed diuturno aliquo spatio crudus omnino, & lacti similis cum illo circulatur, quod quispiam quotidie experiri poterit; si enim animali quatuor vel quinque horis, aut longiore temporis intervallo, post largiorem pastum sanguis è quacunque vena, vel arteria detrahatur, magna chyli lactescentis copia cruori coagulato innatare conspicietur, ut alibi observavi. Quin & hoc ipsum in diversis Hominibus expertus sum, quibus cum post largum jentaculum, aut prandium vena incidetur, vascula omnia lacte magis, quam sanguine, repleta videbantur; quod phænomenon licet ab antiquis Medicis observatum fuerit, ratio tamen ejus eos prorsus latebat.

Uti autem chylus, sanguini licet

commiffus, colorem fuum pluribus adhuc horis retinet, ita fi diutius cum illo circuletur, à diuturna illius cum fanguine coctione, albedine prorfus depofita, in ferum attenuatur; fi enim longo poft paftum intervallo Venæ Sectio fiat, nulla lactis fpecies fupererit, fed ferum folummodo cruori coagulato innatabit: at vero licet craffitie & color multum inter fe differre videantur, hoc tamen chylus ille, fanguini fuffufus, ferumque cruori detracto innatans, commune habent, quod fi lento igni admoveantur, quouſque partes aquoſiores exhalaverint, in gelatinam pariter utraque concreſcant.

Quibus vero modis, & mutationis gradibus chylus in ſanguinem aſſimiletur, & in nutrimentum partium faceſcat, ut melius intelligatur, ſciendum eſt, ſpiritum vitalem, aliaque in ſanguine principia activa in chylum jugiter inſtillatum agere, eumque minutiffime ſubigere; quin & cum chylus fale, ſulphure, & ſpiritu copioſe turg-

ge.

gescat , quamprimum compages ejus à fermentatione laxatur , particulæ istæ activæ motus libertatem adeptæ , cum partibus sanguinis , quæ similis & congeneris naturæ fuerint , sese prompte associant , & in sanguine , (ut in vino , aliisque ejusmodi liquoribus) contingit , ut ubi spiritus dominio potiti sint , particulas omnes crassiores , & sæculentiores , quibus impinguntur , à massa sua deturbent & expediant , quo reliquam liquoris partem defæcationem & puriorem reddant .

Postquam vero chylus ita perficitur , idoneus omnino fit , tum quiliquori sanguineo restaurando , tum corpori toti nutriendo sufficiat , cum enim ex diversis principiis & partibus constet , atque variæ & diversimodæ indolis & naturæ sit ; ideo pro vario partis cujusque usu & indigentia , & ut poris diversis & meatibus respondet & configuratur , ita varie partibus apponitur , unde pars ejus maxime volatilis & subtilis in Cerebro secernitur , & spiritibus

bus reficiendis addicitur, pars vero glutinosior corpori nutriendo apponitur, & sulphurea calori redintegrando destinatur: dum vero per totum corpus una cum reliquo sanguine trajicitur, pars ejus serosa & salina per Renes separatur, & transpiratione insensibili, aut sudore evacuatur, austa in hepate deponitur, reliquaque ejus recrementa in diversa corporis emunctoria, quasi totidem fecernicula, abscedunt, unde reliqua ejus massa depuratiores usque, & clarior evadit.

Atque in hoc solo vitæ nostræ ratio omnis consistit, tum ut sanguis continuo suo per corpus universum ambitu calorem & nutrimentum circumferat, tum ut recens usque chylus debita copia, & mensura sanguini instilletur, qui liquorem ejus in dies decrescen-tem pari pabulo recreet, & perenni irrigatione reficiat.

De Catarrhis.

Inter *Miranda* Nili nullum majus celebratur, quam quod tanto alveo decurrens, atque per omnem Ægypti terram quotannis exundans, dubiam adhuc originem fontemque, ex quo profluit, incertum habeat; pari ratione in Corpore animato, licet Catarrhus tanta copia atque impetu descendat, ut torrente suo ipsum animal sæpius obruat suffocetque, ubi tamen accumulatur, atque unde exstillat, à plerisque Medicis etiamnum pro obscuro & recondito habetur.

Quapropter postquam in superioribus de Sanguine & Chylo, certissimo omnium in Corpore Humorum penu, hucusque differuimus, in hoc capite *de Catarrho*, qui à serosa eorum parte dependet, paucula adjiciemus, quantoque possumus compendio & perspicuitate conabimur ostendere,

1. Unde materia ejus constat.

2. Qua plerumque de causa excitatur.

Q 4

3. Qui-

3. Quibus meatibus & viis fecernitur.

4. Qua denique curationis methodo sistendus fit.

1. De viis, quibus Catarrhus fecernitur, licet inter Medicos plerosque nondum satis convenit, ab omnibus tamen in confesso est, materiam ejus ex sero sanguinis constare; quemadmodum enim parte potulenta atque liquida omnino opus est ad diluendum Chylum, quo facilius & promptius per lacteas in sanguinem transeat, ita & sanguinis liquor cum perpetuo motu atque agitatione effervescat, ipsumque per poros corporis continuo trahici, & per tantas partium angustias urgeri oporteat, sero plurimo perfundi debuit, ne calorem nimium conciperet, aut crassitie sua sibi ipsi cursum & vias obstrueret; quod serum quamdiu cum reliqua sanguinis massa æquabilem mixtionem pariter & ejusdem sanguinis nomen retinet; ubi vero à reliqua massa seccedit, & pro diversa partium

tium

tium dispositione per has aut illas partes separatur, pro vario per eas transitu diversa nomina sortitur, unde vulgare illud carmen *Salernitanum*

*Si fluat ad pectus, dicatur Rheuma
Catarrhus,*

*Si ad fauces Branchus, si ad nares
esto Coryza.*

2. Quanquam autem expediendo sanguinis cursui, atque æstibus ejus temperandis ex Naturæ instituto serum ejus maxime inservit, atque ea est utriusque invicem necessitudo, ut iisdem vasis & intimo partium complexu simul deferantur: quæ tamen tam arcta rerum combinatio & unio est, ut non levibus aliquando de causis in diversas partes defiliant? cum autem plurima forsan in causa esse potuerint, quod serum à sanguine separatur, at certe à nulla id fieri solet frequentius, quam à prohibita transpiratione; quandoquidem enim sanguinis calor atque æstus insignis sit, & plurimi halitus & effluvia è massa ejus per poros corporis un-

dique & semper avolent; cumque particularum sive fuliginum, quæ feri obvolutæ, vaporis specie, è corpore exhalant, magnum & constans dispendium, & pro conservanda valetudine summopere necessarium fuerit; si quando cutim & habitum corporis ex suscepto frigore subito constringi, adeoque porosejus arctari, aut penitus obstrui contingat, quo minus sulphurea & serosa illa sanguinis recrementa eliminari patiantur, in ipsam massam ejus denuo redundant; è qua nisi statim exterminentur, ipsa in febrem aliquando accenditur, non aliter ac foenum madide repositum, ventilatione prohibita, flammam & incendium brevi concipit, sæpius autem evenit, ut particulæ illæ in sanguinem receptæ massam ejus, febrili ebullitione nondum coorta, sine damno trajiciant, & tum, nisi ventrem subducant, aut per renes præcipitentur (uti corporibus repentino frigori expositis, aut in gelidam immerfis, sæpe accidit) metastasi statim facta in glandu-

dulas circa nares, os, aut laryngem confitas deponuntur, atque inde magno aliquando pulmonis periculo destillant.

3. Cum autem apud omnes fere confiterit, Catarrhi materiam ex fero sanguinis constare, ortum vero ejus & occasionem plerumque à præpedita per poros corporis transpiratione dependere, in iis fusius explicandis supervacaneus forem; at quoniam vulgaris fert opinio, neque apud hominum vulgus solum, sed & doctos ubique Medicos error iste adhuc obtinuit, ut Catarrhos, & omne defluxionum genus à Cerebro provenire, & suo in pulmonem decubitu phthifin inducere statuant, contrarium hoc in loco evincere adnitar. Et quoniam aquam in ventriculis Cerebri congestam per os Cribriforme in nares, per glandulam vero Pituitariam in palatum destillare solummodo agnoscant, eam partium istarum structuram esse ostendam, ut neutro modo id fieri possit; Supposito
ita

itaque, quod postea clarius patebit, nullum omnino humorem à cerebro & ejus ventriculis, nisi per Infundibulum, in glandulam Pituitariam deponi, & inde excerni, plane constat nihil ab hac glandula suscipi, quod non in sanguinem iterum amandetur, quod in vituli capite sæpius experiri mihi contigit; nimirum in hoc animali os Cuneiforme, sub glandula Pituitaria positum, diversis aliquando in locis, aut saltem uno largiore ductu perforatur; meatus autem illi paulo profundius penetrantes in duos ductus dividuntur, qui os Cuneiforme ex utroque latere perforant, & in venas Jugulares utrinque terminantur, adeo ut si lac aut atramentum foraminibus istis è siphone injiciatur, statim in venas Jugulares utrinque pervadat; nihil autem tincturæ circa palatum, nares, os, fauces, aut laryngem apparebit: adeo ut in vitulo humor omnis à Cerebro proveniens, totus iterum in venas redeat; quod ipsum in Cranio etiam humano

mano nuper expertus sum quanquam enim os Cuneiforme calvariæ humanæ glandulæ pituitariæ subjectam nunquam perforetur, at alios ductus excudit Natura, quibus serum omne à ventriculis cerebri in sanguinem rursus derivetur; duo quippe vasa ex utroque Sellæ Turcicæ latere confita sunt, quæ hiantibus quasi osculis aquam omnem à glandula Pituitaria destillatam excipiunt, & in venas Jugulares utrinque (uti in Tab. 5. Fig. 1. explicata apparet) extra calvariam deponunt; quorum ductus facile patebunt, si aqua, aut lac è siphone in venam Jugularem utramvis prope calvariam vi injiciatur, mox enim conspicietur prope glandulam Pituitariam erumpere atque scaturire, certo utique indicio, quicquid feri in Cerebri ventriculos, atque ex illis per Infundibulum secernitur, non depluere in palatum, sed in sanguinem denuo refundi, ei-que commisceri.

Quod autem nihil per os Cribriforme

me in nares pertranseat, ipsius partis conformatio fatis arguit; nam licet in aridis calvariis foramina istius ossis aperta, & luci pervia videantur, in vivo tamen animali à nervis & membranis, è processu mammillari utrinque prodeuntibus omnino infarciuntur: quinimo sæpe accidit, ut aqua inter anfractus Cerebri diu accumulata, tandem, disrupta Pia Matre, cui inclusa est, in Medullam oblongatam, nervorumque origines decumbat, inibi-que stagnatione & continuo incremento totam Cerebri basin eoque obruat, & corrumpat, ut tandem homines exstinguat, quod tamen raro aut nunquam evenire debuit, si per os illud Cribriforme tam facilius daretur exitus.

Humorem autem intra processus mammillares contentum, ipsos non permeare & pertransire melius innotescet, si ipsorum substantiam, conformationem, & usum paulo accuratius perpendamus: duplici enim substan-

stantia non aliter ac reliquæ Cerebri partes, medullari scilicet, & Corticali constant; in Medullari autem & alba parte ipsi spiritus animales procul dubio hospitantur unde in nervos ab ea exortos, & in nares implantatos excurrunt; si autem aqua in cavitatibus processuum contenta per medullarem ipsorum substantiam in nares transeat, & exstillet, necesse est, ut per nervos fluat, & ipsorum corpora pervadat: at quid inde de Olfactu fiet, si ipsa ejus organa continuo humore ita scateant; quin etiam si aqua medullarem processuum substantiam, & ipsos nervos permeet, & in aperta narium spatia deferatur, quid impediet, quominus ipsi spiritus, qui longe tenuiores & subtiliores sunt, multo citius avolent?

Ipsa insuper horum processuum in brutis amplitudo aperte demonstrat, eos excretioni minime inservire; cum enim inter omnia vasa, quæ in partem aliquid afferunt & reportant, respec-
tu

etu usus, exacta quædam habitudo &
 analogia fuerit, si conferamus vala om-
 nia, quæ aquam in ventriculos Cerebri
 deponunt, cum Infundibulo simul &
 hisce nervorum tubulis, eaque in di-
 versis animalibus, inter se compare-
 mus, clare patebit, processus mam-
 millares nullum omnino humorem per-
 transire: aut os Cribriforme in nares
 perfluere: cum enim nulla præter 4.
 exiles arterias in glandulas pone Ce-
 rebellum, & in plexus Choroidæos
 distributas in ventriculos Cerebri hu-
 morem aliquem asserre certum sit,
 cumque Infundibulum satis amplum
 & capax sit, ad reportandum quicquid
 arteriæ istæ deposuerunt (cum habeant
 proportionem venæ ad arteriam) quid
 opus est, aut quid incongruum magis,
 tam largo ductu processus mamma-
 res in eundem ulum excavari? cum si
 omnino opus esset, at certe multo mi-
 nores sufficerent.

Præterea si ad expurgandos Cerebri
 ventriculos & humores inde evacuan-
 dos

dos conformati fuerint; quare in humano Cerebro, quod vitulino fere triplo majus est, hi ductus decuplo minores facti sunt? in quo tamen Infundibulum & ventriculi magnitudinē Cerebri per omnia respondent, in Cerebro etenim humano adeo exigua aut nulla est horum Nervorum cavitas, ut neque manibus inveniri, aut oculis discerni possit.

Quantum porro ex usu istius liquoris, in hisce nervorum tubulis contenti, conjicere licet, non erit verisimile, humorem hac via in nares pertransire; ductus enim isti propter usum longe præstantiorem, quam ad serum à ventriculis Cerebri transferendum, excavati videntur; utpote quum effluvia sive particulæ subtilissimæ ab objecto externo decedentes nervis olfactoriis traduntur, quo melius earum species Cerebrum pertingerent, necesse fuit, nervos istos sive processus ab ipso ortu suo excavari, & humore limpido repleri; non quod credam, species ipsas

R

per

per eorum cavitates in ventriculos Cerebri deferri, aut spiritus animales in ventriculis Cerebri hospitari, prout Veteres sentiebant, sed ideo cavos fieri, & aqua intus humectari arbitror, quo melius medullaria ipsorum corpora, tum retinendis, tum convehendis in Cerebrum odoribus inserviant: sicuti enim ex humidis corporibus & madido aëre magis, quam sicca tempestate ex arido solo res odoratae percipiuntur, prout Venatoribus nimis notum est, ita quoque verisimile est eodem modo, quo extra optime percipiuntur, etiam melius intra convehiri. Nec obstat hic, quod siccus nasus olfactu maxime pollere perhibetur, nam id solum contingit, quia in Coryza humore & mucositate nares fere opplentur, eodemque non solum tunicae, sed & ipsae nervorum fibrae in iis dispositae penitus ita obducuntur, ut odores ad ipsas nequaquam penetrare possint; non aliter ac cum cerumine aures obturentur, imperfecte audimus, aut si oculi orbitae

orbitæ multa aqua circumfluat (prout inter lacrymandum accidit) minus acute videmus, quia scilicet inter Sensus & Objectum medium quoddam corpus intercedit, quod mutuum eorum contactum impediat; denique si ad Catarrhos deferendos, quam ad hunc finem, ductus isti potius excavati sint, cur Homini largiores, quam cani, vitulo, porco, equo, & reliquis animalibus non contigerunt? utpote cujus Cerebrum illud istorum animalium mole sua æque superat, ac anima rationalis sensitivam excellit.

Quin & hac unica observatione magis constabit, humorem in ventriculis Cerebri contentum non alia, præterquam per Infundibulum, via transire: Juvenis Studiosus, cætera sanus, sine evidenti causa ulla somno diuturno, & tandem Lethargo correptus, subito & fere intra 2 septimanas convulsus obiit; in Cerebro ejus, post mortem dissecto, ventriculi aqua tumidi reperiuntur, quin & tota Cerebri basis

& Medulla oblongata fero extravasato, & in fundum calvariæ decumbenti, immersæ erant, Infundibulum summè distentum apparebat, processus autem Mammillares non omnino intumuerant; glandula vero Pituitaria, ubi Infundibulum inferebatur, gelatina quadam viscida ad magnitudinem minoris fabæ penitus oppleta fuit; adeo ut nihil liquoris ab Infundibulo suscipere aut percolare potuerit, unde hydrops Cerebri (cum nullus alius humori daretur exitus) sequutus est, parimodo ac hydrops Abdominis aliquando exoritur vitio renum, cum à materia viscida & mucilaginosâ obstruantur, unde urina supprimitur, prout innuit *Doctissimus Helmontius*; atque hinc est quod aquæ minerales acidulæ vitriolatæ, aut decocta aperientia, cum adjectis salibus parata, magni usus aliquando sint, quia vias mucosâ quasi obfitas atterunt & rursus aperiunt, adeoque urinæ iterum com meatum liberum restituant.

Quæ

Quæ glandula cum tam necessarium Cerebro, in transcolando ejus sero, officium præstet, ideo in sinu ossis Cuneiformis, in id excavato, ita reconditur, ut ex omni parte libera ulque sit, nec ab incumbente Cerebro, aut contiguo quovis corpore comprimatur.

Verum hic reclamabunt multi, unde Rheumata, Catarrhi, Lacrymæ, nisi à Cerebro? quantumque à sordibus & excrementis Cerebro periculum, nisi per oculos, nares, aures, & palatum expurgentur? quibus facile erit reponere, multo studiosius à Summo Creatore provisum esse, ne sordes aliquæ aut humores Caput, regiam illam corporis & animæ sedem, inquinarent; quod ante limina & foras ejus tot secretionis organa & ministeria constituit, quibus ingens humorum saburra à Cerebro prævertitur; scilicet per glandulas Lacrymales, quæ irrigandis & illinendis oculis ob facilitorem motum destinantur; per tuni-

cam narium, glandulis ubique intertextam, & os spongiosum circum vestientem, humectandis narium cavitatibus designatam, ne continuo & reciproco aëris transitu nimis ficcarentur; per glandulas Maxillares, tonsillas, & reliquas circa palatum & linguam confitas ad excernendum salivam pro masticatione ciborum; per ipsam Laryngis membranam glandulosam, ad emolliendam gutturis asperitatem; denique per membranas, quas *Schneiderus* Pituitarias vocat, ad humectandum palatum & radicem linguæ, ne nimio motu exaresceret; quæ glandulæ licet hic loci primario constitutæ sint, ad eam lymphæ copiam à sanguine separandam, quæ partium vicinarum usibus inserviat, sæpenumero tamen fit, ut alias quoque ob causas majorem, quam earum res exigit, quantitatem excernant; adeo ut humoris copiosius inde profluentis non sit materia, aut origo alia, sed ejusdem solummodo magis aucta quantitas. Modum
autem,

autem, quo lymphæ à sanguine in glandulis hinc separatur, cum ingeniose conjecerit *Doctiss. Steno* in *Tractatu de Glandulis*, ab eo descriptio petenda est.

Cum vero Catarrhi materia, occasio, atque organorum in eo discernendo ministeria ex præmissis constiterint; satis obvium & facile erit concipere, quid illi sistendo aptissime conferet.

In quantum igitur ex sero sanguinis materia Catarrho suppeditatur, quicquid ei pabulum detrahit, aut serum per renes præcipitat, vel per alvum derivat, vel per poros corporis dispellit, intentioni curativæ apprimæ satisfacit.

Quare quum Catarrhus primo urget, nihil magis ei supprimendo conducit, modo absque febre sit, quam ut sitim diutissime toleremus; tridui enim, vel quadridui abstinencia à potu plures novi à Catarrho prorsus liberatos, cujus alia ratio non est, quam quod fomite subducto omnino exsiccat-

tur, non aliter ac rivuli exarescunt ex pluviarum penuria.

Modo autem Febris aliqua fit suspicio, sive ex pulsu, urina, corporis inquietudine & calore, evacuato prius Corpore mox sanguis detrahatur, & victu usque tenui alatur aeger, cæteraque ex usu sint, quæ cura febris postulat, habito respectu semper ad fluxum feri concitatum.

Si vero propter feri abundantiam, vel salium, in sanguine oborto fluore, fusionem atque dissolutionem Catarrhus adhuc pertinax atque molestus fuerit, in hoc casu nihil præstantius, quam ut præmissis catharticiis per alvum ducentibus, deinde exhibitis diureticis serum sanguinis per renes propellatur; quippe qui in omni Catarrho, ob feri in partes superiores metastasin, illud solito modo non secernunt.

Et si nihilominus fluxus perseveret, fontanellis in cervice, brachiis, aut femore apertis, vel vesicatoriis ibidem applicatis, pars feri evacuetur, & ab
ore

ore prævertatur ; at quoniam hæc parce & lentis passibus optatos effectus producant , si opus postulet , aut suffocationis periculum ex inundatione feri impendeat , præmissa denuo Venæ Sectione ad sudores protinus æger componendus est , eosque pro virium ratione semel aut bis in die provocet , qui humores serosos per omnes corporis poros eliminando hominem in sicco collocant.

Hactenus Catarrhi curationem respectu materiæ , è qua constat , & causæ , qua oritur , breviter expedivimus , restat ut partium , per quas transitus ejus fit , rationem pariter expendamus.

Cum itaque serum valde fluxile & tenue sit , atque per vasa & ductus peculiare in glandulis , circa os & fauces confitis , ab arterioso sanguine discernatur , nulli dubium esse debet , illud quo limpidius & tenuius sit , eo facilius & citius ductus istos pervasurum esse ; quoque diuturnius vasa illa

colatoria laxata fuerint, eo magis à præterlabente fero ampliari.

Qua propter curationis ratio ad hæc duo præcipue respicit, tum ut serum sanguinis incrassetur, cui fyrupi & opiata tantum conferunt, ut sine illis vix quicquam aliquando perficiamus, tum ut laxa glandularum vasa debito modo constringantur, id quod intus adhibitis, aut extra applicatis, sedulo procurandum est, non neglectis interrim, quæ debitum calorem circa colli partes conservando liberum sanguinis circuitum in glandulis restituant.

Quorum omnium rationes & formulæ apud Authores passim adeo elegantes prostant, ut frustra fuerit hic loci eas commemorare.

Denique si malum hoc penitus evitare quis velit, ad præcautionem hujus affectus nihil erit utilius, quam ut vestibus optime ab externo frigore munitus transpirationem debitam sedulo promoveat, & (si res ita exigat)

in

in regiones calidas & ficas se conferrat, in quo valetudinis nostræ, & Catarrhos præcavendi ratio præcipue consistit.

F I N I S.

Emendanda,

Pag. 47. lin. 12. leg. *remittant.* pag. 49. lin. 16. pro *illæ lege illis.* pag. 61. lin. 13. dele *quod.*



IN-

I N D E X

Rerum in hoc opusculo occurrentium & scitu dignarum.

A.

Aëris mixturæ color sanguinis floridus debetur, 189

ad *Affectus* dignoscendos cordis motus cognitu necessarius, 1

Aorta paulo supra cor incurvatur, 59

Aortæ compressio infra cor quid præstet, 116

Aqua a Pancreate secreta diluendo chylo inservit, 228

Arteriæ crassiori tunica donantur, 112

Arteriarum obstructio, compressio, aut marcescentia in partibus quid producat, 113. & *seqq.*

Arteriotomia dolores auferit, 119

Ascites non fit a ruptis lymphaticis vasis, 129

Auricularum ventriculi a cordis ventriculis differunt, 41

— fibræ in tendinem cordis inseruntur, 39

B.

Basis cordis præcipue a vasis suis sustentetur, & dependet, 11

Breve vas nihil a liene in ventriculum deponit, 218

I N D E X

C.

- C**alor sanguinis non a corde, 79
- Capitis situs quis inter dormiendum
maxime salutis confert? 156
- Catarrhus quomodo efficiatur, 250
- Catarrhi materia e sero sanguinis deriva-
tur, 248
- curatio a partibus, per quas transit,
petita, 265. 266
 - curatio absente febris, 263
 - cum febris conjuncta sit, 264
 - non proveniunt a cerebro, 251
 - ex quo humore constent, 261. 262
- Causa finalis accretionis pericardii septo
transverso, 7. 8
- adhæſionis istius efficiens, 9
- Cerebri & cordis mutua necessitudo osten-
ditur, 102
- hydrops ex obstructa glandula pitui-
taria, 260
- a Cerebro catarrhi non proveniunt, 251
- e — proveniens humor in venas jugula-
res resorbetur, 252
 - per os cribriforme in nares nil de-
pluit, 254
- Chyliferi ductus quotuplices, 232
- Chylus per ductus thoracicos in sangui-
nem infunditur, 233
- variis experimentis probatur, 234-
& seqq.

Chy-

I N D E X.

- Chylus* ubi in sanguinem suffundatur, 233
 — recens dispendia sanguinis instaurat, 217
 — quali mutationis gradu & modo in sanguinem faciat, 244
 — quomodo nutrimento partium inserviat, 245
Chyli secretio quomodo in intestinis perficiatur, 225
Chylo diluendo aqua a pancreate secreta inservit, 228
Circulatio sanguinis ubi celerior, ubi tardior, 152
 — sanguinis celerior quem effectum afferat in partibus superioribus, 153
 — — tardior quem effectum afferat in partibus inferioribus, 152
Circulationis mensura ab urinæ decursu æstimatur, 177
 — experimentis confirmatur; 179
Circulationem sanguinis risus impedit, 99
Coagulatio sanguinis cordis motui officit, 129. & seqq.
Colli muscoli sunt biventres, 27
Color sanguinis venosi ater unde procedat, 190
 - - - purpureus sanguinis arteriosi debetur pulmonibus, 186
 [- - - sanguinis arteriosi provenit

I N D E X.

nit a mixtione ejus cum admissio aëre,
187.188

- - - - - sanguinis arteriosi non pro-
cedit ab ulla ejus in Corde accensione,
184

- - - - - sanguinis arteriosi non pro-
venit a comminutione sanguinis in
pulmonibus, 187.188

- - - ater sanguinis venosi non procedit
ab ejus extinctione, 186

Colorem floridum aëris mixturæ deberi
probatur experimentis, 189

Columnæ carneæ in sinistro cordis ventri-
culo quare sint majores, 53

—— in sinistro cordis ventriculo
quare protuberent, 50. & seqq.

—— in sinistro ventriculo cordis
quid præstent, 50. & seqq.

Compressio arteriarum quid producat, 113

—— aortæ infra cor quid præstet, 116

Conus cordis humani magis quam bruto-
rum in lævum deflectitur, 10

—— quo modo in omni systole
ad basin assurgit, 87

Cor a succo nutritio, ab arteriis in sub-
stantiam deposito, alitur, 13

—— nutritio, non intra ventricu-
los suos recepto, alitur, 13

—— omnibus animalibus muscularis sub-
stantiæ est, 65

I N D E X.

Cor est excoquendum, ut fibræ appareant, 29

Cordis motus ad sanguinis naturam & affectus dignoscendos cognitu necessarius, 1

— situs in diversis animalibus differentia, ejusque ratio, 2

— humani conus magis quam brutorum in lævum deflectitur, 10

— basis præcipue a vasis suis sustinetur & dependet, 11

— vasa, 13

— nervi, 15. 16

— substantia est muscularis, 22. & seqq.

— musculus biventer est, 28

— fibræ ubi in tendinem inferantur, 29

— ventriculus sinister crassioribus & robustioribus fibris donatur, 38

— in tendinem fibræ auricularum inferuntur, 39

— ventriculi ab auricularum ventriculis differunt, 41

— superficies externa lævis est. 42. 45. inferior non ita, *ibid.*

— ventriculi sinistri fissuræ & scrobiculi sunt majores, 45

— motus non dependet a sanguinis ebullitione, 74. 75

— actio eadem est ac reliquorum musculorum, 83

Cor-

Fig: 1. Pag: 51. 56.




Fig: 2. Pag: 52. 67.



Fig: 3. Pag: 59. 63.



Fig: 4. Pag: 55.




Fig: 5. Pag: 56.




Fig: 6. Pag: 56.



Fig: 1. Pag: 25. 29




Fig: 2. Pag: 26. 30.



Fig: 3. Pag: 27. 31.



Fig: 4. Pag: 28. 32.



Fig: 5. Pag: 30. 34



Fig: 6. Pag: 31. 35




Fig: 7.
Pag: 32. 36





Fig: 8. Pag: 34. 38





23

Fig: 1. Pag: 19.




Fig: 2. Pag: 20.

24.




Fig: 3. Pag: 21. 25.




Fig: 4. Pag: 21.

25.




Fig: 5. Pag: 21. 25.




Fig: 6. Pag: 22.

26



Fig: 1. Pag: 22. 26.



Fig: 3. Pag: 49. 54.



Fig: 2. Pag: 23. 27.




Fig: 4. Pag: 50. 54.





Tab: 5.

Fig: 1. Pag: 39. 43




Fig: 3.

Pag: 152. 156




Fig: 3. Pag: 33. 39



Fig: 4. Pag: 160. 165





Fig: 1. Pag: 161. 166.




Fig: 3. Pag: 188.





Fig: 2. Pag: 234.






Fig: 1. Pag: 204.



Fig: 2. Pag: 204.




Fig: 3. Pag: 205.




Fig: 4. Pag: 206.





Fig: 5. Pag: 206.



Fig: 6. Pag: 207.



I N D E X.

Cordis musculus quo modo fit constrictior;

87

— conus quo modo ad basin in omni
systole assurgit, 87

— motus totus in systole positus, 88

— ventriculus sinister dextro robustior
& crassior, 90

— systole qua vi ac robore perficitur,
91. 92

— motus ab spirituum influxu impedito
deficit, 94

— motus quot modis, & quibus de
causis alteretur, 97

— motui singultus officit, 100

— & cerebri mutua necessitudo osten-
ditur, 102

— motus quomodo a seipso male affe-
cto lædatur, 105. 106

— hydrops quid ad motum ejus perver-
tendum conferat, 107

— motui sanguinis coagulatio officit,
129. & *seqq.*

— motum quid acceleret, 133

— --- quid diminuat, 134

— --- quid depravet, 135

— --- quid supprimat, 136

— --- quid penitus tollat, 143

— motu diminuto quid fiat, 144

— polypus ita dictus quomodo genere-
tur, 147

S

Cor-

I N D E X.

Cordis debilis motus quales effectus in capite producat, 148. 149

Cordi vis omnis ac vigor a spiritibus per nervos influentibus communicatur, 94

— nocumentum affert feri intra pericardium defectus, 108

— varices magni nocumentum afferunt, 122

per *Cor* quoties sanguis omnis circuletur, 171. 172

a *Corde* non est sanguinis calor, 79

— quæ vasa originem capiant, & quæ in ipsum terminentur, 12. 13

in *Corde* nullum fermentum aut ebullitio sanguinis, 69. 70

— motus instrumenta proxima sunt ipsius fibræ carneæ, 82

Cribriforme os in nares e cerebro nihil deponit, 254

Cuneiformis ossis sinus glandulam pituitariam recondit, 261

Curatio catarrhi a partibus, per quas transit, petita, 265. 266

— — absente febris, 263

— — cum febris conjuncta sit, 264

D.

Decubitus supinus quare incommodus, 162. 167

Descriptio foraminis ovalis, 61

Diastole est cordis restitutionis motus, 88

Dif-

I N D E X:

Differentia situs cordis in diversis animalibus, ejusque ratio, 2

Dolores arteriotomia aufert, 119

Ductus Chyliferi quotuplices, 232

per *Ductus* thoracicos chylus in sanguinem infunditur, 233

—— — variis experimentis probatur, 234. & seqq.

E.

Ebullitio sanguinis non est in corde, 69.
70

—— — in corde ejus systolæ obest, 71

—— — ad diastolen non requiritur, 71

Effectus in capite quales producat debilis cordis motus, 148. 149

Exercitii utilitas ostenditur, 147

Experimentum demonstrans quantum sanguinis coagulatio cordis motui officiat, 129. & seqq.

—— — probans cordis motum a sanguinis ebullitione non dependere, 74. 75

—— — nullum humorem in palatum per glandulam pituitariam destillare, 251

Experimenta mensuram circulationis ab urinae decursu aestimari, 177

—— — colorem sanguinis arteriosi non procedere ab ulla ejus in corde accensione, 184

—— — purpureum sanguinis arteriosi pulmonibus deberi, 187

I N D E X.

- Experimenta* colorem floridum aëris mixturæ deberi probantia, 189
 — chylum per ductus thoracicos in sanguinem infundi, 234. & *seqq.*

F.

- F***ebbris* cum catarrho conjuncta, quomodo catarrhus curetur, 263
 — quando absens, quomodo catarrhus curandis, *ibid.*
Fermentum nullum in corde, 69. 70
 — ventriculi ab ipso sanguine immediate procedit, 223
 — probatur argumento, *ibid.*
Fibræ cordis ut appareant, cor excoquendum est, 29
 — — in tendinem, in basi circa ostia ejus confitum, inseruntur, 29
 — auricularum in tendinem cordis inseruntur, 39
 — in sinistro cordis ventriculo sunt papillis carneis & fibris in dextro majores, 53
 — carneæ cordis sunt motûs ipsius instrumenta proxima, 82
Fissuræ in sinistro ventriculo cordis sunt majores, 45
Fluor uterinus diu durans spinam debilitat, 118

Flu-

I N D E X.

Fluxus sanguinis pro diverſo corporis ſitu & figura alteratur, 150

Foraminis ovalis deſcriptio & uſus, 61

G.

G*landula* pituitaria obſtructa hydropem cerebri producit, 260

— — intra ſinum offis Cuneiformis reconditur, 261

per *Glandulam* pituitariam humor e ventriculis cerebri tranſit, 259

— obſervatione probatur, *ibid.*

Glandulae in abdomine & in toto inferiore corpore, in receptaculum lympham deponunt. 231

Gonorrhœa ſimplex ſpinam debilitat, 118

H.

H*umor* pericardio contentus qualis ſit, 6

— nullus in palatum per glandulam pituitariam deſtillat, 251

— experimento probatur, *ibid.*

— omnis e cerebro proveniens in venas jugulares reſorbetur, 252

— intra proceſſus mammillares contentus nares non permeat, 254

— e ventriculis cerebri per infundibulum & glandulam pituitariam tranſit, 259

— obſervatione probatur 259

I N D E X.

Humoris in processibus mammillaribus
contenti usus, 257

— secretio, ex quo catarrhi constant,
quomodo fiant, 261. 262

Hydrops cordis quid ad motum ejus per-
vertendum conferat, 107

— cerebri ex obstructa glandula pi-
tuitaria, 260

I.

Influxus spirituum animalium per nervos
in cor est varius, 19

— hujus causa, *ibid.*

Intestina quare tanto ambitu sint consti-
tuta, 224

Intestinorum motus peristalticus cui usui
inserviat, 225. 228

in *Intestinis* quomodo secretio chyli per-
ficiatur, 225. 228

Jugulares venæ humorem omnem e ce-
rebro proveniente reſorbent, 252

Jugularium venarum muscoli singuli ex
utroque latere sunt biventres, 27

Jugularibus venis in cane ligatis quid suc-
cesserit, 128

L.

Lien per Vas breve nihil in ventriculum
deponit, 218

— quæ vasa cum ventriculo commu-
nia habeat, 218. 219

Lympha glandularum omnium in rece-
pta-

I N D E X.

ptaculum in abdomine & in toto inferiore corpore deponitur, 231

M.

Marcescentia arteriam in partibus quid producat, 113. 114

Materia catarrhi e sero sanguinis derivatur, 248

Membranae tricuspides in dextro ventriculo quid præstent, 46. & *seqq.*

Mensura circulationis ab urinæ decursu æstimatur, 177

Motus cordis ad sanguinis naturam & affectus dignoscendos cognitu necessarius, 1

— cordis a sanguinis ebullitione non dependit, 74. 75

— musculi cujusvis non fit ab explosione spirituum influentium, 84. 85

— musculi cujusvis non fit ab inflatione ejus, 84. 85

— cordis totus in systole positus, 88

— cordis ab spirituum influxu impedito deficit, 94

— cordis quot modis, & quibus de causis alteratur, 97

— cordis quomodo a seipso male affecto lædatur, 105. 106

— debilis cordis quales effectus in capite producat, 148. 149

— sanguinis rapidus quid producat in capite, 149

I N D E X.

Motus peristalticus intestinorum cui usui
inserviat, 225. 228

Motus instrumenta proxima in corde sunt
ipsius fibræ carneæ &c. 82

Motui cordis singultus officit, 100

— — sanguinis coagulatio officit,
129. & seq.

Motum cordis quid acceleret, 133

— --- quid diminuât, 134

— --- quid depravet, 135

— --- quid supprimat, 136

— --- quid penitus tollat, 143

Motu cordis diminuto quid fiat, 144

Musculus nullus in corpore simplicis ventris
est, sed omnes biventres sunt, 23. & seq.

— — --- est biventer, 28

— Deltœides valde compositus est, 26

— --- quo modo constrictior fit, 87

Musculi in collo sunt biventres, 27

— quare junctis tendinibus in medio con-
veniant, 27

— venarum jugularium singuli ex utro-
que latere sunt biventres, 27

— cujusvis motus non fit ab inflatione
ejus, 84. 85

— — nec explosione spirituum influen-
tium, 84. 85

N.

Nervi cordis, 15. 16

— cordis sunt motus ipsius instru-
menta proxima, 82

Nu

I N D E X.

Nutrimeto partium quomodo chylus in-
serviat, 245

Nutritius succus cordis, qui? 13

O.

*O*bsstructio arteriarum quid producat, 113.

114

Os cribriforme in nares e cerebro nihil
deponit, 254

Offis cuneiformis sinus glandulam pitui-
tariam recondit, 261

Ovalis foraminis descriptio & usus, 61

P.

Palpitationis causa non est nimia feri co-
pia intra pericardium accumulata,

107

Papillæ & membranæ tricuspidēs in dex-
tro ventriculo cordis quid præstent,
46. & seqq.

Pericardium quare in homine septo trans-
verso accrescat, secus ac in brutis, 7.8

Pericardii descriptio & usus, 3

—— accretionis septo transverso causa
finalis, 7.8

—— ——— causa efficiens, 9

Pericardio serum contentum unde prove-
niet, & cui usui inserviat, 4

Peristalticus motus intestinorum cui usui
inserviat, 225.228

Plethora nimia quid præstet, 131. 132

Polypus cordis ita dictus quomodo genere-
tur, 147

S 5

Pc

I N D E X.

Potationes nocturnæ & seræ salutis maxime incommodæ, 158

Pulmonibus color purpureus sanguinis arteriosi debetur, 186

— probatur experimentis, 187

R.

Receptaculum lymphæ inter tendines diaphragmatis constituitur, 231

Risus quomodo perficiatur, 99

— si nimius sit, quomodo circulationem sanguinis impediat, 99

S.

Saluti maxime incommodæ potationes nocturnæ & seræ, 158

Sanguis non omnino transit per septum cordis, 91

— quoties per cor circuletur, 171. 172

— non magis in pulmonibus comminuitur, quam in reliquo corpore, 188

Sanguinis ebullitio in corde ejus systolæ obest, 71

— ad diastolen non requiritur, 71

— ad naturam ejus dignoscendam cordis motus cognitu necessarius, 1

— ebullitio nulla in corde, 69. 70

— calor non a corde, 79

— circulationem visus impedit, 99

— coagulatio motui cordis officit, 129.

& seqq.

— motus rapidus quid in capite producat,

I N D E X.

- Sanguinis fluxus pro diverso corporis situ
& figura alteratur, 150*
- circuitus ubi celerior, ubi tardior,
152
- --- celerior quem effectum afferat
in partibus superioribus, 153
- arteriosi color purpureus non pro-
cedit ab ulla ejus in corde accensio-
ne, 184
- probatur experimentis, 185
- venosi color ater non procedit ab
ejus extinctione, 186
- arteriosi color purpureus debetur
pulmonibus, 186
- arteriosi color purpureus non pro-
venit a comminutione sanguinis in
pulmonibus, 187. 188
- — provenit a mixtione ejus cum
admisso aëre, 187. 188
- venosi color ater unde procedat,
190
- Transfusio quo ratiocinio excogi-
tata, 195
- --- quibus mediis perfecta, *ibid.*
- --- ubi & a quo primum tentata,
197
- --- eam divulgandi occasio, 199
- --- ejus totus apparatus describi-
tur, 203
- --- in quibus corporibus, & quo

I N D E X.

- valetudinis statu tentanda sit, 214.
215.
- Sanguinis* dispendia recens chylus insta-
rat, 217
- — serum catarrhi materiam suppetit,
248
- — quibus de causis a sanguine separe-
tur, 250
- — qua ratione catarrhum efficiat, *ibid.*
- Scrobiculi* atque fissuræ in sinistro ventri-
culo cordis sunt majores, 45
- Secretio* chyli quomodo in intestinis per-
ficiatur, 225. 228
- humoris, ex quo constant catarrhi,
quomodo fiat, 261. 262
- Sectio* venæ quid juvet, 191. & *seqq.*
- Septo* transverso pericardium secus accre-
scit in homine, ac in brutis, 7. 8
- Serum* pericardio contentum unde pro-
veniat, & cui usui inserviat, 4
- pericardio contentum, qualis sit hu-
mor, 6
- sanguinis catarrhi materiam suppetit,
248
- sanguinis quibus de causis a sanguine
separetur, 250
- — qua ratione catarrhum efficiat, 250
- Seri* copia nimia intra pericardium accu-
mulata non est causa palpitationis,
107

I N D E X.

- Seri* intra pericardium defectus nocumentum cordi affert, 108
- Singultus* cordis motui officit, 100
- Situs* cordis in diversis animalibus differentia ejusque ratio, 2
- capitis quis inter dormiendum maxime salutis confert? 156
- Spina* gonorrhœa simplici aut fluore uterino diu laborantium spina debilitatur, 118
- Spiritui* per nervos cordis influentes sunt ipsius motûs instrumenta proxima, 82
- per nervos influentes cordi omnem vim ac vigorem communicant, 94
- Spirituum* animalium per nervos in cor influxus est varius, 19
- ejus causa, *ibid.*
- per nervos influentium influxus impeditus cordis motum sistit, 94
- Substantia* cordis est muscularis, 22. & *seqq.*
- Succus* nutritivus cordis, qui? 13
- Superficies* cordis externa lævis est, 42. 45
- interior non ita, *ibid.*
- Supinus* decubitus quare incommodus, 162. 167
- Symptomata* a vermibus intra pericardium genitis producta, 110
- Systole* est causa cordis motus, 88

I N D E X.

Systole cordis, qua vi ac robore perficitur, 91. 92

T.

T*endo*, in quem cordis fibræ inseruntur, ubi situs, 29

per *Thoracicos* ductus chylus in sanguinem infunditur, 233

— variis experimentis probatur, 234. & *seqq.*

Transfusio sanguinis quo ratiocinio excogitata, 195

— --- quibus mediis perfecta, *ibid.*

— --- ubi & a quo primum tentata, 197

— --- eam divulgandi occasio, 199

— --- ejus totus apparatus describitur, 203

— --- in quibus corporibus, & quo valetudinis statu tentanda sit, 214. 215

Tuberculum intra venam cavam cui usui servit, 55. & *seqq.*

Tunica tenui venæ donantur, 112

— crassiori arteriæ donantur, 112

V.

V*alvulae*, in vena Subclavia appositæ, officium, 233

Varices quomodo producantur, 122

— si magni fuerint, quale nocumentum cordi afferant, 122

Vas Breve nihil a liene in ventriculum deponit, 218 *Va-*

I N D E X:

Vasa Cordis, 13

- quæ a Corde originem capiant, & quæ in ipsum terminentur, 12. 13
- lymphatica rupta non creant ascitem. 129

Vasorum omnium, quæ lieni cum ventriculo communia sunt, descriptio, 218. 219

Vena cava ante ostia cordis carnea & muscularis est, 57

- pulmonaris ante ostia cordis carnea & muscularis est, 57

Venæ sectio quid juvet, 191. & seqq.

- cavæ ligatio supra diaphragma in cane quid præstiterit, 125. & seqq.

Venam cavam ligandi modus ostenditur, 127

Venæ tenui tunica donantur, 112

- jugulares humorem omnem e cerebro proveniente[m] resorbent, 252

Venarum jugularium singuli muscoli ex utroque latere sunt biventres, 27

Venis jugularibus in cane ligatis quid successerit, 128

Ventriculus cordis sinister crassioribus & robustioribus fibris donatur, 38

- cordis sinister dextro robustior & crassior, 90

- quæ vasa cum liene communia habeat, 218. 219

Venæ

I N D E X.

- Ventriculi* cordis sinistri scrobiculi atque
fissuræ sunt majores, 45
- dextri cordis papillæ & membranæ
tricuspidæ quid præstent, 46. & seqq.
 - sinistri cordis columnæ carneæ & fi-
bræ majores papillis carneis & fibris
in dextro, 53
 - fermentum ab ipso sanguine immedia-
te procedit, 223
 - probatur argumento, *ibid.*
- in *Ventriculo* cordis sinistro columnæ car-
neæ quid præstent, 50. & seqq.
- Ventriculi* cordis ab auricularum ventri-
culis differunt, 41
- Vermes* intra pericardium geniti sympto-
mata producunt, 110
- Ufus* foraminis ovalis, 61
- Uterinus* fluor diu durans spinam debilitat,
118
- Utilitas* exercitii ostenditur, 147

F I N I S.



John Jensen
1574
Rivers

